

نا دنا العضم بالنا حرة
م كبا حرة

من حلاوة الروح

رواية بالعامية

صفاء عبد المنعم

من حلاوة الروح

صفاء عبد المنعم

الطبعة الأولى ٢٠٠١
حقوق النشر محفوظة
رقم الإيداع ١٢٩٧٣ / ٢٠٠١

الغلاف والإخراج الفني واللوحات الداخلية للفنان / أحمد الجنائني

كتاب رؤى ، يصدر عن جماعة رؤى . يعنى بالإبداع في كل مجالاته

المؤسسون ابجدياً

أحمد الجنائني
إيهاب الورداني
جمال عساكر
د. صلاح ترك
محمد عبد الحافظ ناصف
محمد عبد الستار الدش

كتاب القصة والرواية
رئيس التحرير / إيهاب الورداني
مدير التحرير / صفاء عبد المنعم

الاتصال هاتفياً
ت ٢٨٤١٥١٠ / ٤٠ - ٢٩٧٢٩٠٠ / ٤٠

إهداء

إلى الذين رحلوا

وتركوا

مساحة أسي في القلب

صفاء

.. قاعد لوحذك ، بين سبع ببيان
متفتحين عليك ، نقرقش ملح العين
والعافيه ، وتفك زراير القميص من العرق ،
وصهد الذكريات اللي ابتدى يقب عليك
فجأة ..
دا من حلاوة الروح

... ياه الدنيا برد قوى !

وبالعافيه حطيت الحجر التؤيله ورا الباب الكبير، دُخِلت أوضتى .
الدنيا بتشتى ويردان ، الأوضه فاضيه، ويتصقّر . خفت ، وفضلت
أنده (زى المجنون عَ البت نبويه، إنها ترد ، ولا تقول أناأه ، أبدا !!-
كأنها فص ملح وداب ، أو كأن الأرض انشقت وبلعتها . لميت شويه
خشب كسر ، على حنتين قوالح ، وقُلت أولعهم ، أدقّى بيهم . ولما
صفيو ، قعدت علي فرشتى ، قول يجى ساعه، اتنين ، إن البت
تظهر ، أو بيان لها اثر ، أبدا ! قمت مرّة ثانيه ، أدعبس عليها ،
يمكن تكون راحت هنا ولا هنا . مش عتران فيها .تكون نامت ع
السطح ؟ آخر ما زهقت ، قلت أعمل دور شاي . ادعبس ع السكر ،
ع الشاي ، فين وفين ، لقيت مَجْمَع السكر تحت السرير ، وشويه
شاي يدوب يكحلّو عين عيل ، حطيتهم على بعض فى البراد وسييتهم
ع الجمر ، وكل شويه انده :

يا نبويه ،

يابت .

آه يابنت الواطي ، هربتى على فين ؟

قعدت حيران ، أعد السنين وليّام ، وحبتين وقادت فى جتتي النار

- يا خرابي ، يا اهل البيت ، يا حسن ، يا حسنه ، يا زنه ،
ياولاد ، نبويه هربت . نبويه هربت ، وانتو هربتو . وفُضِلْتُ اجري
زي المجنون في البيت ، ألف وادور ، حوالين نفسي ، في الإوض ،
ع السطح ، ماخَلَيْتْش مطرح ، البت فص ملح وداب .
الله يجازيكى يا شيخه ، دوختينى وراكى . سنين ويّام وانا
متغمى، سنين ويّام وانا ساكت ، سنين ويّام وانا يَلَف .
سنين وانا باعشقك يابت !

.. نسيت ان البيت فضي !

فضي من زمان ، من يوم ما راح كل واحد منهم في حته
وسابوني .

بقي أنا ، اللي ياما دوخت بنات ونسوان ، أقع الوقعه دي ؟
فينك يا حُسَّته ، إنتي وزَّته ، فين البيت ، والعيال واللَّمه ؟
هجيتو ، وسيتوني ، هجيتو يا ولاد الكلب ؟

«وفضلت قاعد لوحدي ، بين سبع ببيان مفتحين عليك ، تفرقش
ملح العين والعافيه ، وتفك زراير القميص من العرق ، وصهد
الذكريات اللي ابتدى يقب عليك فجاءه» .

آه يابنت المجنونه ، إتلمى ، واتركنى على جنب .
آه منك يا هايجه .

دا من حلاوة الروح .

* * *

آخر ما زهقت

دعبت لى على سيجاره ، وفى الآخر لمت لعقاب البايته ،
ولقيتها ، وقعدت اشرب .

- بقى يابن الرضوي ، انت مش عايز تسبب البيت وتغور ؟

- اغور فين بس يايا فرج .

أدينى قرشين ، وانا امشى . اشوف اوضه ، ولا خرابه ، اتأوى
فيها .

انا وحيد ، لا معايا مال ، ولا مره ، ولا عيال ، ولا حتى شغل
- أنا كنت ولدتك ونسيتك ؟

فارقنا بقى ، حتتين العيال كبرو ، ونفسى المهم . نفسى أهد البيت
وابنيه ، نفسى افرح بيهم قبل ما موت .

- وانا يايا فرج ، اروح فين ؟ أهون عليك . أترمى فى الشارع
بعد العمر ده !!

- الله ، اللى خلقك يتكفل بيك ياخى . هو اللى هيرزقك .

- منين ؟ وانا لا ورايا ، ولا قدامى

- إيه .

دور على أيتها مطرح ، هو انا وكى أمرك .

وبعزم ما بيه راح شايِل حَتِّين العَفْش ، هِلا بِيلا ، ورامِيهم بَرّه .
يومها انا لا خُفْتُ ولا اتَهَزَيْتُ . بالعكس تَبَّت وعاندت ، وقلت
له : أعلَى ما فى خيلك اركبه . الله يخرّب بيتك يا با فرج ، خلّتنى
سَقَّت العند ، وهو ساق علياً طوب الأرض ، انى اسيب له البيت .
وعنها وراح فى ليله ، مسلط عريه نقل كبيره تدخل الشارع ، وتعمل
إنها بتدِير ، وتروح خَابطه البيت ، حتّه خَبَطَه ، موقعاه . تَبَّت
وعاندت ، وقلت له : مش هاسيب . أصل الخوف ده شىء كبير ،
كبير قوى ، وقد ما نخاف يكبر . ورجع لى تانى ، وتالت ،
وعاشر ، ولما طهقت منه ، قلت له : هات عشر تلاف جنيه ، جنيه
ينطح جنيه ، وانا اسيب . الله يخرّب بيتك يا با فرج ، ودنى بِتَوْش
من ساعتاه .

- خلاص ، خَلِّيك ، وخَلِّى البيت . يارب يقع على دماغك .
- على دماغى ، على دماغك ، مش هاسيب . تعرف لو قربت
لى ، أو سلطت عليا حد ، أو عملت حركاتك الهايفه اياها ، هاروح
فيك فى داهيه . هاموْت حد من عيالك . هاموْتهم كلهم . وياروح
ما بعدك روح .

... الدنيا برد ، والهوا يبوش فى ودانى .

وصوت العيال بيرن ، والأرض بتغطس بيا وتقب ، والحيطان
بتقرب علياً . بآينك يا طوبه قاسيه السنه دى ! ولأنا الى عجزت ،
تعالو ، تعالو ، قربو يا عيال ، دقونى :

يا بختك يا ابو بخت

كوم مين ده

كوم السلطان

فيه إيه

خوخ ورماني

هات حتة

القطه كلتها

والقطه

ع الكوم لخضر

والكوم لخضر

عند البيت

والبيت

عايز يناع

والبياع
واقف ع الباب
والباب
عند النجار
والنجار
عايز مسمار
والمسمار
عند الحداد
والحداد
عايز بيضه
والبيضه
عند الفرخه
والفرخه
عايزه قمحه
والقمحه
عند الفلاح
والفلاح
عايز مفتاح
والمفتاح

عند البواب
 والبواب
 واقف ع الباب
 والباب
 قافل ع البيت
 والبيت
 عايز بنباع
 والبيع
 واقف واقف
 مستى اللى خايف
 والخايف
 مالوش مكان
 ولسانه
 اخرس جبان
 - بس ، بس -

دايره كبيره قوى ياواد ودخلتها ، وياريتك قادر عليها . إلا ،
 ميقاش فيك ، ولا وراك ، ولا قدامك . ياريتك يانبويه سمعتى
 كلامى ، ولا هجيتيش ، وخليتك جنبى ، مش كان زماننا بندقى
 بعض . ياترى انتى فىن يابت ، وحشائى .

النار انطفئت ، والشأى خلص ، والجيب ماعدش فيه .

يا خسارتك يا واد فى البهدله . هيه يلا ، نثلف وننام .
 بتبص للسقف وتبحلق بعينك ، بقى لك سنين ويَّام بتستنظر . لا
 البيت انهـد ، ولا انت فُوتُه . إيه اللى مخلِّك متمسك بيه ولا بد ،
 تكونش يا واد ناوى تورثه ، ولا فكرك يعنى اللى راح ممكن يرجع .
 نبويه والهيصه ، والعيال ، واللَّـمَّه .

* * *

فى يوم من ذات ليّام ، كان فيه :

فران ، وصياد ، وجزماتي، وحُسْنَه ، عندها عيال (نبويه ، وبطه، وعصفوره ، وحسن وسعيد). جوزها طول النهار فى المجارى، بيبعد. الوليّه حلوه ، وعمّاله تُزْرَبُ فى عيال . الله ينور عليك ياواد يا علوه يافران ، ياجوز زَنّه ياوسخ ، مراتك زَنّانه ياواد ، والعيال ولاد حُسْنَه طَلَعوها عليها (ياسوده ياكُودَه ياحقّ الهباب ، يازَنّه يا عفشه يابوز الغراب) حُسْنَه بيضه وحلوه . الله يخرب بيتك ياراجل .
ليه هريان ؟ تعالى شوف عَلَوَه هِيَهْل على مراتك ، كل يوم يضرب مراته علقه سخنه (نامى يابنت المركوب، زَرْقَه ، ومنيلَه بنيله ، حتى بناتك زُرُق ، منيّلين زُرُق) . يا خيتك يا عَلَوَه حتي اسمها لزق فيك، والعيال ولاد حُسْنَه طَلَعوها عليك (عَلَوَه جوز زَنّه راح ، عَلَوَه جوز زَنّه جه) .

الستين بتمر ، وكإن الكلام ده حصل امبارح، وكل ما افكره ، افطس علي روجي من الضحك، يوم ما عَلَوَه زَنق زَنّه على الطرمبه ، ودب بوزها فى الحوض، وفضلت تبقلل ، لحد ما لحقتها ، كات هتفطس. اله يجازيك يا عَلَوَه ، كنت هتموتها . وهياً تصرخ وتولول (يا وَاكَل نَاسَك ، هُوَ لَمَّا يقوم ، يقطع الهدوم ، الله يجازيك يا واد

عمى (يومها اتلمينا عليه ، ورحمناها من علقه ، وفضلت تشكى
وتشاكى. الجو برد قوى، والوقت سرقنى ، والفجر قرب يطلع .
طوبه السنه دى شديده ، والحيطان خربت، ولاعدش نافع دهان ولا
اسمنت . كل السنين دى فاتت ، ولساك قاعد مطرحك ، تفرقش
ملح العين والعافيه ، وتصب الكلام فى بحر مالوش قرار . وحيد ،
ووجدانى، ولوجدك ، آه يا انا أمأ اقوم ، اجيب بطانيه اتلف بيها . آه
يا رجلى . رجلى وقفت ، بايى عجرت ، مش قادر اتحرك . لساك
بتعافر ، ويستنظر يا بن ستيه . آه يا رجلى آه .

* * *

البيت واسع وكبير يجى فدان .

وبالعافيه حطيت الحجر الثقيله ورا الباب الكبير، تقابلك أول أوضه
 (أوضه أم رامى) قصادها بالظبط (أوضه بدر) تخش حبتين، تلاقى
 حوش كبير فى وسطه طُرمبه خربانه ، دايمن حوضها مليان ميه منته،
 والعيال طول النهار يحدفوا فيه طوب، وعاملين سناتير خيط فى طرفها
 قولاحه، مسمينها صياده . وطول النهار يحدفوها، قال ايه بيصطادو
 سمك . جنب الطرمبه (أوضه زنّه) وقصادها (أوضه صغيره) يقولو
 كانت كابنيه قديم واتردم، دايمن مسكوكه ، مليانه كوابيس، اللى ينام
 فيها لوحده، تطلع عليه الكوابيس تخنقه، ويفضل ينده على حد
 ينجده، لو حد سمعه يبقى نجا، ماحدش سمعه يفضل يرفس ،
 ويرفس لما يصحى لوحدّه ، ويبقى عرفه مرقه، ونفسه مقطوع ومش
 قادر . ويقولو كمان كان ساكن فيها واحده وبنتها، ماتو جواها لحد
 مانتو ، وريحتهم فاحت، ويمكن عشان كذا دايمن اللى يقرب من
 الباب يشم ريحه هلّه عليه، تخش حبتين على جنب تلاقى (أوضه
 حُسنه) كبيره وواسعه، أكبر أوضه فى البيت، ولها منور ، كانت
 حُسنه مأجراه، تنيم فيه العيال فى الصيف. قدامك بالظبط ، ويعرض
 البيت (أوضه لوزه) مرات عبده، أوضتها ليها شباك ع المنور ، والعيال

ولاد حُسْنَه ، كانوا دايمن يبصو عليها منه . تحوّد يمين ، من بعد أوضة
لوزه ، تلاقى طُرقه فى آخرها أَوْضَتِي والحَمَام اللى مالوش باب ،
وعشان الواحد يروح له لازم يفضل يتكلم بصوت عالى من أول
الطُرقه ، أو يتنحج ، أو يكُح ، لو حد رد يرجع ، ما ردُش ،
يكَمَل ويخُش . وكانت دايمن الميّه ملياه ، وعشان كذا بنحط قاليين
طوب ، وآخر مازهقنا عمّالنا سقّاله من الطوب نمشى عليها ، صف
طويل فوقه لوح خشب ، يبقى الواحد ماشى والميّه حواليه ، كأنه
هايعدى النيل ، وباسلام لو حد حَبّ يروح الحمام بالليل ، وأصلن
البيت مافهوش نور ، تبقى حُوسّه ، يعنى لازم الواحد ، يشمر
هدومه ، ويمسكها بسنانه ، ويفضل يخوض فى الميه ، وهو عمّال
يقول يا ساتر استر يارب . إن عدّى ووصل للعين بالسلامه ، الفرحه
تُسيه وهو راجع ياخذ بأله ، فيروح واقع ، مدبوب على بوزه ،
وتبقى ليله ، يفضل يصرخ ، ويصرخ ، وينده ع حد يتجده . الكل
يخاف ويكُش ، لحسن تكون العقاريت اللى فى الأوضه الصغيره
طلعت وهيا اللى بتنده . وفى يوم كان سراج ، جوز ام رامى راجع
باليل سكران ، وحالته نيله ، دخل يعمل زى الناس ، وهو عمّال
يغنى ولا على بأله . (زَمَر ، كركر ، فرويكا . طبل ، طبل ، مزىكا ،
حته راجل انتيكا) . لقي الباب راحل داخل ، وكسَل يتنحج أو ينده ،
ووقف بطرطر ، اتارى زَنّه قاعده ، هو ماشفهاش ، لكن هيا عرفته ،

وفضلت قاطعه نخّس ، وسابته لما خلّص ، وفي الآخر ، راحت
 قائمه ، ودأبه بوزه في عين الكابنيه من سكات ، وراحت جاييه لوح
 الخشب وصدرته ، وحطّت وراه قاليين طوب ، ودخلت أوضتها ،
 وفضل صاحبنا يقلل ويعافر ، لحد النهار ما طلع . ودخلت حسنه ،
 لفته مزروع ، زرع بصل ، وكان خلاص بيغفر ، وقرب يفتس ،
 راحت مطلعاه ، وفضلت تصوّت ، تصوّت ، لحد البيت كله ما
 صحى . وقفت زنه تضحك ، وقالت : عشان يبقى يحرم يشخّ ع
 الملايكه وهو سكران ، ما هو كل مكان وله ملايكته اللى حارساه .
 جت حسنه جنبها ، وراحت زغداها بكوعها ، وقالت لها : حرام
 عليكى يا شيخه ، الراجل كان هايفطس .

- ياريتّه كان فطس ، كنا استريحنا منه ، السكرى أبو شخّه ،
 الراجل واقف يعمل زى العيال من ع الباب ، ولا اختشى ولا خلا
 عنده دم . طب يقول إجم ، دستور ياسيادى ، أعوذ بك من الخبث
 والخبائث ، يعمل أى حس ، يقوم اللى جوه يعرف ، فيقوم ، أو يلم
 نفسه ، أو يرد عليه ، أو يخلّى عنده دم ، ويبعد لحد لآ اللى جوه
 يخرج ، مش يعمل زى العيال من ع الباب . سمعها سراج من هنا ،
 وراح فاق ، وقام واقف على حيله ، ما هو عرف ان هيا اللى عملت
 فيه كده . وقف وعينيك ماتشوف إلا النور ، قعد يزعق ، ويهلل :
 يا مرّه يا بنت الكلب . كنت عايزه غوثينى . الله يخرّب بيتك ، يا

زَنَّهُ ، يا سُوْدَه . انتَ فِين يا عَفْش ، يا جَوَز العَفْشَه ، لو كنت راجل
اطلع لى بَرَّه ، وانا اَوْرِيكَ . هِيَّا شافته بيردح لها ، راحت قالعه
الشيشب البلاستيك اللى فى رجلها ، وطارت وراه . هو يجرى ،
وهيا تجرى وراه ، ويصرخ زى العيال . وينده على مراته ، إلحقينى يا
صباح إلحقينى يا مَرَّه ، وزَنَّهُ تطير وراه :

- انا عَفْشَه يا عَفْش . اُمَّال ، لو ماكتتش عبر الدنيا كلها فيك
كنت عملت ايه ؟ أعور ، ويعين إزاز ، وأصلع ، وصغير ، وقد
عقله الصباغ ، والواحد تَكْسِرْك على ركبته ، ولسانك زفر وعازير
قاطعه ، بتب الدين ع الصبح ، يا نجس ، يا سَكْرِي يا ابن الكلب ،
والله لا أَوْرِيكَ ، هاموَتِكَ وارِيح الدنيا مَنَّاك ، عيني عليكى يا ام
رامى ، انا عارفه بتنام معاك أزاى ، يا زَمَر الكلب ، والله لا
أموتك ، واكسب فيها ثواب ، ورايحها منك .

مرات سراج شافت زَنَّهُ ، وهِيَّا عَمَّالَه تَلَف ورا جوزها ، وهو
يدخل أوضه ، يخرج من التانيه ، ويجري قدامها زى الفار ، وكل ما
تطوله ، تدبيله بالشيشب على دماغه ، والعيال واقفين بهيَّصو ،
ويسقفو ، راحت خالعه الشيشب اللى فى رجلها وطارت وراها وكل
ما تطولها تديها بالشيشب على دماغها . العيال ولاد زَنَّهُ شافو امهم ،
ومرات سراج بتجربى وراها ، طلعو هما كمان يجرو ، ويحدفوها
بالطوب ، وولاد سراج شافوا كدا ، طلعو يجرو همأ كمان وراهم ،

وَتَنَّهُمْ يَجْرُو وَرَا بَعْضُ لَحْدٍ مَا خَرَجُوا الشَّارِعَ .

وَقَفْتُ حُسْنَهُ تَضْحَكُ ، وَتَخِيطُ كَفَّ عَلَيَّ كَفَّ . وَتَقُولُ لِي :
شَوْفَ يَا وَحِيدَ يَا ابْنِي ، هَمْ يَكُونُ وَهَمْ يَضْحَكُ . صَدَقَ الَّتِي قَالَ
مَجَانِينَ صَحِيحَ ، عَقْلَ صَغَارَ ، مَهَاوِسَ . وَدَقِيقَتَيْنِ وَتَلَاقِيَهُمْ بِيَاكُلُو
فِي طَبَقٍ وَاحِدَ . الْعِيَالِ وَلَادَ حُسْنَهُ شَافُو كَدَا وَطَارُو ، يَشُوفُو
الْأَخْيَارَ ، وَكُلَّ شَوْيَهَ عَيْلٍ مِنْهُمْ يَدْخُلُ وَيَحْكِي الَّتِي حَصَلَ . وَالْوَادِ
سَعِيدَ يَجِي فَرَحَانِ وَمُظَاطَطَ .

- زَنَّهُ مَسَكَتَ زَمَرَ ، وَضَرَبَتْهُ عَلَيَّ قَرَعَتْهُ لَغَايَةً مَا جَابَتْ دَمَ .
- مَرَاتَ زَمَرَ مَسَكَتَ زَنَّهُ وَوَقَعَتْهَا عَ الْأَرْضِ ، وَرَكِبَتْ فَوْقَهَا ،
وَفَضَلَتْ تَدْبِيهَا بِالشَّبَشْبِ ، وَفِيْنَ يُوْجِعُكَ ، لَغَايَةً مَا سَخَسَخَتْ .

- خُذْ يَا سَعْدَ . خُذْ يَا وَلَهَ ، أَنْتَ يَا مَخْفَى النَّفَا .

- اسْكُنِي يَا أُمِّهِ ، أَمَّا أَرْوَحُ أَنْفَرَجَ .

دَخَلَ أَبُو سَعْدٍ مِنْ بَرَّةَ ، وَهُوَ رَاجِعٌ مِنَ الشَّغْلِ ، لَقِيَ مَرَاتَهُ طَائِرَهُ
وَرَا الْوَادِ سَعْدَ وَفَرْدَةً الشَّبَشْبِ فِي إِيْدِهَا . وَلَهُ وَهِيصَهُ قَدَامَ الْبَابِ .
وَحُسْنَهُ بَتْنَدَهُ عَ الْوَادِ أَنَّهُ يَرْجِعُ ، وَهُوَ مَشَى مَعْبَرَهَا .

- هُوَ فِيهِ إِيَّاهُ عَ لَصَبِحَ ؟

- اسْكُنِي يَا أَبُو سَعْدَ ، فَاتَكُلِي نَصَّ عُمَرَكِ . مَعْرَكَةُ سَبْحَانَ مِنْ

يَطْفِيهَا .

- إِيَّاهُ يَا بُوْزَ النِّحْسِ عَ الصَّبَحِ .

- دى زَنَّهُ ماسكه فى خناق ابو رامى .
- والله الراجل ده مهزأ نفسه مع انه غلبان، وييصعب ع الواحد .
- ايوه يا خويا غلبان، بس وقع مع اللى ما يرحم .
- زَنَّهُ رُخْرَه غلبانه ، بس لسانها عايز حَشُّه .
- أيوه ياخويا، وجوزها يا ما غلب ويَّاها ، لكن مافيش فايده، دا طبع يا ابو سعيد، والطبع بيطلع بعد الروح .
- يا حُسْنَه . فين الفطار، عايز انا .
- ايوه ، ايوه ، جايه أه .
- فين وفيين ، دخلت زَنَّهُ، والعيال ، بعد ما الشارع اتلم عليهم، والنار هذيت . كان ابو سعيد قاعد قُدَّام أَوْضَتْه ، ييفطر ، وانا معاه، وحُسْنَه بتخدم علينا . تحطُ العيش ، وتغسل الفجل والجرجير . راح ناده :
- تعالو يا اولاد افطرو ، واخزو الشيطان، تعالى يازَنَّهُ ، تعالى يابو رامى تعالو كلكم .
- جُمُ كلهم، وراحو قاعدين، العيال والنسوان :
- الشاى يا حُسْنَه . إعملى براد شاى كبير، وتَقْلِيه . نهاركم قشطه، افطرو .. افطرو . عيش سخن ، وجبنه قريش، خدو فجل وجرجير طازه، جايه معايا من القصر . انتو عمالين هنا، تتخانقو ، والرئيس طول الليل سهران، ربنا يعينه، أنا شفته . كان البكاپورت اللى

فى الجنينه طافح، ورحت أسلُكُه . بَصْ لى الرئيس من الشباك ،
 وضحك ، وشاورلى : (خلّى عنك) . يا سلام يا ولاد ، الرئيس
 ضحكته حلوه، تُرْدُ الروح، وتشفى العليل . ربنا يحميك ياربنا
 ياغالى . أمّا انا فرحان بشكل . وسمعتة بينده ع الجنائى ويوشوشه،
 وبعد شويه، لقيت الجنائى جى وفى إيده كوباية شاي سُخْنَه ،
 ويضحك ويقوللى : الرئيس باعِتْ لك دى . وادّانى سيجاره .
 تصدقو ، انا فرحت ، وحسيت انى عايز آخذه بالحضن ، وارمي
 نفسى تحت رجله، وفضلت ادعى له ينصره على مين يعاديه . لحد
 النهار ما طلع . وانا ماشى، بصّيت ورايا ع الشباك اللى كان واقف
 فيه ويبص منه، لقيته لسه صاحى، شاورت له بإيدى وحيته، قام
 ضحك وحيانى . وعند ما قربت من الباب لقيت الجنائى جاي يجرى
 بالشوط ، ويحط فى إيدى فلوس . ساعتها بس عرفت قد إيه ريسنا
 قلبه كبير ويحب الناس الغلابه .

- يالهو بالى يا ابو سعد ، إنت كنت عريان وانت نايم .

- إيه ياويله انتى فاكرانى باحلم، ولأ بنام أصلن فى شغلتنا الخرا
 دى . والله العظيم دا حصل ، وادى الفلوس كمان آهه .

- وخذت الفلوس ؟

- طبعاً يا زنه ، أمال كنت هاسيهم . حد يرفض حاجه مديها له
 الرئيس . إنتى كنتى عايزاهم يودونى فى داهيه . وعمرى ما هصرفهم،

هاخليهم كدا ، بركة ، طول ما انا عايش .

- قوللى بابا يطلعو كام ؟

- والله يا سعد يا ابنى ما انى عارف . ومش هاعدهم ، خليههم
كدا ببركتهم .

- طَبْ ما تدبني برزّه بابا ، وادى امى تعمل لنا محشى . نفسى
فى المحشى ، شفته فى إيد الواد ابن أم فىنى .

- يا ابن الطفسه محشى إيه . حد يصرف بركة الرئيس . دول
بركه ، بركة يا وكه .

ياه نَفْسُكُمْ دافى ، وكيان الكلام ده كان امبارح

لما رنه ظبطت جوزها ببصص على حسنه من شق الحيطه وهى عريانه
فى الطشت .

صرخت وهلت .

راح ماسكها وهابدها . . .

يابنت الكلب ، الحيطه هيا اللى محفوره ، يابنت المفحور . انت
ناسيه يامرّه إن البيت قديم ومُخَرَّب ، داب زيك ، وبقي كهنه .

- يالهوى يا جوزى . ياخراب بيتك يا زنه . نعزل يا ابن عمى ،
نعزل حرام ، دى نار جهنم ، وانا مش قادره ، عندنا ولايا يا واد
عمى .

- اسمعى انا دماغى متكلفه ، وله شارب لى حجرين ، ومش
عايزهم يطيرو من دماغى . دول ولايا دول ، دول معيز زيك . ابقى
دورى علي واحد اهيل جوزيه بناتك السود .

- يالهوى ، يالهوى . ياخرابى . ياناس ، ياخلق اشق هدومى ، يا
حسّه يا حراميه ، يا بنت الكلب ، ياللى جوزك هربان منك ، كل
يوم تُحكى وتُحكىكى لمن يا مرّه يا بايطه ، ياللى من غير راجل .
ياخرابى ، جوزى اتهيل .

- يامرّه نامى وانخمدى، الفراخ نامت، الدنيا ليل، والصوت
بيسرى. بطلّى هيدع الحيطه .
- عايزه اسمعها ياخويا ، عايزه اصحّيا . بنت يا حُسنه اسمعى،
اصحى، قومى .
- الله يخييك مرّه . مالك يا زنه . مالك . مالك يا اختى ،
نامى .
- ملّتى وملّلتى يا حُسنه . عامله لك شق فى الحيط ، عشان
جوزى، يبص عليكى ، بيصّبصلك يا اختى .
- جوزى ابو عيالى ، راجلى ، واذ عمى ، عينه منك يا مرّه .
- بس يابت جاكى خايط ، نامى ، وقولى يا مسّا .
- هه . . مش مصدقه يا مرات الهريان . طب لفّ وتعالى ،
تعالى بَص ، بَصو ياولاد، ياولاد كلّكم ، تعالو بَصو وانفرجو .
- آه يابنت الفُضحيه، لمتى البيت والدنيا ليل ، والناس نامت .
- تعالو بَصو ، قربو ، جوزى اللى قاعد ده ، بيصّ علي بنت
الكلب دى ، من هنا، شاقّين شق فى الحيطه ، وبيصّو لبعض .
- متفقين علياً يا غجر . هه وادى شعرك آه . يانارى، لازم اكل
بطنها، اكلها اكل. هو قاللى بطنها حلوه، هاتوها، هاتوها بنت
الرفضى دى .
- خلاص . خلاص بقى ياولاد، سيبى يازنه شعرها ، حرام

عليكى، إخرؤ الشيطان يا ولاد، يا واد يارامى تعالى سلك معايا يا واد ، أو ائذه عمك وحيد يسلك معاك .

- إوعى يا خالتى أم رامى كدا وسعى ، وسبيبنى عليها ، إيه يا زنه يا شطه ، يا سوده ، أمى مش كده .

- ايه دا ؟ ودى مين ، مين اللى بتتكلم ؟؟ والله القوالب نامت ولنصاص قامت . تعالى يا ست نبويه ، تعالى يا بنت الهربان ، خشى يا بت فى عبي خشى ، ما هو اللى اختشو ماتو . أمك كل يوم بتستحمى لمن يابت؟ وأبوكى فين ؟ هربان ليه وساييكم زى الكلبه وعيالها ؟

- وانت مالك يا زنه ، يا سوده ، يا عفشه ، أمى حلوه ، مذكوله ليه ؟ مفروسه ليه ؟ فولو يا ولاد :

يا سوده يا كوده

يا حق الهباب

يا زنه يا عفشه

يا بوز الغراب

- يالهوى . يا خرابى ، حوشوهم عنى يا خلق ، الوليه وعيالها بيضريونى . ياناس ، يا علوه يا واكل ناسك ، ياسى وحيد ، حوشهم عنى يا ابو عيالى ، حوشهم يا واد عمى .

- واد عمك دلوقتى ، وانت عامله لى جرسه وفضيحه . وانا مالى

خَلَّيْهِمْ يَأْكُلُو مَصَارِينَ بَطْنِكَ .

- بس يا زَنَّهُ بس . بس يا حُسْنَه بس . بس يا ولاد حرام عليكم . الولِيَّه هتموت يا علُوَه ، وانت قاعد تتفرج .

- سبيهم ، يَكْشِي يَقْطَعُوهَا جَتَّ ، ويَخْلَصُونِي منها ، المَرَّه ام لسان زِفَر دى ، وآدى الباب ايه . تعال يا واد يا حسن حُطَّ الحجر ورا الباب . اسمع يا واد يا حسن ، لو قدرت تَخْلَصَ عليها ، خَلَّصَ عليها .

- ياخويا يا قلبك . أُمَّال لو ما كُنْتَشِ جايه مَصَارِينْهَا مِنْكَ ، كُنْتَ عملت ايه ؟

- يا ام رامى ، هَيَّا دى فِيْهَا مَصَارِينَ ، دى ناشفه . دى فِيْهَا لسان زى الكرباج ، خليه بقى ينفعها ، أيوه يانبويه أَدِيْهَا ، أَدِيْهَا جامد .

- كفايه بقى يا اختى فرفرتى ، والدنيا حر ، خلاص يا حُسْنَه قلبك ابيض . صلِّ عَ النَّبِى . صلِّ عَ النَّبِى ، واخزُو الشَّيْطَان . دا الشَّيْطَان شاطر يا ولاد . قومى يابِت يَابِطَه ، امشِى جنب الحيطان ، فى الشارع ، ولَمِّى لى شوية شراميط ، وهاتِي خَرِيْة كَلْب ناشفه . وانت يا واد يا حسن هات شوية ملح أَمَّا اَرْقِيْهِمْ ، اتَحَسَدْتُو والنَّبِى ، كل اللى رايح واللى جاى يقول البيت ده كله يد واحده ، كلهم اخوات . بياكلو مع بعض ، وينامو مع بعض ، حتَّى الولِيَّه ام رامى مرات زَمَّر

كانها اختهم، رَوَّقِي ياختى روقى . خُدَى يا حُسْنَه شَوِيَه المِيَّ دُول ،
 خُدَى يازَنَه اشربى وراها ، خُدو يا ولاد اشربو عشان تحبُو بعض .
 رَوَّقُو ، رَوَّقُو ، هِيَّا عَيْنِ واللّه ، والشيطان قَدِرْ عَلَيْكُمْ ، ضِحِكْ
 عَلَيْكُمْ وَقَسًّا فى وسطكم . واللّه لا من الصبح رايحه عند ولاد غيتَه ،
 وجايه منهم بخور، وعِرْق حلاوه ، وتقاوى رَجُلَه ، وماسحه البيت
 أَوْضَه أَوْضَه ، خَلَى العَيْن تمشى ، ويوم الجمعة لَبَّخَرَكُم ، وابخَرْ
 البيت والعيال ، واطفطق شَوِيَه ملح ، أُمَّالِ إِيه ، الشيطان سكن بيتكم
 ولازم يمشى . العَيْن فَلَقَتْ الحَجَر يا ولاد .

* * *

هو انا يا ولاد بّتحالا بحلاوتى .

ما اتم شافين ، وعارفين ، وقدام عنيكم . الراجل شقيان ليل
ونهار ، علي تلاته جنيه ، تلاته جنيه يا عالم يقضو إيه ولا إيه ؟
العيال ، ولأ البيت ، ولأ المدارس ، ولأ الهدوم . دا الواد المخفى
سعد امبارح واخذ خمسين قرش لوحده ، والواد حسن عايز شورت
للألعاب ، والمخفية بّطّه عايزه تروح المدرسه السنه الجايّه . ونبويه ،
بنت الحمارة ، الفحلّه ، طول النهار ، تنكش فى الزباله ، تلم صفيح
وإزاز وورق ، وتبيعه ، أهو بتجيب قرش ولأ قرشين ، وانا طول
النهار زى التور المربوط فى الساقيه ، من دى لدى ، عماله الف مش
ملاحقه ، اجامل دى ، اروح السوق لدى ، اخش عند دى ، واحده
الاقيا بتغسل ، اشطف عليها ، واحده بتعمل حبه محشى ، الف
معاها ، وكل دا ليه ؟ عشان طبق طبيخ بايت ، رغيفين ناشفين ، أهو
اطلع بايتها حاجه والسلام . دى مطاهره عيل اشيله عنها ، دى عندها
فرح ولأ سيوع أطبخ معاها . أهو أحتكش أى حاجه . طيب واللى
خلق الخلق إمبارح الوليه أم فينى اللى قصادنا طلبت منى أعمل لها
حبه كسكى ، جابت الدقيق والسمن وعملتهم لها . خدت يدوب
طبق وسابت الباقي ، قالت : عشان خاطر العيال . أهو ربنا بيدبرها ،

وبتقصيها، واهى ماشيه . ياولاد هو انا بتعاقب ، ولا بدل على
 حلاوتي . ما هو ذل، ذل انى اخدم عند حد ، لكن كذا اسمى
 بساعد ، بجمال، خفيف ، خفيف ، وبكرامتي بدل ما دى جوزها
 ييص لى ، أو دى تخاف منى ، انا بدخل بيوت كثير وقليل، الكل
 بيعترمنى، ويبساعدونى من تحت لحت ، جز شرابات ، حته
 كستور ، طرحه نص نص ، كله بينفع . وبعدين دا سابغ بيت اسكن
 فيه، دا انا ياما شفت من السكان وعمايهم، اللى تخبى جوزها
 وتك عليه الأوضه، واللى نضربه بالشيشب عشان شافنى، واللى
 تسرقتى، واللى تسبى . وبعدين ما هو كله على يدك يازنه . مش
 احنا فى كل بيت سوا ، ومطرح ما اعزل واروح ، الايكي ورايا ،
 ولا اللى بقوله غلط ؟ دى عشرة عمر ياولاد، دا من عمر نبويه الفحله
 واحنا سوا . تعبت قوى ، وجوزى طيب مش بتاع خناق ، اقول له :
 نقعد واللى مش عاجبه يشرب مـ البحر . يقوللى : ياويله أرض الله
 واسعه، واحنا خفاف، هو حليتنا إيه يعنى، حصيره ولحاف، ياللا
 بينا . ونلم هدومنا ونطلع . وبعدين ان كان على الحكهكه، اللى
 مزعلاكي يا زنه اتحككهكى . وقال على رأى المثل، إن خست عليك
 المؤنه ، عليك بالليفه والصابونه . هو يبقى فقر وجرب .

- يا حبيبتى يا اختى . حقك عليا انا يا حسنه، حقك عليا يازنه ،
 والنبي يا ولاد اوغو تزعلو ، واسكتى يا زنه الله يخليكى . انا قلت

انتو اخواتى ، وحبايى ، ونضلل على بعض . لقيتكم طيبين ، قلت
يا بت اقعدى ، ولما يشوف عيالى نايين وسط العيال ، افرح فى سرى ،
وأجى اخذ العيل من دول ، تحلفو وتحلفو ، سيبه سيبه نايم وسط
اخواته . عرفت معني الأهل ، وحببتكم . يا سلام يا زنه ، ليه عايزه
تفركشى اللّم . ليه شرانیه ، وطبعك حامى .

- خلاص يا ام رامى ، خلاص . هيا كدا ، سنين ويا م واحنا
معاشرين بعض ، لا هيا دى أول مره ، ولا دى آخر مره . هيا كدا
نارها قش ، تهب ، تهب وتصفى على مافيش . دى عشرة عمر .
وبعدين يا زنه ، انا ابص لجوزك ليه ؟

هو انا معدومة الجوز ! دا انا حتى عمرى ما حققت فى جوزك ،
عاشرنا بعض علي قد ما عاشرنا ، لكن عمرى ما رفعت عينى
واتحققته منه ، والراجل الشهادة لله فى حاله ، الله يخليه ويطول لنا
فى عمره ، كل يوم يقابل الواد حسن ويدى له خمس ترغفه ؟
ويدخل ، من غير لا حس ولا خبر .

- يا لهوى ، يا خرابى . خمس ترغفه يا مره كل يوم ، وتقولى
بينكم إيه !

- يوه يا زنه ، وحدى الله يا اختى بقى . انتى شبطه ، حرام
عليكى انتى شرانیه كدا ليه .

ما تهدى ، وتروقى ، خلى النار تهدا . يا واد يا رامى ، يا بت يا

أوفه . هاتوا الأكل يا ولاد . هاتوا عيش وملح خليتنا نغمس لقمتين ،
 خلى الشيطان يمشى . والنبي لنفطر مع بعض ، أنا لسه لحد دلوقتى
 ماكلنش وبقينا الضهر . إخزوا الشيطان واتلمو ، لحسن صوتنا طلع
 بره ، وزمانهم بيقولو يا ترى فيه إيه . وهما نفسهم يشوفونا واحنا
 بناكل بعض ، وعابزين يعرفوا احنا ليه متجمعين . آدينى سامعه صوت
 ام فى بنده من بره . يالله يا حسنه ، يالله يا زنه ، يالله يا ولاد ،
 كلو ، كلو باسم الله ، كل يا سى وحيد ، كل . الله اما اخزيك
 يا شيطان .

* * *

كانت ليله نكد .

بس الوليّه ام رامى ، دى وليّه شاطره ، قدرت تلم الموضوع
 بسرعه . آه ما هيا رخره مجروحه ، بس مش قادره تقول ، هاتقول
 إيه ، تقول ان جوزها ، هو راخر ، بيبيص على حسنه ، وديك النهار
 زنفته بيبيص عليها من خرم الباب ، ومطرح ما تروح عامل لها زى
 خيال المقاته ، فى الراحه والجايه ، وهيا مطنشه وعامله مش واخده
 بالها . ولما حسنه اشتكت لها منه ، قالت لها : لما تلاقيه بيعمل كدا
 ابقى دى بوزه فى حوض الطرمبه . ما هو عندها حق ، وليّه حلوه
 وصغيره ، ووشها الدم هيظ منه فظ . إيه دنيا . يدى الحلق للى بلا
 ودان ، الراجل هربان فى المجارى ، والرجاله هتاكل مراته اكل . قال
 يعنى انت اللى مش هتاكلها ، مش فاكر يا وحيد الكلب ، لما الواد
 حسن شافك مره وانت نايم على السطح ، وعمال تزحزح فى قالب
 الطوب ، وبتبص من سقف الأوضه ، ولما سالك قلت له : فيه جنه
 وقع منك ، ضحك وقال : يا عم هو انت حيلتك مليم احمر .
 يومها اتكسفت حته كسفه ، ووشك احمر ، بصيت لقيت الواد راح
 مطلع من جيبه سيجاره ، وولمها ، وقعد يشد نفس ورا نفس ، كإنه
 راجل كبير ، ويخبط كف على كف ، وقالى : ولع وطنش ، يكش

تولع ، وفضل يضحك ، لحد ما الواد سعيد طلع على صوته .

- اتو بتعملو ايه ؟

- الله يجازي شيطانك يا سعيد ، مش ناوى تبطل الدحلبيه دى .

مش تتنحج ، ولا تقول يا ساتر .

- يا ساتر مين بابا . انسى ، انسى ، وطنش ، طنش تعيش ،

تاكل قراقيش .

وراح خاطف السجاره من إيد الواد حسن ، ونزل هاتك يا نفخ .

إيه العيال كبرو ، وانت لساك قاعد ، تفرقش ملح العين والعافيه .

لساك بتستنظر . تستنظر إيه مش عارف ؟ الدنيا مست والجو برد . أما

اقوم انزل من ع السطح ، قبل ما الندى ينزل ، وبرد الفجر يقرص ف

كتافى .

يا سعد ، يا حسن ، يا ولاد ، انتو فين ؟

- كنت فين يا مخفى النقا انت وهو ؟
- أبدا يا امه ، كنا فى الطراوه ع السطح ، بتنفرج .
- تنفرج على إيه يا مخفى انت وهو ؟
- وانت مالك يا زنه . على فكره عمى علوه بيقولك : امك فى العش ولا طارت . وهو مش جاي الليله ، عنده سهر فى الفرن .
- قول له طارت . وكفايه امك هيا اللى فى العش ولسه قاعده ياابن حسنه . إلهى وانت جاهى تطير رقبتك ورقبته ، قادر يا كريم .
- بس يا زنه بس . إنشا لله تطير رقبة عيلتك كلها ، اما انا وعمى علوه لا . فاهمه يا سوده . انتي ناسيه ان هو اللى مسمينى سعد .
- وبعدين انت قاعده عندنا ليه ، مش انت اللى متخانقه مع امى الصبح يا زنانه .
- والله كبرتى يا غمله ويقالك لسان . كنا فى جره وخرجنا لبره يا سى سعد .
- بس يا واد اختشى ، جاك قطع رقبتك . آه يا مقصوف الرقبه ، قوم فز نام ، وانت عمال تحش زى الغنم ، جتك قرف .
- قايم يا حسنه قايم . ومترزريش كدا ، لحسن يطق لك عرق ،

واحنا مش ناقصين . كفايه العرق اللي طق فى السقف . انا شفت
عمى وحيد وهو بيص منه .

- الله يخرب بيتك يا جلاب المصاب . إيه اللي بتقوله ده .
- وحياة خالتي سعدته ام عمى علوه ، وانتى تموتى يا زنه . انا
شفته ، حتى اسألى الواد حسن ، ما هو كان ع السطح وشافه .
- بس يا فقرى بس . دا كان بيدور على جنه وقع منه . إوعى
تصدقى الواد سعيد ، دا خياص .
- أبوه يا حسن أبوه . عَرَّضْ عليه عَرَّضْ ، عشان ما قولش انك
كنت بتشرب سجائر .
- آه يا ابن المركوب ، يابو لسان فالت ، طب والله لا وريك .
- حوشهم يا مى وحيد الله ينجيك . حوشهم يا اخويا، العيال
ديكو ، مسكوف بعض .

* * *

والله العيال كبرو ومسكو في بعض عشائك يا حسنه

يا ترى بكره هايجرى إيه . يانبويه ، يابت ، انتي يا فحله ، اقفل
 الباب يا بت خلتنا ننام . فينك يا ابو سعد تيجي تشوف الفحولا اللي
 انت سايهم عليا . خلاص صحتي راحت وما بقتش قادره . يابت
 يانبويه . رحتي فين يا بنت حسنه ، ياللا .
 حطيت جنبى اليمين اتكلت على ربي العالمين .
 حطيت جنبى الشمال اتكلت على ربي الرحمن .
 العبد فى التفكير والرب فى التدبير .
 تبات نار تصيح رماد .
 اتكلت على الله .

ماكتشش اعرف ان في يوم راح اواجه حد بالشكل السافل ده .

الواد سعد باين عليه هيطلع واد واعر ، يلعب بالبيضة والحجر ،
اما الواد حسن ده هيليهلى زى امه ، على نياته ، يفهم حاجات كثير
لكن ما يقدرش يقدر خطورتها ، يتعامل بطيبه ، لكن سعد واد
ماجيتوش ولاده ، سابق سنه ، ويفهمها وهيا طايره ، إبليس زى ما
قالت عليه زنه . زنه وسعد ونبويه وسراج عجينه واحده ، عايشين
يومهم ، خراب يا دنيا عمار يا مخي ، لسانهم اطول منهم ، جواهر نار
قايده ، يطفوها بالحناق والزريق . لكن حسنه وام رامى ولوزه ، طيبين ،
بيصو لبعيد لكن مش قادرين يعملو حاجه ، لا قدامهم ولا وراهم ،
تحس المسكنه ف صوتهم ، لكن جواهر قوه جباره . أما حسن وابوه
وعِلوه ، دول طينه ثانيه خالص ، طينه إحيينى النهاردا وموتنى بكره ،
وياروح ما بعدك روح ، عايشين يرمو عصاتهم ويجرو وراها . كلهم
غلابه بيكملو عشاهم نوم . طب وانت ، انت يا ابن ستته العمشه ،
زى مين ، ومع مين ، ومن أنهى مله ، تقدر تقوللى عملت إيه ف
دنياك ، الزمان بيروح ويبجي وانت زى ما انت ، بكره العيال
هاتكبر وانت قاعد مطرحك ، تفرقش ملح العين والعافيه . . يا
سلام ، الليله قمره وحلوه بشكل ، وما يحلاش القعاد والسهل إلا ع

السطح ، تحس انك سلطان وانت مع نفسك ، لا معاك عيل ولا
 تيل. ولحد امتي ، هاتفضل كدا ، لا أهل ولا خلان، سايب نفسك
 للدنيا تشيل وتحط فيك . من تلميذ ، لصبي في مطعم، لقهوجي ،
 لبياع عصير ، كل ما تتزق تدور لك على شغله ، ولما القرش يجري
 في إيدك تسيبها وتحجى، زى اللى معمول له عمل . ما بتعمرش زى
 اللى مدعي عليك . الله يرحمك يا امه قولتها ، (هاتعيش لوحداك
 وتموت لوحداك يا ابن بطنى) . كان كل يوم ابويا يصيحها بعلقه
 ويمسيها بعلقه ، مع انها غلبانه وصوابها اتقرطمت من الغسيل فى
 البيوت . كان مفتري، ربنا يهده، هيا راحت وهو قاعد على تلها .
 ياما نصحتنى وقالت : شوف . بص لصوابك امك اللى قرطمها
 الغسيل ، وعينا اللى عماله تسح فيه ، ولا مية حنفية العمده .
 حاسب على نفسك يا ابن بطنى ، واعمل قرش ينفعك ، وبطل
 سرحه علي السيم ولعب الكوره . الله يرحمك يا امه لو كنتى
 عايشه، كنت اترميت فى حضنك ونهنت زى العيال . ياما نفسى
 الاقى صدر حنين يضمنى . الله يسامحك يا بابا تنك تقول : خش
 ياساقت ، اخرج يا ساقط . لما طفشتنى ، وهيا حزنت عليا ،
 وفضلت تسح من عينيها لما نظرها ضاع . وانا كمان سيبها ولا
 سألتش فيها . الله يسامح الكل بقى ، اللى راحو واللى قاعدين على
 وش الدنيا . الليل مسى ، والجو برد ، والندى قرب يتزل . أما اقوم

أخش العش وانكن، يمكن انام ، ولا السقف يقع عليا ياخذ أجلى .
 باين السجاير كمان خلصت ، ومفلس . ياه الدنيا بردها شديد ،
 والحيطان خربت، والهدوم ماعدتش تستر .

- مين ، مين علي السطح هناك ؟ انت يا فقرى لساك صاحى .
 - إوعي يا عم وحيد ، اما اربى الفالت ابو لسان عايز قطعه .
 - يا اخى بدل ماتريه ، ربي نفسك الاول ، مش كفاه زي
 الشحط ومش فالح ف المدرسه .

- إيه يا عم وحيد انت معايا ولا معاه ؟
 - انا قلبى عليك يا حسن ، هو ناصح وعارف مصلحته ، أخوك
 سعد ده تعبان ، الدور والباقي عليك ، ماتخيش خيبتى .
 - أيوه متفاظ منى إكمنى اشطر منه .
 - جتكم نيله ، شاده نيله ، جاره نيله ، اتو لتنين، ما اسخم من
 ستى الاسيدى .

- شفت يا عم وحيد البت نبويه الفحله ، طول النهار دايره ورا
 عربيات الزباله تنكش فيها .
 - أنا شفته والله يا عم وحيد ، الواد ابن ام لا لو البقاله ، كان
 عمال يضرب فيها ، وزانقها جوه البرميل، وراكب فوقها . ويتعيط زي
 الفحله .

- يهدكو ربنا . وانت عملت إيه يا مخفى ؟

- كنت بتفرج على الفحله وهو نازل فيها دب .
- يخييك ولد ، واذاى تسييه يضربها !
- ماهيا ماسكتتش ، قامت منفوضه زى المارد ، وراحت ماسكه فى خنقه وهات يا رزع فيه ، لغاية لما سيحت دمه .
- عقارم عليها . نبويه بت فحله مايتخافش عليها . الدور والباقي علي الخيخه حسن ، والواد رامى ماسكه من رقبته ونازل فيه خنق لما كان هيفطس .
- امتى حصل ده ياخياص .
- امبارح فى المدرسه ، كان راكب عليك فى الحوش ، ولولا انا واصحابى ، كان موتك .
- بس ، بس وانت معار وكذاب .
- أنا معار وكذاب يا فظيره بتعملها كل يوم قد كدا على السرير .
- تعرف يا عم وحيد العجل ده بيشخ علي نفسه .
- قال يعنى انت اللى ما بتشخس .
- أنا يا مصنن ، طب شم كدا هدىمى ، وشم هدىمى ، وشوف مين اللى ريحته صنان .
- بس ، بس ، انا نازل جاتكو الهم ، جوز بغال وبشخه .

دِبْ، دِبْ، دِبْ ...

- يا ساتر يا رب . مين اللى بيدب علي الباب الساعه دى ؟
- لازم حد عارف اتنا بناكل .
- قوم يا مخفى يا سعد شوف مين ؟
- وانا مالى ، هو مافيش إلا انا فى المخروب ده . طول النهار روح ياسعد، تعالى يا سعد .
- قومى يا مخفية النقا يابطه افتحى .
- لا يا اختى أنا خايفه، والدنيا برد .
- اقوم انا يا امه .
- مين ، عصفوره ، انشالله تكسى .
- اقوم انا مدام عجزتم، والعجز جالكم . حاضر ياللى ع الباب ، اصبر شويه . مين ، خالتي سعده . يا أهلا يا أهلا ، حمدا لله على سلامتك .
- الله يسلمك يا حسنه يابتنى ، كيف حالك ؟ أما فىن زنه والولاد؟
- تلاقىها نامت .
- هيا ام فشله نايمة تفشل لحد دلوقتى ، وكل الخطب ده

وما سمعتش؟

- روح يا سعد خبط على خالك زنه ، وانداه عليها .
- جابري الزاد يا خاله . غيري ريقك .
- تسلمي يا بتي ، انا فطرت ف القطر من بدرى .
- آهى زنه صحيت .
- أهلا يا خاله . شرفتي .
- يا ساتر ، مالك بتكلمى من غير نفس ، هو انا جاياه استعطى منك . دانا حماتك ، وخالتك ، ام البغل اللى قانيك . يعنى تقومى واقفه زنه لى لما تشوفينى ، تقفى على طرايط صوابك ، وتقبلى يدى كمان .
- يوه يا خالتي ، الدنيا نورت . وهيا تقدر ، وانتى الخير والبركه
- الله يبارك فيكى يا حسنه يا بتي . ويحلى لك دينتك . طول عمرك يا مرات ابني وانت كدا تسدى النفس ، ومقابلتك زى وشك ، عكره . آمال فين البغل اللى قانيكى ، وينه راح ؟
- جرى إيه يا خاله ، انتى جاياه تقولى ، يا شر إشر ، ولا بايته ف القطر تعديهم ع السبحه . قال يا قاعدين يكفيكم شر الجاين .
- قعدت عليكى حيطه يا بنت خيتى ، يافقره ، يا واكله ناسك .
- جاتها داهيه البطن اللى جانبك .

- جرى إيه يا خاله ، انتي قاطعه مشوار طويل عريض ، من هناك
لهننا مخصص عشان البقين دول . دا حتى الزياره اللى انتي جايها
تقيه عليكى .

- بتتاورى يابنت خضره ، كفايه الشيل اللى امك عماله تبعها .
الحق علماً وحشتونى ، جيت اشوفكم .

- يا خاله ، قاطعه مشوار يهد الجبل ، وليله سفر فى القطر ،
عشان تشوفينا ! شفتي النبى !

- آه يا عرة النسارين ، طول عمرك ولسانك ينقط زفت . عيني
عليك يا ولدى ، وانا اللى جايه مشتاقه ، وبايته اخبز فى الرغفان ،
وانضف ف الزقّر ، وقاطعه الطريق على ملا وشئى .

- معلش يا حاجّه . معلش ، هيا زنه كدا ، بس والله قلبها
ابيض .

- انتي اللى قلبك ابيض يابنى . دى بت خايتى وانا عارفها ، عمر
قلبها ما هايصفى من يتى . قدمها شوم من يوم ما خدناها ، وشها
يقطع الخميره م البيت . سلعوه ، وزى الحدايه ، سوده وجربوعه ،
الله يسامحه ابوها بقى .

بنت خضره خلفتها كلها شخايليل . والله ان الولد ما سمع
كلامى ، وانجوز غيرها ، وفرح قلبى بصبى ، ما انى عامله ولدى .
ولا يمشى فى جنازتى .

- أيوه ، اظهر وبان عليك الأمان . قولى بقى ان انتي جايه لكدا
جايه تجوزى المحروس .
- آهو عندك ، جوزيه ، واشبعي بيه .
- هو حيلته حاجه . قال اللى خدته القرعه تاخده ام شعر .
- روقى يازنه روقى واشربى الشاي .
- قومو ياولاد العبو بره شويه .
- صباح الخير يا حسنه .
- مين ؟ خاله سعده ، ازيك ، ليكي وحشه .
- اقعدى يا ام رامى ، وحياة دينك يا شيخه ، دى مره يقنيها
راجل ؟
- ايه يا حاجه ، آمال لو ماكتتش وليه كباره ، وعارفه الأصول .
- ومهما كان دى لحمك ، بنت أختك . والضفر عمره ما يطلع
م اللحم .
- وحياة الشدل ده ولا اطفحه ياولاد ، اني ما كنت رايدة بت
خيتى تتمدد ف طول ولدى ، وكنت رايدة بت مليحه ، دا ولدى
الوحيد ، بت يعبط عليها تملى الحفصن ، مش ناشفه ومعرقه .
- بس ، بس يا خاله ، ماحدش بيختار نصيبه .
- يا حسنه يابتي ، دا وحيدى ، وانا رجلى والقبر ، بدئ اشيل له
صبي ، طول عمرى كنت أدعى واطلب من ربنا عشر صبيان ، لكن

اقول إيه ، ربنا يهدى .

- أيوه كده ادعى لهم واتني نفسك طاهره . وآهى زنه شايله ،
ويمكن ربنا يكرمها .

- والنبى يا حسنه لو ربنا كرمها ، وجابت ولد ، لا روح لام
هاشم مشى ع القدم ، واعمل ليله لأهل الله ، واقول لها : يا
طاهره ، أنا وفيت النذر وجيت ليكى ع القدم ماشيه . واكنس
ضريحها بطرحتى ، وأقبل عتبتها ، وابات ليله عندها ، اسبح
واصلى . شالله يا أهل الله يا أهل بيت النبى ، وكنت اسميه سعد ،
على اسم ولدك الصغير ، حاكم انا احبه موت ، أصله واد زين ،
عفى واعر ، يحبني ، واحبه ، ربنا يخليه لك ويطرح لك البركه فيه .

ابو علوه لما مات الولد الكبير ، وجه علوه ، راح السيد البدوي مشى

من لقصر للسيد ، ربنا خلى الولد لكن هو افكره ، كان ضل ،
وكان سند ، اتهمجت عليه من بدرى ، وكان اخوه ابو بيخيه ، اللى
هيا زنه ، كان صغير قالو : يا داهية نيجوزك بيخيت . قلت : لا والله
ما اتمد فى طول راجل واصل بعد ابو سعد . سعد ده ولدى الكبير ،
وانا اسمى الحقيقى ، داهية ، والحماره اللى هناك دى اسمها بيخيه ،
المهم جوزوه خيتى الصغيره ، وقعدم معايا فى الدار . حاجيت على
ولدى كثير ، وشقيت اكثر ، كان لا ورايا ولا قدمى ، وزوج اختى
فقير ما يقدر على الهم ، ولا يقدر على شيل لحمال .

ربطت وسطى كيف الرجال ، واشتغلت ، خدت ولدى وهجيت
من بلد لبلد ، بلاد تشيلنى وبلاد تحطنى . اشتغلت فى الفاعل ،
كنت اشيل قصعة المونه كيف الرجال ، غيرت اسمى وسميت نفسى
سعده ، عشان ما خلى حدن يعرفنى ، وكنت كل ما شوف حد يقرب
منى ، اخذ ولدى واهرب ، شلت قوالح ، شلت دره ، صيفت قمح
فى الغيطان ، شربت البرد والمطر وشفت الشرد وشراويد الصيف ،
فى عز بوونه وفى عز الحر ، كت انزل الغيط ، واعبط حمل الحطب

ولا عشر رجاله يقدرم عليه . وإخرج من بيت لبيت ، عمرى ما
 عمرت فى مطرح ، لجل ما آخذ على حد ، ولا حد يأخذ عليا .
 حطيه فى عيني ، وما خلتيه يحتاج لصنف حاجه . ولما كبر وخضر
 شنبه ، قلت اجوزه ، وما فى أحلى من لحم الواحد ، عاودت البلد ،
 بعد سنين وسنين ، لقيت خيتى جوزها مات ، وانجوزت اخوه ، وكان
 فايت بخيته ، ومات اخوه الثانى وانجوزت الثالث ، خلصت ع لحوات
 وهيا لساها بحالها كيف الفرع . بخيته ما هيا شكل امها ، بخيته ،
 نشفانه كيف جدتها ، وطبعها ، وكأنها هيا . وبعد كده جاين تقولم ،
 ليش انا بدى اجوزه . معي حق ولا لاه ؟

- ربنا بيعت يا خاله ويرزق ، ويصلح الحال . اما اقوم ارواح
 السوق قبل العصر مايدن .

- فتك بعافيه .

- عافيتك معاكى يا ام رامى . اما اقوم آنى كمان الحق اصلى
 الظهر ، عن اذنك يا حسنه يا بتى .

ما حد خالى من الهم ولا قلوع المراكب .

الهم فى الدنيا مفرق ، يا حول الله يارب . الحمد لله ع الصحة .
 اما اقوم اصحى ابو سعد . الراجل نايم فى أوضة وحيد من امبارح ،
 انقلب زى الجمل مطرجه ، الراجل ييشقى يا ولداه ، لا اللى معاه
 مرتاح ، ولا اللى مامعاء مرتاح .

- يا اهل الله ياللى هنا .

- مين ؟ مين اللى بره ؟

- انا يا ام حسن ، يعني يعجبك كدا العيال ، ولادكم يسكوا الواد
 ويعدموه العافيه .

- اتفضللى يا اختى ، ادخلى . واقفه ع الباب ليه ؟ ادخلى يا ام
 فبنى ، بيتك ومطرحك .

- سالخيو عليكم .

- يسعد مساكى يا اختى .

- ما هو حرام كدا يا جماعه ، الولاد ، ولادكم مسكو الواد
 وهات فين يوجعك . بصى يا ام حسن يرضيكي كدا .

- يا حبيب امك يا ابنى ، مين اللى عمل فيك كدا ؟

- ولادكم . حسن وسعد ورامى كلهم ، كلهم .

- سالخير يا بنتى .
- مين خالتي ام علوه ، ازيك يا حاجه ، عاش من شافك ، والله ليكى وحشه . ازيك ، وازى حبايبك .
- حقلك على ، اقعدى .
- ولا حق ولا حاجه ، دول اخوات ، انا بس قلت اما اقول لكم عشان تأرطو على العيال شويه .
- قومى يا حسنه يا بنتى ، مدى يدك فى القفه ، وهاتى للولد فرقوشتين .
- لما تيجى زنه يا خاله .
- قومى بلاش عبط ، ولا اقولك ، اقوم انا .

* * *

مَسِيكِي بِالْخَيْرِ يَا لَيْلَةَ الْجُمُعَةِ ، يَا سِتَّ اللَّيَالِي .

مَسِيلِي عَلَى سَيِّدِنَا مُحَمَّدٍ

أَلْفَيْنِ وَتَسْعِينَ سَلَامِي ،

وَحَيَاةَ الْكَعْبَةِ الشَّرِيفَةِ ،

وَحَيَاةَ الرُّكْنِ الْيَمَانِيِّ ،

تَغْفِرْ لِي كُلَّ مَا طَلَعَ ..

مِنْ فَمِي وَمِنْ لِسَانِي ،

لِسَانِي سَبَبَ الْبَلَاءِ ،

وَفَمِي مِنَ الذُّنُوبِ أَثْمَلًا .

يَا بَاسِطَ الْأَرْضِ يَا رَافِعَ السَّمَاءِ

تَغْفِرْ لِي ، أَنَا كَثِيرُ النَّوْمِ ، وَقَلِيلُ الصَّلَاةِ .

- سَالِحِيخِرِ يَا أُمَّةَ .

- سَالَنُورِ يَا وَلَدِي . كَيْفَ حَالُكَ ، حَيْثُكَ الْعَافِيَةُ . اسْمَعْ يَا

وَلَدُ ، أَنَا مِنَ الْفَجْرِ مَبْدُرُهُ عَلَى أَوْلِيَاءِ اللَّهِ الصَّالِحِينَ ، هَاتِخْدَهَا جَوْلَهُ ،

وَهَادِعِي رَبَّنَا يَجْعَلُ اللَّيْلِي فِي بَطْنِ مَرَاتِكَ دَهْ وَلَدُ . إِنْ حَصَلَ خَيْرٌ ،

وَأِنْ مَا حَصَلَ ، أَنْتِ وَحِيدَةٌ ، وَطَاعَةُ الْوَالِدَيْنِ وَاجِبَةٌ ، وَأَنَا بَدِي

أَشُوفٌ لَكَ دَكْرَ قَبْلِ مَا أَمُوتُ ، أَحْنَا بَدْنَنَا نَرْبِي دَكُورَهُ ، فَاهُمْ يَا أَبُو

الشخايل . إيش قولك .

- زنه غلبانه يامّه .

- تروح تقعد جنب امها ، ما هيا أمات البنات يقعدو جنب بعض .

- يا ام . دلوك زنه تحيب الوكل ، ناكل لقمه وبعدين نفكرو .

- وكل ، آه يا ابن سغده يا واكل ناسك ، بذك تضحك على .

فينك يا شيخ سليمان ، الله يرحمك ، تعالى شوف ولدك عامل كيف الحرمه ، بده يسد خشمى .

-
- أبو حسن . يا أبو حسن .
 - إيه يا حسنه .
 - المغارب غربت ، والعشا قربت ، ميعاد الشغل ياللا .
 - يا سلام يا حسنه ، لحق النهار خلص ، ولا انتي عايزه تتخلصي مني ؟
 - واخلص منك ليه يا راجلى ، انا بس ، قلت تقوم تاكل لك لقمة ، وتشرب لك كوباية شاي . وتشوف علوه ماله . لحسن قاعد فى الحوش بين لعباب ، ومتنكد آخر نكد .
 - هيا وصلت ؟
 - دى امه .
 - أمه تنكد عليه ؟ هيا ماورهاش غير النكد ؟ هما الستات كدا .
 - الله يسامحك .
 - يسامحنى إيه ، ما وراكمش غير قلة الراحه ، هاتي لقمة ، واعملى الشاي ، وحصلينى بيه ، جاتكم الهم من يوم ما خرجتونا م الجنه ، واحنا فى نكد .
 - فين الشيب ؟ فين الاكل ؟ فين الشاي ؟ شهلى .

- والله ما حد عارف مين اللى خرج مين ؟ وبعدين جنة إيه اللى
ابو ظرطه بيقول عليها ، جنة امه ناعسه اللى طول النهار رابطته الشاش
على راسها ودايره تولولو فى البلد ، ولا جنة ابوه نفاخ المعيز . دا هم
مستنى اصحابه .

* * *

كنت عترة ، ومتدلع .

الله يخرب بيت ابوكى وابويا تمام ، جاحدين قوي (الفرن يا علوه
حافظ عليه ، اتجوزها وخده) آدينى خدتك . راح الفرن ، وفضل
الفرء . والله يابنت الكلب لا اتجوز .

- سالخير يا علوه ، مالك ، بتكلم نفسك ؟

- الشاى يا حسنه .

- خليفهم تلاته يا ام حسن . ازيك يا ابو حسن ، فينك يا راجل .

- ازيك يا سى وحيد .

- الله . . . الله مالك يا علوه ؟ ايه زرعتها قته طرحت بطيخ .

- لا وحياتك زرعتها زنه ، طرحت شخايل ، علي راي امى .

- ها . . . ها .

- أبوه كدا يا راجل اضحك ، اتسى الهم ينساك . ولع . . . ولع .

- خد الشاى يا ابو حسن .

- فين سعد يا حسنه .

- تلاقيه يتسرمح مع العيال فى الشارع . عايزه ليه يا سى وحيد ؟

- ابدأ ، يشوف لنا قولتين ع السطح ، نولمهم ، خلى القاعده

تسهل . أما انا جايب حته ، انما ايه ، هتمجبك قوى ، شم يا علوه

- شم ، صنف هاينسيك زنه وامك وشخاليلها .
- يا واد يا سعد ، يا سعد . هما اختضو فين ؟
- ولع . . . ولع يا راجل ، ولا يهملك .
- ايوه يا عم وحيد امي بتقول اناك عاوزني .
- اطلع لنا على السطح ، وهات لنا قولتين وروق المسائل .
- حالا . . . حمامه .
- يا ولد .
- قصدي فريره .
- جن مصور سعد ، انا باجه ، خفيف مش زي العجل الكبير حسن ، عامل زي الطوبه .
- وياريته فالج يا وحيد يا ابني .
- بكره يفلح يا ابو حسن ويجيب شخاليل .
- الله يحفظك ياسي وحيد دمك شربات . عن اذنتكم انا بقى عندي شغل .
- يا راجل حد يسبب ام حسن ويروح الشغل ، وبعدين النهاردا فيه حفله ، حبيك رشدى هيدع ، ويمكن يغني تحت الشجر ياوهيبه ، ولا يقول يا عرباوى .
- يا بختك يا عم ما هو حبيك انت كمان .
- يا عم اقعد دا انا حتي جيت حجاره جديده للراديو ، والمزاج

هيبقى آخر غرام ، ويمكن ييجى عمك سراج آخر الليل سكران طينه
 ويعمل زى كل يوم ، ويقف وسط الخوش ويشخر ويجعر ويسب
 ويلعن ابو خاش الدنيا . وتبقى ليله ويفضل ينادى يا صباح ،
 للصبح . وفى الآخر تطلع بالشيب وما ينامش إلا لما ياخذ اللطريحه
 التمام .

- كان الله فى عون هيعمل إيه ، العيشه صعبه ، وحمله ثقيل .
 تصبحو علي خير .

- وانت من أهله يا سيدى ، ابقى سلم لنا ع القصر واللى فيه .

الحفله يا ولاد ، الحفله

- يا زنه ، يا حسنه ، يا ام رامى ، الحفله ابتدت تعالو يا ولاد
ياللا.

- يا تري يا وحيد مين اللى هيغني الاول .

- يوه يا زنه اقعدى ، وانت هتسمى .

- اول اغنيه بختى ، والثانيه بخت ام رامى والثالثه حسنه .

إلا قوليلى يا ام رامى .

- خير يا زنه .

- جوزك ليه اسمه زمر ؟

- وده جوز ده ، جوز الندامه بعيد عنك . أهلى الله يجازيهم ،
كان عنده ورشه كبيره ، ورشه جزم ، وكان فوفور حيلة امه وابوه ،
وبتاع نسوان ، وانا كنت بطله ، حسنه دى ولا حاجه ، كنت بنت خير
وعز ، وحدانيه ، بت على سبع صبيان ، أبويا قال : تجوزه صباح ،
يساعدنا واهي تناوى ، البت كبرت ، واتدورت . وجوزونى عمك
سراج ، لاشفته ، ولا اعرفه ، كنت اسمع انه هلاس ، وبتاع يوه ،
بتاع كلام فارغ ، لكن قلت يمكن يتوب .
واتجوزته . اتجوزت سراج عشان الورشه . انا شفته من هنا ،

ولهاليب قادت في جتى ، قطعت هدمى ، وشعري ، وكييت جاز
على نفسى ، وصوتت وليت الدنيا. لكن كان سهم الله نفذ . أبويا
قال : احنا ماعدناش طلاق .

خلاص يا صباح ، امر الله نفذ يا بنتى . واهو عنده ورشه ،
وبكره تخلفى ، وربنا يهديكى ، وتعيشى عشان العيال . صوت ،
قلت له : يابا حرام عليك ، دا زمر ، انا اتجوز زمر ، هو ده راجل ،
دا زى قصب زمر ، دا مفهوش حاجه . يومها وبعزم ما عنده ، راح
مديني حقة قلم ، تولنى ، وقال لى : يابنت الفاجره . احنا عندنا
بنات تقول كلام زى ده . دا راجل وبكره نشوف بطنك قدامك قد
البطيخه ، وسابنى ومشى . ومن يومها ، لحد ما مات ماشفتوش .
خبو عليا . اخويا قاللى بعدها بشهر ابوكى مات . مات عشانك .
مشى يكلم نفسه ، وقع ، ابوكى وقع . كنت عارفه ان اخواتى صغار ،
وانا الكبيره وجه عليا الدور اشوف حالهم . وجه رامى ، وجت الفت
فى رجليه . رغم انه صغير وزى النوايه ، لكن ابن الكلب مفترى .
بُصى ، شوفى ، الجرح اللى فى رقبتي ده ، عشان مره رفضت .
ضربنى ببوز الجزمه . ومره مسك غطا الخله ، ونزل علي دماغى
ضرب ، ضرب . الله يخرّب بيتك . الله يخرّب بيتك يا زمر .
أتارى المخفى ، خسر الورشه فى القمار من مده ، وشغال فيها
ومخى عليا ، لحسن اسبيه . اسبيه واروح فين ؟ اتنين وامهم مين

يشيل همهم . بعدما عزلت من البيت ، وفضلت من بيت لبيت
وبقيت اشتغل معاه . اعمل له الجزم فى البيت ، وهو يقعد على
الناصيه يصلح نعل ، كعب ، يدق مسمار ، كذا ، طشاش ، ماهو
محدث بيتام من غير عشا .

- يا سلام يا ولاد الدنيا دى على قد ما هيا واسعه ، صغيره ،
ويتلف ، تلف ، وترجع تدى الواحد على قد ما زرع . أنا بقى
هجيت من ابويا وطهقت من المدرسه ونسيت الدنيا كلها ، عشانها .
- هيا مين يا اخويا .

- السيم .

- سيم . اسم النى حارسك .

- آه والله يا زنه . كنت غاوى وعائز ابقى زى فريد شوقى . شُفت
كل أفلامه ، هربت ، سرقت ، واتفرجت ، ولفيت ، وابويا ، ياما
ضربنى وقاللى : عايز تبقى فريد شوقى يابن الكلب : آه يابا ، هو
مش بنى آدم زى زيه . يومها ضحك وقالى : آه بس امه ، مش زى
امك يا ابن الكلب . هو ابن ناس ، وانت ابوك عربجى . وضربنى
بجلدة الحمار . يومها كان فيه فيلم جديد فى سيم عماد الدين ،
وعرفت إن فريد شوقى هيكون هناك . رحى وصدغى مشقوق ،
وقابلته ، وقلت له : انا بحبك يا سى فريد . وعائز اشتغل معاك .
قال بسخرية : تشتغل إيه يابابا . روح مدرستك احسن . يومها

رجعت زى اللى شاخخ على نفسه، والعيال زفوني في الشارع،
وقعدو يضحكو عليا، كانوا يسموني شجيع السبما . ما انا قلت لهم
انى قابلت فريد شوقي، وهاشتغل معاه .

أبويا ضحك وقال لى : ياشيخ اتلهى . روح دور لك على كتاب
امسكه، ولا شد لك عربيه، ما انت بغل آهه . ومن ساعتها ميقاش
يقوللى غير روح يا بغل، تعالى يا بغل . والعيال في الشارع سموني
بغل السرجه . طهقت، سيبت الدنيا، وسبت فريد، والسبما .
ودورت الف في الشوارع ليل ونهار، مره اشيل زباله، ومره ابيع
جرايد، ومره واحده خدتنى عندها، أثارها بنت الكلب نصابه،
لبستنى بيه، وحطت لى ريحه، واتحفلطت، وبقيت إيه، على سنجة
عشره . واتجوزتنى كدا وكدا . هربت منها . صحيح انا ممكن
اعاكس، أشتم، أحياناً اسرق عشان أكل، لكن اشتغل ميس،
بقرون... لا . أعمل معصيه . استغفر الله العظيم .

- انا حسنه حسان عبد المحسن حسن، من جروان منوفيه

وده أبو السعود ابن عمى، راجل ولا كل الرجاله . كان أبوه يطلق
مع جده عبد المحسن السوق، وينفخو المعيز . المعزه بعد ما تبقى
ناشفه وعدمانه، تصبح بقدرة قادر، مليانه، وساعات كانوا يبيعوها
على انها عشار . وجه ابن عمى زعل من أبوه وجده، وقال لهم : ده
نصب، ده حرام . ضحكوا، وقالو له : بس يابن نفاخ المعيز، روح

شوف لك معزه اتجوزها ، بس اوعى تكون مغشوشه . واتجوزته .
 وفضلت بلاد تشيلنا ، وبلاد تحطنا . كنت فلاحه وصغيره ولسه
 بحلاوتى . أول بيت سكنت فيه كنت عروسه ، جات صاحبه البيت
 خدتني الكوافير معاها . وعرف ، طلعتني من الكوافير بحاجب
 وحاجب ، وحلف ان خرجت من غير إذن ، لايبتنى البلد . كان
 يخرج الصبح ، يروح قافل عليا بالقفل ، ويحط الاكل والشرب :
 ياابن عمى ، حقلك عليا : خايف عليكى يا حسنه . البلد دى وعره ،
 واحنا أغراب ، ملناش فيها أهل ولا سند . إحنا فى غربه يا بنت
 عمى . سكت . ويوم ، وراه يوم ، وراه يوم . خلفت العيال .
 حسن وراه نبويه ، وراه سعد ، وراه بطه ، وهو ما شالش القفل ،
 إلا لما العيال ابتدت تكبر ، وتخرج للشارع ويروحو المدرسه . واحنا
 كبرنا والحلاوه انطفت .

- ولا انطفت ولا حاجه . وإن دبلت الورد ريجتها فيها .
 - الله يجبر بخاطرک يا علوه . ما انا بقول انتو اخواتى ، وعيالکم
 عيالى . انا معتبراکم أهلى وحبابى . واللى تشکة شوکه منکم ،
 کإنها شکتني فى قلبى .

- بس ، بس الحفله ابتدت . بتعملی إيه يا زنه ؟
 - ها اغسل ، مننا وسهرانين ، اغسل ، وأدى انتو مونسينى .
 - والله فکره اما اقوم انا کمان اغسل . يابت يا بطه ، يا

- عصفوره، شوفو نبويه فين تيجي تساعدني .
- يعني انا اللي هاتفرج عليكم ، أما اقوم انا كمان اجيب الحنتين
الى جوه واغسلهم زيكم .
- الصرُم ولع حالا .
- حسنه جرجرت الطشت ، وام رامي قرفضت علي العتبه وسحبت
الغسيل .
- جاتكم خيبه نسوان يعني هو الغسيل ها يحمض ، اقعدو اسمعو
وانسو الشغل شويه .
- يوه يا علوه طالما قاعدين وصاحيين ، آدينا بتسلى .
- الواد سعد ولع الولعه ، والليله هتلعلع .

* * *

هو حد خاب خييتي ، ولا شاف اللي شفته .

حد بيع الغالي بالرخيص ؟ عشان إيه والله ما انا عارفه . هو كان عبط ، ولا باينه كان عبط . خدتني خالتي لابنها . وخيرونى عماتي ، قالولي : تخدى ابن عمك ؟ ولا ابن خالتك ؟ قلت لهم اروح مصر . واتجوزنا . جابولي عماتي شئ وشويات . سرير نحاس يعواميد ، ولخافين حرير أطلس خالص ، وإيش ، وإيش ، ملولى الدنيا حاجات من اللي قلبك يجيها . حرير على تفته على رمش العين ، هدوم ، وهدوم ، لو فضلت البس فيها العمر كله ماتخلصش . ومضوني وكتبوني . وجات عمتي بعد الفرح بجمعتين ، وقالت لي : مبسوطه يابنت اخويا . قلت لها : مبسوطه يا عمتي ، ربنا ما يحرمينش منكم ، وازى عمتي صفيه ، نفسى اشوفها ، هيا عينها لسه تعبها ؟

ضحكت عمتي ندا وقالت لي : عمتك صفيه خلاص نظرها راح ، ومايقتش تقدر تمشي ، وانا بايني كمان قربت احصلها . الدنيا قدامى عماله تفتح وتقفل ، بالله بقى حسن الختام ، فتك بعافيه يابنتي وخلي بالك من روحك ما اوصيكيش ، انتى فى بلد غريبه وكل شئ فيها صعب ، وان غبت عليكى ، أو طولت ، متزعليش ، ابقى تعالى

انتي بقى ، فتك بعافيه .

عنها وراحت عمى ندا ماشيه ، خدها ابن عمى ، عرفت بعدها بشهرين ان عماتى جوزوه بنت خاله وقعد معاها فى البيت ، وان عمى ندا رخره نظرها راح . وقعد ابن عمى ع البيت وع الغيط . وانا فضلت سنين وسنين . ليام تحببى ، وليام توديني ، لحد ما ف يوم لقيت عبده جوزى راجع من الشغل يجري .

- مالك يا عبده ؟

- الحقى يا بت ، عماتك ، لتنين ماتو . همى ، شهلى ، نلحق الدفن ، همى يا بت يا لوزه . رمي الجلابيه على جتنى وطرت ، لقيت النعشين خارجين من الدار ورا بعض طابرين . والناس بتهلل وتكبر . «شهدنا لك ياختى ، انتي وهيا شهدنا لك . ربو اليتيمه فى دارهم ، عيشهم كانت شبعانه بيه الكلاب » .

أنا اليتيمه ، رقوبة البيت ، ربوني عماتى ، صفيه وندا . خدمتهم ، خدمة العبد للسيد ، بعد ابويا ما راح فى الفجرية وهو ييقص العنب بالمقص ، الكهروبا شدته . مات . امى حصلته على الاربعين ، وفضلت عماتى ، واحده منهم عاجزه ، والثانيه شوفها علي قدها . كبار ، ما اتجوزوش رغم اللى حيلتهم . تاني سنه وفى نفس الميعاد ، مات عمى بنفس الطريقه ، وفات قرنى . خدوه عماتى ، وبقي اخويا . وبقينا اربعة فى البيت اتنين يتم ، واثنين عاجزه . حلمت عمى صفيه بجوازنا . وأمنت عمى ندا عليها . بقو يقولولنا انتو

اخوات . ومن ورائنا يحلمو بجوزونا لبعض . مرت ليام وكبرت .
 وكبر قرنى . وجات خالتي فى يوم لزيارتنا - جوزها من ابشواى ،
 وهيا من طاميه - قالت : عايزه آخد بنت أختي لابني عويس . عايزه
 اودبها مصر واستتها . زعقت عمى صفيه وقالت : وى وى وى .
 ندى أرضنا وعرضنا ، لابن زاهيه يبرطع فيهم ، واحنا اللى ربينا
 وكبرنا . احنا عاوزين نجوزها قرنى ابن عمها . صرخت فيها وقلت
 لها : لا يا عمه . عايزه ازور الحسين والسيدة . ضحكت عمى ندا
 وفهمت وقالت : خلاص يا صفيه يا ختي لوزه اختارت ابن خالتها ،
 صحيح كنا عايزين نجوزها ابن اخونا . لكن هه ، هيا وكيفها . احنا
 طول النهار والليل نقوللها : قرنى اخوكى . ازاي أخت تتجوز
 اخوها؟ ! عمى ندا ناصحه ، عندها نظر . جهزوني ، وانجوزت .
 تانى أسبوع كان ابن عمى خاطب بنت خاله . بعد الاربعين . قلت
 له : فين حقى . ؟ ورثى فى ابويا ، وورثى فى عماتى ؟ ضحك قرنى
 وقال : ... حقا خديته . ولولت : إمتي ؟ كيف ؟

طلع لى حجه كبيره ، ووراني بصمتى . تنازل عن حقى
 ومستحقى . حقى فى ابويا وعماتى . رجعت بقفة بلح وقفص
 عنب . لقيت الأمير جوزى قاعد م الشغل . وفضلت ابيع حاجه ورا
 حاجه . ومن اوضه لاوضه ، لاوضه . لحد مارسيت هنا . شفتي يا
 حسنه ، شفتو يا ولاد . حد خاب خيبتى ، ولا شاف اللى انا شفته .

يا اختى .. خلى زكايب الهم مربوطه .

طلب انا اقول إيه ؟

وانا لا حيلتي ولا معايا . طلعتوني من البيت يا مولاي كما خلقتني . كنت متجوزه ابن عمى ، هو مش ابن عمى قوى ، مش عصب يعنى ، لكن كان قريبي من بعيد ، واحنا عندنا أى قريب من ناحية الأب يبقى عم . المهم ، امه كانت قرشانه ، وتلات اخوات بنات ، اصغر واحده فيهم من دورى . طول النهار غسيل وطبيخ وهريه ، وآخر الليل ماقدرش اتلم على جوزى ، ولا نقفل علينا باب . لو قفلت تبقى يا داهيه دقي ، امه كانت تشرشحلى «بتقولى له إيه ؟ بتصلتيه علينا ليه ؟ انت عايزه منه إيه ؟» اروح متقيه شرها وافتح الباب علي آخره . وياما أيام كتير دخلت علينا امه واحنا ... هو يشقى ويتعب طول النهار بره ، وانا اشقى واتعب طول النهار جوه ، وآخر الليل مانعرفش نتلم على بعض . تفضل هيا وبناتها قاعدين زى فرد قطع فى الأوضه ، ولا تقوم ولا تخلى عندها دم ،بقى قاعدين انا وهو نسقط فى النوم من التعب وهيا قاعده تحكى ، كلمه من الشرق وكلمه من الغرب ، المهم ماتسبناش الا لما تتأكد اتنا رحنا ف النوم خالص ومش قادرين ، وساعات هيا اللي تغطينا قبل ما تخرج .

ويا ويلي ، لو لبست قميص نوم ، ولا هدمه جديده ، تبقى يا داهيه
دقي ، تدور تنغمز هيا وبناتها . وإن جينا نص كيلو لحمه ، ولا
طبختنا حبة طبيخ ، يا طلت اغمس لقمه ، يا ما طلتش . ولما فاض
بيا الكيل ، قلت له : نخرج ، وآهي بلاد الله واسع ، ونعيش على
قدنا . يومها زغرلى وعملى فيها عتتر ، وقاللى : واسيب امى
واخواتى لمن ، انتي ناسيه ان مالهمش حد غيرى . قلت له :
نخرج ، ونبتع لهم اللى فيه القسمه ، وطل عليهم ، انا مش
حشاك . بس اعرف ائلم عليك ، ويبقى لينا باب نرده علينا . احس
انى مرّه ولما جوز . قاللى : بس ، بس ، نامى بلاش خيبه . ما
تقفلى الباب حد متعك ، وقام رايح مفروود ، وخبط الباب برجله ،
راح كسره . أوضه ، وصاله ، فيها سبع تنفار نايمين زى الفراخ ،
علي بعض ، امه وابوه وتلات بنات وانا وهو ، تبقى دى عيشه .
وكله كوم ، واللى حماتي ! كانت بتعمله كوم تانى . طول النهار
قاعده فى الشارع هيا وبناتها ، تجر شكل دى ، تلقح علي دى ، ما
هى فاضيه ، وعندها بنات تنفات لها بلاد . كل يوم عاملين لهم غاره
مع حد من الجيران . كانوا يمسكو الواحد من دول ، يدبوها العلقه ،
ولما تشتكيهم فى القسم . كانت حماتي تروح فكه ريع جنبه تعاريف ،
ورايحه علي القسم ، تبكى وتنهنه قدام الطابط . وتقول له : شوف يا
بيه ، استلفتهم من كل بيت حبه . دانا غلبانه يا بيه ، وبجري علي

تدفع الربيع جنيهه الغرامه من هنا ، وتروح طالعه من هنا ، وقبل ما توصل البيت تكون دقت المَرَّة اللى شكياها حته دين علقه ، تخليها تقول حقى برقيتى ، ويمكن تسبب الحته وتعزل . جوزها ! كان لا حول له ولا قوة ، غلبان ، مش قدها ، عارف انه لو فتح بقة بربيع كلمه ياخذ على دماغه . يسرح طول النهار ، بعريه ترمس فى الشوارع ، وآخر الليل يتلم علي جنب وينام . كانوا عاملينه فرخة البيت ، يلموله الى فايز منهم ، لقمه ناشفه ، حبة طبيخ بايت ، شوية رز فاضلين . مع إنه عمره ما كان يدخل عليهم فاضى ، كان دايمن يجى حضنه مليون ، إشى برتقان ، علي استفندى ، على لب ، هما ياكلو ويتشدقو ، وهو يضحك ، وميسوط . كان يصعب عليا ، لما اشوفه بياكل وهو بيتصعب ويمصمص فى شفايفه . بعد ما ياكل ، يشرب له نفسين من السبجاره ، ويحمد ربنا ، وان طلب كوباية شاي ، ييه !! تذله ، تقولله : ماتروح تشرب على القهوة ، ولا نام وريح جتلك أحسن . كانت هيا وبناتها ينامو على السرير ، وهو يغرش جنب الحيطه فى الزقر ، وينام . وكانو عاملين له طبق لوحده ، ولا ياكلش معاهم ، أصلهم كانوا بيقرفو منه ، ومسمينه أبو ريال . أصله كان دايمن حاطط مضغه ف بقة ، بتاعه كده كان يشتريها من البقال ويفضل يمضغ فيها ، هو صحيح كان يقرف ، بس ربكم

والحق، كان يصعب عليا قوى ، لما كنت اشوف الدمعه تفر من
عيني، ومسحها بكم جلاليته وهو ساكت . حماتي كانت مفترية ،
وبناتها أكثر ، وماكنش اطيع اشوف اللى بيحصل ده . ومره عى عيا
جامد ، تنه عيان بيه لحد ما مات . ماكنش بيشتكى من حاجه ، أكثر
من انه دايمن نايم ، وكان بيعملها على نفسه زى العيال الصغيره .
كنت فارشاله خيشه وحاطه مشمع زى العيال . كنت اشيله ، واقومه ،
وأكله بإيدى ، واغير له الفرشه والهدوم ، وهيا قاعده زى الباشا ،
تقوللى اعملى وسوى . ومره عيت ، جامد ، بايني من كتر القرف ،
بطني وجعتنى قوي ، ورفضت الاكل لحد ما اصفيت ، ما هو بقى
يعمل الثقيله رخره على نفسه ، كان خلاص برك وحط . وجت فى
يوم تغير له ، لما انا رقدت ، واسمعها يا اولاد بتضره بالشبشب ،
وفين يوجعك علي طيزه ، وتقولله : مش عيب عليك راجل شابب
وعايب ، وتعملها على نفسك زى العيال . انا سمعت كده ، الضرب
حز فى قلبى ، والدمعه فرت من عيني ، قمت جريت مع السرير ،
وخدتته فى حضنى ، وقعدت اطبطب عليه ، وابوس فى راسه ،
واقول له : حقك عليا بابا ، ماتزعلش ، انا اللى غلطانه ، امسحها
فيا انا ، والله بعد النهارده ماهاسيبك أبدا ، أنا اللى هاشيلك ،
واحطك ، واغير لك ، انشالله اكون باموت . وفضلت وخداه علي
صدرى ، وهو يعيط ، وانا اعيط . ليلتها يا اولاد لا نمت ، ولا هوب

النوم من عيني . وساعة الفجر فضلت ادعي له واقول : يارب والنبي
ياتشفيه ، يا تاخذه وترجحه من العذاب اللي هو فيه . دا حرام ،
حرام والله العظيم ، وراحت عيني في النوم ، إلا وشفت ، خير الله
اما اجعله خير ، سيدى ، أبو ابويا ، ما هو كان يبقى عم حمايا لازم .
شفتة لابس ابيض ف ابيض ، وفارد دراعاته ، وبيضحك ، وقام
واخذ حمايا بالحضن ، وقعد ييوس فيه ، وراح ضمه لصدره وواخذه
بين درعاته ، وقام ماشى . وانا انده ، وأقول له : رايح علي فين
ياسيدى ، فايتنا ورايح فين يا بابا . وفضلت اصرخ واعيط واجرى وراهم
زى المجنونه . لحد ما اتفلقت من العياط . لقيت عبيد بيزقنى ويقول
لى : قومي يابت ، مالك . اتشاهدت ، وطلعت اجرى علي الصاله
زى المجنونه . وبصيت على عمى ، لقيت سر الإله طلع ، فضلت
اصوت ، واصرخ ، لحد ما كل اللي في البيت صحيو على صريخى .
واقول : يا حبيبى بابا . لغاية لما حسى انحاش ، واترميت ع الأرض ،
ورحت ف دنيا غير الدنيا . ساعات كنت اسأل نفسى واقول : يا ترى
لما تكبر هاعمل فى جوزى كذا ، النار تقيد فى جتنى . واخرج علي
بره هاجه ، وافضل اسح من عينيا . ربكم والحق البيت فضى علينا ،
الراجل كان ماله ، كان له هله . كان طول بعرض ، وبقيت مش
طايقه البيت ولا اللي فيه ، وكل ما افكر ، نفسى تغم عليا . ومره
نفسى هفتنى على رنجه ، اتاريني كنت باتوحم وماعرفش ، عبيطه

بقى، أول مره ، وكنت محوشه قرش ومخبياه ، ورحت عند ابو شرافى وجبت منه رنجايه ، وشويتها، وقعدت أكل . لو انتو كتو دقتوها ، يبقى انا دقتها . وتيجى بنت الكلب من ورايا ، وتروح لاويه شعري على إيدها وبالشيشب وفين يوجعك . يومها فرجت عليا . أمة لا إله إلا الله . وفضلت تشتم ، وتدعي ، وقالت : ان انا سرقتها ، سرقت منها بريزه . مع ان القرش ده محوشاه من المليم ، كنت كل مامسك جلايية عبيد ، واجى اغسل ألقى فى جيبه مليم ، نكله، كنت احوشها . ولما جه ولقانى عينيا زى كاسات الدم ، وشعري متبهدل ، وقلت له . قام ربنا مقدره على الطيب ، وقاللى : مانتى اللى غلطانه ، ليه ما ادبتيهاش القرش ، واتقيتى شرها ، وقتلى انك نفسك ف الرنجه، وانا اجيب لك بدل الكيلو ، اتنين . صرخت فيه وقلت له : يا انا ، يا امك . قعادى معاك كوم ، ومع امك كوم تانى . اختار ، يا انا يا هيا . غضبت ، شهر ورا شهر ، إن يسال ، ولا يقول ليا مرّه ، أبداً . وجبت محمد ، وجه يزورنى ، قلت له تانى : نازل ونشوف سكن لوحدا ، نبقى على حريتنا ، ونربى عيالنا قاللى : هيا دى عيشتى، عاجبك !

سيته وخذو منى الواد ، وسنه وراها سنه ، ولما جيت اتجوز غيره، راحو باعتين لى الولد ، وقالولى : خدى ربيه وادبنى محتاسه . وجيت امى من البلد ، بعد ابويا ما مات، وأجرت لها أوضه ، كات

بتقعد بشوية حلويات قدام مدرسة شجرة مريم ، لكن امى كبرت ،
 والمصاريف كترت عليا ، والدنيا غلا ، أعمل ايه ؟ قعدت افكر ،
 جوزى مش راضى يصرف على امى والواد ، ومش معقول ارميهم .
 اشتغلت ، الشغل مش عيب ، باطلع من طلعتها ، لغطستها ، نزلت
 مصر الجديده وادبنى بالقبط رزقى ، اغسل عند دى ، انفض الشقه
 لدى . المخفى جوزى لما عرف انى باشتغل ، وباجيب قرش ، راح
 قاعد ، وبطل يروح محل العصير اللى واقف فيه . وبلطج على
 قفمايا . تقدرؤ تقولو لى عملت ايه ؟ قعدت ، وشغلت الواد محمد فى
 ورشة نجاره ، لكن مصروف الواد ماقضاش ، رجعت الشغل تانى ،
 وقلت له : طلقنى ، عيب لما اجرى عليك وانت شحط . سابنى ،
 رحت جايه امى والواد وقعدو معايا . ايه ، وادبنى عايشه .

* * *

طب انتي بتقولى كده، أمال انى راح أقول إيه ؟

الهم فى الدنيا مفرق ، قطعت الرجاله ، وقطعت سيرتها . طب
انتو عارفين علوه جوزى ده ، الللى قاعد هناك ، عمال يحشش ،
ويشد فى الجوزه ، وعامل ابو عرام . ده ييقى ابن خالتي بجد ، وفى
نفس الوقت ابن عمى ، انا اكبر منه بكثير . انا من دور اخوه سعد
الله ، الله يرحمه ، وكنا مخطوبين ، وكان فرحنا قرب . وانا كنت
حيلة ابوى ، ومدلعتنى ع الآخر ، أصله كان مبسوط وكان نزهى ،
صحيح انا وحشه لكن فلوس ابويا ، خلت ابن عمى يطلب إيدى ،
ويتجوزنى . وفى يوم من ذات الايام ، قبل الفرح بيومين ، يعنى كان
صايب الحنه ، وكنا الضهر ، آه والله فكراه زى ما يكون دلوقتى .
وسعد كان جى لنا ، وهو ماشى إتفاجىء بديب ، ديب كبير طالع
عليه من وسط القصب ، راح سعد مطلع مطوه حاميه من جيبه
وفضل ، يلف والدبيب يلف وراه وعلى غفله راح شاطط رقبته ،
وقاطع ديله ، وجايه وجاى ، امي فضلت تزغرط ، تزغرط . راح
ابويا خارج البندقيه بتاعته ، ونازل طاخ طيخ ، ابن اخويا جاب
الدبيب من ديله ، ابن اخويا جاب الدبيب من ديله . الدنيا هاصت
والبلد اتلمت ، والطلق اشتغل وهات يا ضرب . وفجاء سعد الله

وقع، وقع سايح فى دمه . مات . شيلت النيله ، وطفيت الشمع ،
وصيغت هدموم العرس ، وفضلت على الحال ده كثير ، عشرين سنه ،
لحد ما مرات عمى ولدت علوه وكبر ، وأول ما بقى عمره ستاشر سنه
جوزوهونى ، كان ابويا مات ، وامى فضلت تتجوز ، اخواته ده ورا
ده ، لحد ما اتجوزت اربعه ، وكل واحد خلفت منه أورطة بنات .
ولما جات مرات عمى ، تجوز ابنها علوه ، قالت آخذ واحد من بنات
خيتى ، اخف عنها الحمل . عمى صدرنى ليها ، وقال لها، بخيته
كبرت ، وماحد راح يتجوزها ، اللحم يلزم اصحابه ، وانا هديها كل
ورثها من ابوها . الطمع عمى عين ابن خالتي وخدنى ، لكن ربكم
والحق خالتي ما كانت راضيه ، آمال هيا شيلانى على راسها وزاعقه
ليه . لكن باقول إيه ، القسمه والنصيب . ومن يوم ما علوه خسر
القرن فى لعب القمار وهو لا على حامى ولا على بارد ، وكل يوم ،
برزعني العلقه ، وبدى اطفش منه ، لكن البتتين ذنبهم إيه . وهو نفسه
يرمينى للكلاب من الصبح .

كان يوم عيد اللي شفتكم متجمعين .

- سالخير يا ولاد .
- خير عليكى يا خالتي ام عكاشه ، فينك يا وليه ، بقالك مده
مش باينه ليه ؟
- كنت عند ام هاشم يا ولاد ، خدو بركة الست .
- إيه دا فول نابت . تعيشى وتفتكرى ، نظره ومدد يا ست .
- هو المولد جه .
- أيوه يا ولاد .
- مش كتي تقولى يا خالتي كنا روحنا معاكى .
- يو...ه يا زنه يا بنتي دا يوم من السنه للسنه ،
- إيه كتي بتشحتى يا خاله ؟
- أشحت إيه يا نبويه يابنتى ، ودى كلمه برضه تقوليها . أنا
عمرى ما مديت إيدى إلا للى خلقتني . أبداً نبت شوية فول ، وقلت
حلاوة ام هاشم ، وجبت لكم حبه ، وقلت ادعى ربنا يرجع الغايب .
- يا خالتي دا انتى وراكى رجاله يسدو عين الشمس ، وهما يدورو
ويسألو . انت وليه كباره ، وكفياكى شقا .
- كان يوم عيد يا زنه ، كان يوم عيد ، هو فيه حد يبسال علي

حد . انا كذا حلوه لا اميل على حد ، ولا حد يتضرر منى .
وحياتكم يا ولاد انا لما احب اروح ازورهم ، باخد غدايا معايا .
خلاص خدت علي كذا من يوم ابوهم ما مات ، قولى يا عيني يا
حيلي ، مايسحش دمعتك إلا إيدك . اتتهجلى عليهم بدرى ،
كبرت ، وريتهم ، وعلمتهم ، وربك اللى بيرزق . لكن مش حاشش
ضهرى ، وهاموت ناقصه عمر ، قبل ما اشوفه ، إلا مهدي ، ابني ،
أصغرهم ، أبوهم مات وهو لسه صغير ، علمتهم كلهم ، لكن هو
شد فى العلام قوى . ولما خلص خدوه الجيش ، وآهو من يومها لا
حس ولا خير . ماحدش قادر يدلنى . ناس يقولو تلاقية راح حرب
اليمن . وناس تقول دا لسه جديد وبكره ييجى ، وآهو شهر ورا
شهر ، والعمر بييجى وانا مش قادره ، نفسى اشوفه قبل ما اموت .
أعرف إن كان عايش ولا ميت . هاموت بحسرتك يا ولدى . قولى
اعمل شويه نابت ، وازور الست ام العواجز ، وامسح ضريحها
بطرحتى ، واطلب وادعي ، ربنا يرجعه لى سالم ، غانم ، يارب .
شالله يا ام العواجز يا طاهره ، يردك ليا يا ولدى ، انت وكل اللى
زيك ، ولايسونيش فيك ربنا ، ولا اشوفش يوم فيك يزعلنى . رحت
للكبار واحد واحد . اللى يقول اصبرى ، واللى يقول معرفش ،
واللى يرد الباب فى وشى . قالو اكتبى للرئيس ، خلعت ابني الكبير
كتب له جواب ، وحلفته بالعزیز الغالى ، قلت له : يا ابو خالد ،

يا حبيبى، انا وليّ هجاله ، وريته بن العين ، وسهر الليالى،
وخلص قريت اموت ، يهون عليك اموت قبل ما اشوفه، يهون
عليك ياريس .

- ربنا يصبرك .

- هاقول إيه يا ولاد ، فردت حجري لكل اللى يديه لى . عوضى
عليك يارب ، عوضى فى تعبى وشقايا وسهر الليالى . يا ضنايا يا
ابنى ، يا حبيب امك يا ولدى . مهدى ، يا مهدى ، فىن أراضيك ،
ولا فىن قبرك وانا ازوره .

- يا حبيبتي يا اختى ، الوليّه هاتجنن على ابنها ، يا ولاد .

- آمال إيه يا ام رامى ، ربنا ما يكتبها علي عدو ولا على حبيب ،
هو بيولع القلب قدهم ، خصوصا الغايب .

- عاجبك كدا يا زنة الكلب ، آمى هتبات تجمز ، طول الليل ،
ومش هنام منها يعنى كان لازم تسألها ، دايمن عامله زى الغراب
تنكشى وتدورى على النكد .

- يووه يا علوه ، يعنى انا كان قصدى ، كان بدى اتظمن عليها ،
ما هو الهم فى الدنيا مفرق ، والبيوت قافله على بلاوى .

- جرى إيه يا مره ، اتلمى وقولى يا مسا ، لحسن اقوم امسيكى .

- يا خويا جاك هم ، ماوراكش غير يا مره ، يا مره .

- بتقولى إيه يا بنت المركوب .

- ولا حاجه يا خويا ، ولا حاجه . ياللا نقوم ننام .

ياللا يا ولاد تصبحو على خير ، ياللا يا واد يا حسن لم اخواتك

ويااللا . تصبحو على خير ، الحفله شطبت ، والنهار قرب يطلع .

- وانتى من أهله يا حسنه ، ياللا بنا احنا كمان يا ولاد . زمان

ابوكم راجع ، ولو لفاكم لسه صاحين هابطين عشيتنا ، حاكم هو
راخر نكدى .

ياللا يا رامى ، ياللا يا أوفه ، قبل ما تقلب بغم . تصبى على

خير يا زنه ، ياللا يا اختى لمى العيال ونخسى ، واخزى الشيطان

وبلاش تقفى له ع الواحده ، إبقى فوتى . بلاش تعملو لبعض زى

ناقر ونقير .

- يا اختى بلا خوته ، جاته داهيه فيه وفى امه ، هو اللى قارش

ملحتى، ما انتى خابره البير وغطاه، بيتلكك ابن سعهه ، تلاقىها
قاعده جنب السيده ، تبكى ، تشاكى . جاتهم الهم ، عيلة غم .
- على العموم يا اختى ماتديهمش فرصه ، تصبى على خير .
- وائتى من أهله يا ام رامى . الحقى ، الحقى يا صباح ، جوزك
بوز الغراب وصل .

* * *

.....

زمر ، كركر ، فرويكا .

طبل ، طبل ، مزىكا .

حتة راجل انتيكا .

- شوفى يا اختى الراجل كئنه حاوى ، وطلع العيال من الشقوق .
بقى يا راجل لامم الصغار ومضحكهم عليك . تعالى يا امه شوفى
المى انا فيه . الراجل الشايب ، العايب ، عامل ضهره قنطره .
والعيال تنظ من عليه .

- إتلّمى يا مره ، وقولى يا مسا ، العيال أحباب الله .

- يا راجل اعمل لك هيبه وسطيهم ، مش تأخذهم عليك .

- يا مره يا ام من ضلم ، ساعه لقلبك ، وساعه لربك .

- ولما بتنزّل فيهم دق ، وتضرب العيل مطرح ما تطلع روحه ،
بيبقى حلو ؟

- كذا يا صباح ، فليتى مزاجى . طب روحى ، روحى ، شوفى
بدر المجنونه قاعده فين واقعدى ربحها . قولو يا ولاد قولو .

زمر ، كركر ، فرويكا .

طبل ، طبل ، مزىكا .

حتة راجل انتيكا .

* * *

.....

أنا حسی غنی وقوی ، أنا حسی عفی وعفیتی من النار .
 أنا فی حیرتی إلى یوم المات ، ومن الدار للنار .
 راح الجدد ، آه یا وجع
 اه یا ذل القهر والمقهورین ، والذل له أسرار .
 آه یا زمن یا ابو البدع ، لما الشایب والجدد یقعو ف غرام بنت
 عطیه ، واکله ناسها ، وقاله راسها ، ونفسها تترمی فی حزن حد
 حالق راسه وعادم ناسه ، زی ما كانت الام بتدعی وتطلب ورب
 العباد یسجل فی دفاتره الكبيره . كنت ساعتها ، يدوب الفستان ابتدی
 یترفع من ع الصدر والبزاز تیز ، والعود بیتدور .
 إیه الخلاوه دی یا بت ؟ إیه النار دی یا دلع ؟
 إیه الی صابنی لما شفتک وانتی بتعدی . رایح جای ، رایح جای ،
 عینی متک یا راکب العجله ، وفی حبک لا بیع المکنه .
 آهین وآه یا بت ، آهین وآه یا عین ، آهین وآه علی الغمازات الی
 فی الخلد تنغز وتبان ، والسن یضحک ، وجلابته مکویه وإیدیہ نضیفه ،
 بیاضه یشق ینور فی الضلمه . ساعتها بس ، حسبت أنا الیتیمه ، بنت
 الناس الطیین ، ورقوبة الیبت ، حیاتی یتنور وتنجلی ، وفی لیلہ من

الليالى جه ودخل ، فتح الباب ، شفت النور . كإن السما والأرض
كانو طابقين على الصدر . دلوقتى بس حسيت إنى ممكن اشوف ام
الدنيا مصر . يا عنى يا عنابى يا فيومى وبلدى ، لكتب عليه ويبقى
حلالى . وكانت الدنيا ، والدوخه ، والأوضه الحق ، والشباك
المقفول ، والباب المتوارب ، والعيال يتسرسبو عيل ورا التانى ،
وأفضل انا كدا ، وحيد ، باستنى لحظة ما يرجع ويدق الباب .
كذاب يا باب ، كدابين يا خلق ، الموت لا خد منى الواد ، ولا خد
منى البت ، الموت لا خد الأهل ولا خد الراجل ، . الراجل راجع ،
مسيره ييجى من الشغل ، هو قال : «يا بدر ، يا بداره ، يا نور
عينى . إوعى تفتحى الباب ، الناس غيلان بره ، وانتي غلبانه لا
تعرفى تسدحى ، ولا تعرفى تقدحى ، خليكى مستنيه ، وانا فى
العشيه راح اجيب الوكل ، ونساهر يا بت . إوعاكى يا بدر إوعى
الغرور ياخذك وتفتخى لحد ، ولا الباب يشوف طولك ، كل اللى
تعوزيه يا بت أجيبه لك . بس اسمعى الكلام واتدارى ، إياك يا بت
إياكى .

إياك انت يا حبيب القلب ، وساكن التنى تغيب عنى ، وتحرمنى
من انى اتلمى بنورك واشوفك جنبى . الجواز ستر وغطا ، والست
الحره ما بيان ضلها بره إياك تحزن أو تخاف ، خليك فى شغلك
صاحى ، الناس تنام وانت عين المولى عليك حارس ، واللى يختشى

من بنت عمه ما يجيش منها عيال . وانا حامياك ، وحاميه عرضك ،
وعلى الود والعهد باقيه ، روح الشغل ، وما تحمّلش هم . الناس
للناس ، والجيران لبعضها ، وانا نفسى هفتنى على الحلاوه السميّه ،
والليله مولد المطراوى رايحه آخذ ، أى ولد من عيال حسنه وازوره ،
واحط اللى فيه النصيب وادعى له : والننى يا سيدى المطراوى انا
سايقه عليك حبيبك الننى ، تفك ضيقتى ، تجعل بطنى تعمّر ،
والشهور تكمل ، وينزل العيل ، وتخليه ، وطول لنا فى عمره وانا
عهد عليا ما اخطى البلد ، ولا ادخلها برجلى طول ما العيل صغير ،
انا خلاص عرفت ان العين فلقت الحجر ، وان عيالى زى القمر
منورين ، وانهم ولاد موت ، يارب ارزقنى بعيل ولو يكون عبيط ،
آهم يقولو خلقت والعيل عاش ، وندرن عليا والندر يوفى الدين ،
أطاهر العيل على بابك وامد إيدى واملس على شياكك ، واحط على
راسه ، وان خليته ، لاجيب فردة حلق واحطها فى ودته ، ويوم
الطهاره ارميها فى صندوقك . واشحت سبع قروش بيض مخرومين ،
من سبع محمّدات ، والبسه لبس بنات . ولا اعمل سبعه ، ولا
ابهرج ، وافرق يا دوب بلح ، وان ماكتش عايز بلاش ، هفرق رز
بالن . بس خليه لى يفتح عينى ع الدنيا ، دانا وحدانيه ، وجوزى
وحدانى ، والأهل راحو ، وماشفتهمش ، واللى ربونى احوالى ،
نفسى ف قريب من دمي ، ومن لحمى ، ويفرح قلبى . آه بطنى

انتفضت وولدت، وجه الولد وعاش، بس الراجل راح الشغل زى كل
ليله ومن ساعتها ولحد دلوقتى مارجعش ، حد يقدر يقوللى راح فين،
حد يقدر يقوللى مارجعش ليه ، يكون زعل، أو خد على خاطره ،
أو حد وقع ما بينا . لا . لا . لا مستحيل يغيب كل ده ، هو راجع .
إرجع بقى .

يا حبيبتى يا اختى ، يا بدر البدور ، الحلوة

الجميلة نواره البيت ، ناكشه شعرها وقاعده على العتبه ، جنب
الحيط عماله تغزل فى الهوا ، وتفك ، وتنده على جوزها ، اللى
غرق ، فى الصيف ، عند معدية عثمان ومارجعش . كان هو وسبعه
اصحابه من العمال ، رايعين وردية الليل ، وكانت الدنيا قمره ، لا
كان القمر غايب ، والمراكبى عمال يغط فى النوم ، ندهو عليه : يا
حسن يا مراكبى ، قرب يا واد وهات المعديه وتعالى ع الشط ، الدنيا
ليل ، والقمر مش طالع ، مش شايفين ، وميعاد الشغل قفز الرئيس
صعب وكشر ، ووشه يقطع الخميره م البيت . وكل ما يشوف واحد
منا غايب يخصم له يوم ، واثنين قرب يا واد هات ايدك يا حسن ،
هات ايدك يا ابو على . هيا الدنيا برد كدا ليه ، الدنيا كحل ، ترعة
الاسماعيلية ساكنه وهاديه ومكنونه . ما تولع يا واد شعله ولا حتى
عود كبريت . إلحق يا واد ، المركبه بتميل ، إلحق يا واد المركبه
بتغطس ، إلحق يا واد المركبه بتفرق ! إلحق يا واد رحنا خلاص .
وراحو السبع جدعان فى نوبه واحده . من يومها والغلبانه قاعده قدام
الباب . بتستنى ومش قادره تصدق إن الحبيب راح ، ان النور انطفى ،
والليل بيليل ، والنهار بيضيع . يا حبة القلب يا بداره .

- اسمعى يا حسنه احنا لازم نساعدها ونرجعها لأهلها ،
- اسكت يا ابو سعد الله لا يغلب لك وليه . ترجع فين ولا تروح فين ، هيا يا ولداه ليها حد .
- ليها ربنا يا وليه ، اللى ما أحسن منه حد .
- دى يتيمه ، ومقطوعه من شجره ، والحته العيل اللى عاش ليها عبيط . مايعرفشي الفره من الثره ، ولا السما من العمى ، وطول النهار العيال حاطينه جوه قفص وعمالين يجروه فى الشارع .
- يا حول الله يارب . ليها رب اسمه الكريم . خلى بالك منها .
- واوعى تخلى زنه ولا حد من العيال يزعلها . وابقى حنى عليها باللى يجود عليكى بيه ربنا . وياريت تحاولى تفهميها بالراحه إنها بتفزل فى الهوا ، واللى راح راح .
- انا رايح الشغل ، تصبى على خير .
- روح يا اخويا يكفيك شر اللى فى الغيب ، وشر اللى متدارى ، وكيفيك شر اللى ما تطيق شره .

* * *

ياللا يا ولاد الضهر إدن . ياللا المدرسه

ونادو على اخواتكم سعد ويطه وولاد زنه ، ياللا يا الفت ، ياللا
يا رامى . وانتى يابت ، إمسكى أخوكى فى إيدك ، وخلي بالك من
العريبات وبصو كدا ، وبصو كدا ، وانتو بتعدو . خد يا حبيبى قرش
آهه . هات حاجه حلوه ، وادى اختك تعريفه ، وبلاش البمب ده ،
ولا العجل ، وانتى بلاش مراجيح ، لحسن تقمى ، وتتكسر رقبتك ،
مفهوم .

- حاضر . حاضر يا امه .

شاطر يا حبيبى . يجعلك حاضر ، مايجعلكش غايب أبداً . يا
سلام ، انتو حياتى ، وعينى اللى باشوف بيها .

- ماما ... ماما .

- إيه يا مقصوفة الرقبه .

- إبنى صحيح هاتجيبى أخ تانى .

- يعنى إيه يا بت .

- يعنى هاتجيبى نونو .

- آه ، مين اللى قالك ؟

- خالتى حسنه ، كانت بتقول لخالتى زنه ، إن شهرى فى العيد .

وانك سابقه زنه بأسبوع . راحت خالتى زنه ضاحكه ، وقالت لها :
هو انتى يا حسنه حاسبه لكل واحد ، قالت لها : آه حاسبه ، انا
بحسب لكل واحد ، وانتى هتولدى بعد العيد .

- يا مقصوفة الرقبه . وانت إيه حشرك ، وسط النسوان ، يا بنت
سراج . آه يا صنتاته ، عاده وحشه دى قوى يا أوفه ، اسمعى يا
حبيبتى ، البنت الحلوه ، اللى بتروح مدارس ، ماتقعدش مع ستات
متجوزين ، واحده تقول كلمه كدا ، ولا كدا ، يقولو بنت صباح
صنتاته ؟ عيب يا ماما .

- البنات الحلوين مابقعدوش مع الكبار . ولا يشتمو ، ولا يلعبو
مع الصبيان ، ولا يضحكو ، يتشمو بس . لو جدك كان عايش ،
كان قطع رقبتك ، دا أمك مره واحده ضحكت ، لما عرفت إنها
هتتجوز ابوكى ، وقالت عليه زمر . جدك ضربها قلم ، لسه يا بنت
الكلب سخن لحد دلوقتى ، وودنى بتوش منه .

- يا ماما . جدى دا كان زمان . احنا دلوقتى فى آخر سته
وستين . وبعدين ولاد حسنه ، وولاد زنه يلعبو سوا ، بيطلعو فوق
السطح ، ويلعبو عروسه وعريس ، أنا شفتهم . وكمان شفت ابنك
بيوس بظه .

- يا بنت الوسخه . إيش عرفك يا بت .

- واد يا رامى غور ، روح انت المدرسه وسيب للى بنت الكلب

دى اريبها . تعالى . تعالى يا مقصوفه الرقبه .

- آه يا امه شعري ، شعري ، حرام عليكى ،

- اسمعى ، رامى ولد ، يعمل كل حاجه على مزاجه . هما
عيالهم فُجر ، أوساخ ، إنما انتى لا . لازم تبعدى عنهم ، سامعه .

- حاضر ، حاضر ، بس سيبى شعري .

- يا بنت الوسخه ، من النهارده مافيش شارع . مافيش خروج .
مافيش لعب ، من المدرسه للبيت ، ومن البيت للمدرسه . رجلك
على رجل اخوكى . وشيلى القُصّه دى من على عنكى .

- حاضر . حاضر .

- وبعدين صدرك ملا ، والواد سعد بصباص ، إوعى اشوفك
واقفه معاه أو تكلميه ، ولا تروحي هناك . سامعه . يا خساره
ماطلعتيش لامك . طلعتى هبله وعييطه . يابت انا نفسى اخليكى ،
احسن من امك ، حظك ما يبقاش زى حظها ، راجل نكدى ،
وخلفته تسد النفس . نفسى تاخذى واحد موظف ، تبقى حلوه ،
وهدومك نضيفه ، تاكلى لقمه حلوه ، وفرشه حلوه ، مش تنامى
بجلاية البيت ، وتقومى فى نصاص الليالى ، تنكفى ، وانتى مع
جوزك تبقى مكسوفه وتندارى من العيال بستاره ، يابت افهمى ، دا
امك شاطره ، وناصحه ، بس يا خساره ، قلة البخت ، الله يسامحه
جذك ، جوزنى الورشه ، وفضل ابوكى . يابت حسى بيا ، وخلي

عندك دم . البيت النضيف يحوى سكان نضيفه ، والبيت الوسخ ،
يلم سكان من كل اشي إن كان ، فران ، وصياد ، وخدامه ، وآخر
الليل يبصو على بعض من شقوق الحيط . انت فاكهه خالك زنه
كدايه ، ابدا دى بتتكلم صح ، بس انا اللي بدارى ، ياما عمك علوه
ده ، جرى ورايا لحد الكنيه فى الضلمه ، وانا أزه : بلاش فضايح يا
راجل اختشى ، لامراتك تسمع .

- مراتى دى يا صباح رتل جاز يخلصنى منها ، بس انتى قولى آه ،
دانا مخليها عشان خاطر العيال ، آهى تخدمهم ، جاتها القرف فيها
وفيهم . دى زنه ، عارفه يعنى إيه ؟ زنانه .

- بس يا اخويا عيب ، أنت وانا ، وبعدين
جوزى شرانى ، هو صحيح يقرف اكثر من مراتك ، بس انا ما بصش
لحد تانى ، آهو مكفينى ، وساترنى ، واهى ايام بنقضيه يا اخويا ،
والبركه فى الولاد ، بكره يكبرو ، ويعيشو أيامهم ، إحنا أيامنا
راحت .

- يا صباح انتى حلوه ، وتنجوزى سيد سيده ، انا انجوزك ،
ونخلص منه ومن قرفه ، وبعدين دا سكرى ، وقليل الأدب ، وغلاط
وفقرى .

- يا لهوى ، إوعى اسمع منك كدا تانى . وآخر مره تقف فى
طريقى يا ابن الناس . انت من سكه وانا من سكه .

- شفتى يا بنت الحماره . لكن اللصراحه من يومها ماهوبش
 ناحيتى . فاهمه يا بنت العبيطه ، الرك على الواحده . وانت كبرتى
 وبلاش تنطيط ، ولا اروح لخالك ، واخليه يخرب بيتك .
 - خلاص يا امه خلاص . انا سايقه عليكى العذرا بلاش خالى .
 - خالك واعز زى ابوه ، وبعدين اوعى تنسى هو خطبك لابنه
 طارق .

- يالهوى .

- ايوه يا بت طارق فى المدرسه . وهيتعلم ، وناصح ، وطول
 عمره الأول ، مش زى اخوكى الخايب ابو بطه .
 - يا امه ، اخويا أصغر منى . وابن خالى قده .
 - آه لكن ناصح ، وفالح . إوعى من سكتى اوعى ، واياك
 اشوفك مع ولاد حسنه تانى . فاهمه . قال حسنه قال . إوعى يا
 بنت العميا حد يكون ضحكك عليكى ولا باسك .

- لا .. لا .

- مالك يا بت سهمنى .

- لا يا امه مافيش . بس انا شفت عمى وحيد مع نبويه .

- إمتى يا بت ؟

- كثير ، كثير . كنت ارجع من المدرسه . وما فيش حد فى البيت
 . اشوفها واقفه معاه جوه الأوضه ، يشدها ، ويروح قافل الباب .

واسمع ضحكك ، اخاف واجرى على بره .

- وبعدين .

- وبعدين خلاص .

- خلاص مين ، خلصت روحك . احنا مالنناش قعاد هنا ابدا .
البيت لم ، وبقى يخوف . يا حسنه . يابت يا غلبانه . يا عيني
عليكى يا اختى السوس فى بيتك وانت بعيد ، يا حسنه يا عيطه .
يابت .

- إيه ، إيه يا صباح . مالك .

- تعالى ادخلى يا اختى . تعالى يا غفلانه .

- يا امه بلاش فضايح .

- فضايح إيه ، ياللى تنفضحى على كلب اعمى ، اسكتى .
امشى اطلعى بره ، امشى وردى الباب . ردى يا جلابة المصايب .

- اسمعى يا حسنه ، اسمعى يا اختى . إن كنتو ، اتو فلاحين
مابتغىروش على دمكم . احنا صعايده ، ودنا حامى .

- صعايده إيه ، ولحم إيه ؟ فهمينى .

- بتتك نبويه .

- مالها .

- الواد وحيد ، السهتان ، ابن العريجى ، ابو سيما غاويها .

- ايه ؟

- البت ألفت ، شافتهم بعينها .
- بس ، بس . قولی کلام غیر ده .
- لمی لحکمک یا حسنہ ، قبل ما یعفن .
- یعفن ایه یا ام رامی . مجدی سیدک یا اختی .
- قدوس اسمہ . وحید مماشى بتک . وانا قلت لك ، وقبل
الفاس ما تقع فی الراس ، ونرجع نقول یا ریت الی جری ما کان .
قصری لها شویہ ، لیها .
- یا لہوی دا کلام کبیر قوی . ودی صغیرہ .
- صغیرہ ، بنت ثلاثاشر سنہ صغیرہ ، یا حسنہ لیہ ماحاضتش .
جوزیہا یا اختی ، ستریہا .
- ولا اقولک ہاتی ام سمودی الدایہ ، ولمی عیالک وعیال زنہ
وطاہریہم . البنات ہاجت .
- أروح فین بس ، وأجی منین . ادور علی مکان تانی . یا
لہوی .

* * *

كان فين متدارى يا خرابى .

- سالخير يا حسنه . مالك .
- يا خرابى ، يا خرابى يا ابو سعد . يا خراب بيتك يا حسنه .
- دى آخرة تعبك ، وشقاكى .
- مالك يا وليه ، عمرك ما ولولتى كدا !
- بنتك يا اخويا . الفاجره ، القادره .
- مين ؟
- نبويه ، الفحله ، هو فيه غيرها ؟ ام عين باجسه . اجرنها ديك
- النهار شخبطت فيا ، وضربتني ، وبهدلتني ، ونحلت اللى ما يشتري
- يتفرج .
- وسكتي لها يا مره ؟
- لا ، وحياتك . مسكتها ، عجبته . وقبل كده علوه ، جوز
- زنه ، قاللى : يا حسنه بنتك بتروح القرن كثير ، ليها .
- قلت له : اسكت يا علوه والنبي ، بلاش كلام فارغ ، البت
- صغيره ، وبلاش سمعه وحشه ،
- قاللى : انتى حره . والنهاردا ام رامى مرات زمر ، قالت لى :
- انها ماشيه مع وحيد ، بنتها شافتهم ، فى الاوضه .

- يا بوز النحس ، ألفت دى ، خياصه ، ونقالة كلام ، تلاقى
امها كانت هتضربها ، اخترعت الكلام ده عشان تسيبها . فبن العيش يا
وزه ، سيبك انتى النهاردا منوره ، وعينى عليكى بارده ، وانا راجع
بدرى مخصوص ، عارف انك قاعده لوحك ، والعيال بره . شوفى
يا وليه ، شوفى جايب معايا فول وبصل اخضر ، وطعميه سخنه ،
ياللا ناكل .

- يا راجل هو انت كذا بارد ، زى الميه السقعه مافيش مروه ،
فعلن ماكدبتش صباح لما قالت : انتو يا فلاحين دمكو بارد .

- بارد فى عينيه مره ماتختشيش صحيح ، اسم الله هيا اللى
شريفه وطاهره ، والعدرا بتلمس على راسها . هيا تقول بنتك مع
وحيد ، وزنه تقول جوزها بيص عليكى . والله عال ، وانا نايم على
ودانى ، نايم فى المجارى . زى التور اللى بيلف فى الساقيه ومغمى
عينيه .

- وانت تصدق برضو .

- الله . مش انتى اللى بتقولى ، امبارح زنه ، والنهاردا صباح .
وبعدين يا هابله كل حاجه تحصل تصدقها ، وزى الدبه ، تقوليها على
طول . جاتك اللقرف ، عديمه التمييز ، فيه مره هابله تقول لجوزها
على كل حاجه .

- يا راجل امل اخي ، احنا فى بيت كله سكان ، وكل واحد من

بلد ، وكل بلد شكل وطبع ، واحنا غرب ، غرب يا ابو سعد ، لازم
اقول لك ، أمال يجرى حاجه ، وتدرى من بره ، اضيع انا . لا ،
لازم تعرف كل حاجه ، كل اللى بيحصل ، احنا على الخير والشر
سوا ، والنهاردا اخوك ما هو اخوك ، وابوك ما هو ابوك ، ودى بلد
غريبه .

- يالهوى يا حسنه ، انتى بير غويط ، غويط قوى ، وانا اللى
فكرك هبله ، ماتعرفيش حاجه ، اتاريكى ساهيه ، ودايه ليا حق ،
أثق فىكى .

لا راجل يابت ، راجل . قومي هاتى لنا ناكل بقى ، يا وزه لحسن
انا على لحم بطنى من الصبح .

نار .. نار ، نار يا ولاد الحقونى .

هه ... هه ، زقى يا صباح ، زقى يا حسنه ، الحق يا وحيد ، يا ابو سعيد ، الحقو يا ولاد ، الأوضه ولعت والوليه مش قادره ع النار لوحدها .

- فيه إيه يا لوزه . مين اللى عمل كذا يا زنه ؟

- آه يا ضنايا يا بنى ، آه يا قلبى ، روحى عقلى ، قلبى ، ولدى ، صنايا ، حشاشة كبدى ، يا ولدى . يا خرابى ، يا نارى ، نار .. يا ولاد نار ، نار فى قلبى والعه ، حريقه ، حريقه يا خلق .

- ما تهدى يا زنه وتقولى إيه اللى جرى ؟

- خلاص طفيناها .

- طفتيها يا لوزه ، طفتيها يا ام رامى ، لكنها قايدة فى قلبى .

- خلاص يا اختى ، انا سايقه عليكى النى لتهدى ، وربنا يجازى

اللى كان السبب .

- انا رحى لسوق وجيت ، بفتح الأوضه لقيت ابن الكلب نايم ع

السريير وماسك السيجاره وهاتك يا نفخ ، والعرق نازل ، مغطى

الملايه ، وعمال يشد وينفخ . ناديت ، يا علوه ، يا علوه . يا

راجلى ، يابو البنات ، حطط السبت من على راسى هابقع ، يا واكل

ناسك رد . رحت شده من ديل الجلابيه . راح قايم مفروود زى المارد
واندار عليا، دب . دب ، وهرس وراح شاده السبت من على
راسى، وهاتك يا هرس برجليه ، والواد على دراعى يصرخ ، وهو
ولا هنا . وقام جرى على رتل الجاز ، ونزل رش فى الأوضه ، وع
السرير والأرض ، وراح شاطط عود كبريت ، وساكن الباب علينا .
شوفو إديا ، شوفو صدرى . نسيت الواد ، رميته، وقعدت اطفى ،
والنار والعه وعماله تزغرت فى الأوضه . انا انحرقت خلاص . أنا
كنت عارفه ان دى آخرتها مع ابن الكلب . شفته كذا مره فى السوق
مع البت الخضاريه ام عين واسعه ، بنت الوليه بتاعه البطاطس
وعمالين يضحكو ، ويمهمهو ، وتحدفه بالبطاطس وتقولله : عشت
يا سبع ، وعاشت مجايب إيديك . وانا واقفه وما اختشى . منك لله
يا واد عمى ، منك لله حرقتى وحرقت قلبى ، ضيعتنى ، وضيعت
نفسك ، ضاعت الدنيا يا ولاد ، خلصت خلاص .
- ولا خلصت ولا حاجه ، الراجل ومراته زى القبر وافعاله .
قومى ، قومى ، دلوقتى يرجع .
- يرجع . جوزى ما هوش راجع يا حسنه ، جوزى طلقنى ،
رمى عليا اليمين ، الفقري واكل ناسه طلقنى . يا خرابيتك يا زنه ،
يا خراب بيتك من بعد راجلك وضناكى .
- يا حول الله يا ولاد .

- يا اختى تعالى معايا انتى والعيال ، نامو فى أوضتى .
- أوضة إيه يا ام رامى . والنهى يارب اشوف فيك يوم يا علوه ،
يا واد عمى ، أشوفك مفضوح ، تنفرج عليك التبت فى خباها والام
فى خشاها ، ويكون يوم جمعه يا قادر يا كريم . عوضى عليك يا
صاحب العوض . عوضى عليك يا رب .

* * *

یا عینی یا خالتی زنه ، مشیتی والدینیا لیل .

- إلا قوللی یا سعد ، هیا مابلغتش لیه ؟
- یا هبله ، تبلغ عن جوزها . ابو عیالها . بکره هاتلف علیه زی الحریایه ، وتاخذ تارها .
- یا لهوری یا سعد انت قاسی لیه کدا !
- اسکتی یا خاییه اسکتی ، انتی ما تعرفیش ، زنه دی جامده .
- ساعات کنت باخاف منها لما کانت ، تشوفنا واحنا مع بعض .
- تعرفی یا بت یا أوفه ، أحسن حاجه ان انا وانتی بنطلع هنا ، بعيد ، فوق السطح ، لا حد شایف ، ولا حد عارف .
- انا خایفه قوی ، امی تدور علیا ، وبعدین دی لو عرفت انتی بالعب معاك ، کانت تطین عیشتی . لا یا عم انا نازله ، واقعد العب لوحدک انت .
- غوری وانتی قد الحماره ، ویتخافی ، انا ماباحش الخوافین .
- لا یا خویا انا سمعت امک وامی ، بيقولو انهم هایجیو ام سعودی الدایه الصبح وهایطاهرو بطه وعصفوره وولاد زنه ، قوللی یا سعید ، انت ماکتش خایف ؟
- انا راجل ، عارفه یعنی یه راجل ، یعنی اشدک کدا ، واحطک

ع الأرض ، وانتى لو جدعه فلفصى .

- يا لهوى ، إوعى ، إوعى كدا . انت قليل الأدب .

- يا بت . يا بت انتى خايفه من إيه ، أنا باهزر معاكى .

- لا يا خويا انت عايز تضحك عليا . انت قليل الأدب . أنا مش

هالعب وياك تانى ، أنا نازله .

* * *

اسم الله عليكى يا عصفوره .

(الأوله باسم الله ، والثانيه باسم الله ، والثالثه لا حول ولا قوة
إلا بالله . جاره بتقول للجاره يا حاسده يا مكاره ، يا جاره مانتيش
فى خساره) اسم الله عليكى يا عصفوره، اسم الله يا اختى .

- مالها يا حسنه .

- أبدا يا ام رامى من ساعة ما راحت ورانا الترب ندفن الواد ابن
زنه، والكلب طلع عليها وهيا نار قايده ، ورايحه راس فى راس .
وعماله ترتعش .

- البت انطريت يا حسنه . ماكانش لازم تاخديها معاكى .

- انا خدت ، ولا اتنيلت ، ما هيا اللى جريت ورانا ، وطرت
وراها بالطوب ، هيا ونبويه الفحلله ، رجعتهم من قرب المسله مرتين ،
ولا فيش فايده .

- يا حبيبتى يا بتى . لو ام عكاشه هنا ، كانت شافتها ، ولا
كانت جابت لها طاسة الخفضه . هاتى يا اختى هاتى . باسم
الصليب . إخص عليكى يا حسنه ، دا البت نار ، وبتترعش .
- غلبت وغلب غلبى . كإن البت اتبدلت ، أو كإن عفريت
ركبها .

- ما يمكن يا حسنه ، ما انتى عارفه يا اختى ، الأرض مش لينا
لوحدينا . والترب واعره ومسكونه .

- أعمل إيه ، أعمل إيه بس يا ربى ، أطلع من هدومى ، ولا اطلع من دىنى .
- استغفر الله .
- قومى استغفرى ربك .
- البت هاتروح منى يا ولاد .
- يا اختى باكيه على بت . دا موت البت يا هنا ، لو كان عطرها على القنا . آمال زنه تعمل إيه اللى ابنها راح فى دقيقه ، ولا ام عكاشه اللى ابنها مش عارفه طريقه .
- اسكتى يا ام رامى دول هما اللى مفتحين عينيا على الدنيا ، فكرك يعنى انا حاطه امل على الولدين ، أبداً وحياتك ، بكره تاخدم واحد ع الجاهز . انما البت هيا اللى حبيبة أمها ، بكره هيا اللى تجرى ورا النعش وتقول يا حبيبتى يا امه .
- كل واحد بياخد من جتنا راق ، وكلهم غلاوه واحده .
- ماترقىها يا ام رامى ، انتى نفسك طاهر ، وبنت ناس طيبين ، خدى قولى شالله يا عدرا تشيلى عنها يا شيلة الحمله .

* * *

نکسه ما بعدھا نکسه .

- نکسه کبیره واتنکسناھا ، زنہ اینھا راح ، وجوزھا طفش ، وام عکاشہ یا ولدہ ضناھا ضاع ، وحسنہ بنتھا راحت منها . من شاف بلوۃ الناس هانت علیہ بلوتہ .

- آہ یا خرابی یاا . . آہ یا خرابی یامہ . عاجیک کدا یارب ، یرضیک کدا . بقی انا حسنة الغلبانة، اللى طول عمرى راضیه بقليله، یجرى لى کدا ، یكون ده جزاتى . دانا عابده ، حامده، شاکره ، صایمه قایمه سهرانة اسبح باسمک ، ولا عمرى عملت حاجه تفضیک . تعمل فیا کدا ! یرضیک کدا ! فردت حجرى لكل اللى تدوھلى انا راضیه بیه ، واللى یرضیک یرضینى . بس بلاش تقرص علیا کدا . عوضى علیک صاحب العوض . عوضى علیک یارب .
- یا أختی حرام علیک فرھضتى ، ماتعملیش فى روحک کدا ، الدنیا حر .

أعمل ایه یا لوزہ ؟ أعمل ایه یا ولاد دلونى ؟

- دى نکسه . . نکسه کبیره ، واتنکسناھا .

أم فيفي ، جنب ام رامى ، جنب حسنه ، جنب ام عكاشه ،
جنب زنه .

كلهم جنب بعض ، كلهم حزاني ، الدنيا ضلعت ، والليل دخل ،
قوى يا بدر ، قوى خشى أوضتك لا الناس تدهسك ، قوى يا
اختى هاتى إيدك . القلب محروق ، والجسم ماعدش فيه ، ولساكى
بتلمى الخيوط وتغزلى ، لساكى فاكهه ان اللى راح هيرجع ، لساكى
بتستنى وتعلمى . الورد دبل ، والعين نورها انطفى ، وابنتك ضناكى
مرمى ع الأرض ، والعيال عماله تشيل وتحط فيه ، قوى يا ضنايا ،
قوى يا قلبى . يا واد يا حسن ، يا سعد ، تعالو معايا يا ولاد
شيلوا . . الوليه تقلت عليا .

- نعم يا خالتى لوزه .

- خد يا واد يا حسن شيل ، شيل يا بنى الواحد اتهد من صباحية
ربنا ماعدش على حيله ، والناس ضفة داخله وضفه خارجه . ليت
حصر الشارع وفرشتهم ولاهماش مقضيين ، الناس أمم ، أمم وقلها
محروق .

* * *

أخويا فى دير الملاك .

وانا فى شبرا . وكان كل يوم رايح جاى ، رايح جاى . اقولله :
ياخويا كفايه ، تعبت ، وانت صاحب عيال وصاحب مرض .
يقوللى : دى كلها فرقة كعب ، وكمان أفرك السكر . وف يوم كنا
فى موسم زى اليومين دول ، وكنت لسه والده الواد رفعت ، بصيت
لقيته جاى فى عز طلقة القيالة ، ومن بره وعمال بنده : يارامى ..
يارامى . قلت له : ادخل ياخويا . مالك ؟ اسم الصليب عليك .
ضحك وقال : أنا دبحت النهارده ، خدى اطبخى ، كل سنة وانتى
طيبة ، النهارده مولد العدرا ، إبقى هاتى العيال وتعالى . حبيت على
إيده ، ربنا يخليك ياخويا ، وما يقطع لك عادة . خدى امسكى يابوچه
لغة اللحم وشيلة العضم خلى العيال ياكلو . قلت له : خيرك سابق
ياخويا . انا طابخه ، والحله ع النار ، قام فارد نفسه ، وراح متتور
ودخل الدروه الى ورا السرير وراح كاشف الحله اللى ع الوابور ،
ومسك المعلقة وفضل يقلب ويطلع .. يقلب ويطلع . وراح خارج
عليا . بتكدي يابنت أبويا ، طابخه بساريه ، وبتضحكى عليا . طب
والعدرا ما انا ماشى إلا لما تطبخى الاكل وتنادى ع العيال ياكلو
قدامى . رفعت ياخويا ، أحب على إيدك انت صاحب عيا والسهر مر

عليك وحياة اختك عندك ، روح لحالك وانا من صباحية ربنا جدير
على سوق سميكة واجيب طيبخ واطبخ . تعرفوا ياولاد فضل قاعد
لحد ماسويت اللحم ، وأكلت انا والعيال ، ونامو كمان ، وقام
ساكك علينا الباب وراح خارج . الله يرحمك ياخويا ويقدر
روحك . عمرى يا ولاد ماشفت حنيه زى دى . اللى حش ضهرى ،
وشق قلبى انه مات . مات من غير ما اشوفه . تانى سنه وفى مولد
العدرا ، كات الدنيا مغارب والعيال بيلعبو ، بصيت لقيت قلبى راح
دب ، وعينى رقت ، وكبس عليا العياط ، قلت الله اما اجعله خير .
وقمت ادورع العيال وجمعتهم ، وسألت نسوان اخواتى ، آمال فين
رفعت ياولاد مش باين ، فين ابو طارق مش شايفاه . طب فين مراته .
خبو عليا ، الله يسامحهم ، انه تعب وراح المستشفى ، قالو الدنيا
مولد وبلاش ننكد على حد . اربع رجاله بنسوانهم وعيالهم ، وانا
وجوزى وعيالى ، غير لعمام والأهل . راح فى شربة ميه . راح فى
دقيقه واحده . راح وخد كل حاجه حلوه معاه .

آه يا حبيب اختك ياخويا ، وحشتنى .

- يا اختى مجدى سيدك .

- قدوس اسمه .

- هو ده طريقنا ، ورايحين له ، آمال امك فين ، وابوكى فين ؟

- آه يا حسنه آه . ما راح الصغير راخر ياولاد ، نكسه ، أخين

يحشو القلب ويقطمو الظهر .

- وهو مين النهارده مالوش حد راح . طب اللى مات وعرفنا مكانه ، الدور والباقي على ام عكاشه اللى نار ابنها ما راح تنطفى أبدا . كلنا حزائى يا اختى ، كلنا حزائى ، دا يوم حزن كبير ، حزن ما بعده حزن ، الحرب كنتس الجدعان كنس . النكسه صابتنا كلنا .

* * *

الواحد مابقاش عارف يعزى مين ولا مين !

- الدنيا متبهده . اللى ما فى بيت فى الشارع إلا وانصاب .

- روقى يا حسنه بقى

- كفاكى يا ام رامى .

- يووه يا خالتى ام عكاشه ، روقو يا ولاد ، هو انا جايه اتفك
معاكو شويه ولا رايحين تكلبو عليا المواجه . دانا فى نار . نار سبحة
مين يطفئها ؟ اللى زاد وغطى ، ابن الكلب جوزى ، ابو زماره ،
سهانى وراح التجوز عليا ، واحده فى عين شمس ، قال وعمالى فيها
ولى ، اتدروش وربا لى دقته . انا ام الرجاله يسيينى ! وياريت متجوز
واحده عدله ، إلا واحده ، من دور ابنه اللى فى الاعداديه .

- يا اختى هم بيكى وهم يضحك . جوزك ابو سنان واقعه ،
وحنك مطبق ، ورجل بره ، ورجل جوه ، يتجوز عليكى ، قولى
كلام غير ده يا ام فىنى .

- طب وحياة الشده اللى اتى فيها يا ام رامى ، والله وما ليكى
عليا يمين ، أنا كنت واخداه بتاع ببربور ، كان طول النهار يشن ،
والناس فى الحاره كانوا مسمينه أبو شنه . شوفى بقى ، خليت له
بيت ، وبقى راجل ، وراح التجوز .

- ما يمكن إشاعه ، ولا مغرز وحد عمله فيكى .
- قلت زيك كدا فى الأول ، وماصدقتش ، لحد ما ف مره كيست عليهم الصبح ، قبل ما يصحو من النوم ، وبقى مكسوف منى ومش عارف فىن يتدارى . الأدهى والأمر يا بت يا ام رامى انه بانى لها بيت لا له أول ولا آخر . حته أرض كان شاربها من زمان ، وغلاوتك كله من تحويش إيدي . انا امسك على العيال فى المصروف وادبر ، وهو يروح يمتع بيها غيرنا . شفتى الهنا اللى انا فيه ، وبتزعلو ، على اللى بيموتو ، انا عندي كان مات ، كان اهن من انى اشوفه ، واشوف خيرى رايح لوحده تانيه .
- اسكتى يا اختى ما تقوليش كدا ، حسه فى الدنيا ويخليه لعياله .
- يعنى هو الموكوس كان عمل حسابهم ، دا عنده رجاله عايزين يتجوزو ، دا فيهم اللى خلص جامعه .
- ما يمكن يا اختى العيال كبرو ، والراجل مش عارف ياخذ راحته ماتاخذنيش يعنى فى دى الكلمه ، يمكن بيتكسف منهم ، إكمنهم ماشاء الله حواليه ، رجاله طول بعرض .
- طب يتكسف ويخلي عنده دم ، ويقول يا واد اعمل لعيالك ، دول بقو رجاله ، وبعدين هو فيه حاجه ، دا وحياتك كله كدا لعب صغار ، هيه ... فوتكو بعافيه .

* * *

ابن اختى راح فى دقيقه واحده .

كان صغير ، وابوه مدله ع الآخر ، ما كانش يقول إلا روح يا سبع ، تعالى يا سبع . كان يجى يقعد معايا بالساعات ويحكى لى : يقوللى : يا خالتى الحرب دى أهوال ، واللى شفناه فى اليمن معقول نشوفه تانى !! كنا بنضرب فى بعض مش عارفين مين مع مين ؟ والجينا اندارو علينا ويقو يضربونا .

حرب ملهاش معنى ، كنا لما نزهق نذك البلد باللى فيها دك . نجيب عاليها واطيها . كنا بنموت بالميات . كنا بنشوف الواحد فينا بيموت ومانقدرش نعمل له حاجه ، وفى مره كنا اربعه عطاشى جعائين . والدنيا نار ، والشمس قاده ، وكانو لو شافو واحد منا يضربوه ، فضلنا بغطشنا لحد ما جيتا مصر ، مصر اللى ربنا دعى لها . شفتى يا خالتى ام عكاشه مش انتى بس اللى مجروحه . انا سايبه اختى فى البلد عماله تهر ، ولا حدش قادر عليها . فرشت جنب طربته ونامت . النار كاويه الكل .

- طب انتى يا حسنه ، واختك عارفه طربه ابنها ، الدور والباقي عليا اللى ماعرفاله قرار . إن كان حى ولا ميت . هاروح بنارك يا ولدى ، حزينه عليك ليوم الدين .

- روقى يا خالتى ، ما هم بينجو من الحرب ويموتو موته تانيه .
كله بتاع ربنا . يعنى ابن اختى رجع من اليمن ، لكنه راح فى دقيقه
واحد . كان مسطح على القطر ، وقام وقف وماخدش باله . طب
وقع والقطر فرمه . روقى . . روقى ، وحياة الغالى لا تهدى . والفاتحه
لكل الميتين ، اقرى لهم الفاتحه اقرى ، ربنا يكرمنا زيهم .

* * *

مادريتوش ؟

- ايه يا وحيد وقعت قلبنا .
- بيقولو عروسه اختفت فى اسكندريه . الأرض انشقت وبلعتها
- وهيا ماشيه فى الزفه مع عريسها .
- يا ساتر يارب .
- وبيقولو نزل وراها الرجاله ، مالمقيوش حاجه ، غير فردة جزمه .
- يالهو بالى .
- استر يارب .
- يا حفيظ ...
- وبعدين يا وحيد يا بنى كمل .. كمل .
- بيقولو الحكومه قاله الدنيا . وماحدثش عارف حاجه .
- وده سمعته فين ؟
- شفته فى الجزنان ، بص يا ابو سعد ، تعالو بصو ، بصى يا
- زنه ، آهه آدى الشق ، وآدى الناس .
- دا بير غويط ، شوفو يا ولاد .
- طب انتو ماعرفتوش إيه اللى حصل امبارح .
- بيقولوا واحده قتلت ابنها هيا وعشيقها .
- وى .. وى . كيف تقتل ضناها . وهان عليها ، وجالها قلب .

- آمال ايه بكره يا زنه نسمع عن اللي قتل امه ، واللى قتل ابوه .
- آه يا اخي ، قلة ايمان ، شوف يا أبو سعد الدنيا خيرها قل ،
والناس نسيت ربنا .

- حقه يا ولاد ، لو ده حصل تبقي القياامه هاتقوم .
- دى علامات الساعة : حسان اليماني قال الدنيا جت على كفر ،
وها تروح على كفر .
- (يا خفي الالطاف نجنا مما نخاف : بالطيف : بالطيف لك في كل
البلاوى تصريف) .
- إلحقى يا حسنه جوزك اتدروش .
- ما هيا حاجه تشيب لقرع يا ولاد ، حد يصدق ان ده يحصل .
بقى مصرام الدنيا ، اللي الرسول دعى لها ، يحصل فيها كل ده .
- لا ومن مين يا حسنه من شويه يهود لا عندهم ذمه ولا دين .
- يارب نزل عليهم نجمه تحرقهم ولا فيضان يغرقهم قادر يا كريم .

.....

الشتا ييجى والبيان تتقفل على بلاوى .

والليل يطول ، والسهر يحلى قدام الراكيه ، والشاى السخن .
والحواديت تتحكى والكلام يزيد ، وجبل الكلام مالوش آخر .
والسهرايه تطول ، وتونس بالحكايات ونقلب فى اللى راح واللى
جاي ، والعيال ، يتدفسو تحت اللحاف ، اللى يذاكر ، واللى ينام ،
واللى يلعب وهو قاعد . والله الايام الحلوه يا ولاد بتخلص ،
والضحك غلى . طب من قد ايه ماضحكناش ، ولا عملنا حلاوه .
فاكره يا بت يا ام رامي ، لما كات زنه تعمل ، حلة حلاوه قد كدا ،
وتدور تفرقها علينا ، كنا بنبقى زى اللى فى عيد ، ولما زنه تعمل كاكا
ماكا ، وصويتها يطلع الشارع والعيال تهيص ، ويخطفوها ، ويدورو
ياكلوها ، وف الآخر يلزقو بعض بيها .

- ولا فاكره يا حسنه لما مسكو ، الواد ابن ام فيفى ودهكو راسه ،
والواد راح لامه يعيط زى العبيط ، وهيا فضلت تصوت ، ولت علينا
الشارع .

- ما هو واد عبيط وعامل زى البنات . هو كدا الواد فى وسط
بنات ييقى بنوته ، والبت فى وسط صبيان تبقى ذكر .

- حقه يا حسنه ، البت أوفه ، بتنى المخفيه ، ساعات باحسن أنها

- بت دكر ، وما فيهاش من الأنوثة شىء .
- انتى بتتك دكر ، وانا بنتى هايجه ، وزنه بناتها عفشين ، ولا ما احنا عارفين هايتهجوزو ازاي دول .
- يا اختى بكرة خراط البنات يخرطهم .
- واللى جوز زنه ، يجوزهم .
- دا كان زمان يا ام حسن ، النهارده ، الراجل عايز واحد متعلمه زيه ، ويمكن يكون عايزها موظفه كمان .
- حقه يا ام رامى ده كوم ، والوظيفة اللي طالعين فيها الايام دى كوم تانى . امبارح رحلت اقدم للبنات بطة فى مدرسة المسله إلا ولقيت لك مين هناك .
- مين ؟
- تصدق بالله انا ما عرفتھا حطه لخمر ولبيض وعمله شعرھا السد العالى وھا اللي عرفتني ، وجابت لي شاي كمان . البت الكبيره بنت ام فيفى .
- مين ؟ افكار ، فيفى .
- قال ايه بشتغل سكرتيره فى المدرسه . وراحت واخده منى الورق وھا اللي ملته ، وقدمته . وسألتنى ليھا اخوات هنا . قلت ليھا لا . اخواتھا كلھم فى شجرة مريم . بس انا عايزھا تبعد عنھم ، عايزھا تبقى لوحدها ، أصلھم بايظين ، وكمان العيال ولاد اللامون

بينطو من ع السور وينزلو الحوش ويضربوهم ، وياخدو منهم الاكل .
وانا خايفه عليهم ، وكمان هناك سوق سميكة ، خليها عندكم
احسن . يمكن تفلح .

- يخييك ربنا يا حسنه ، انتى ماسمعتيش ، يا مره ، عن عفاريت
المسله .

- عفاريت ؟

- ايوه يقولو فيه عفاريت ساكنه الأرض ، اللى فيها المساخيط ،
هناك عند زرايب الخنازير ، عند الطرب ، فى العرب . قال إيه
الأرض بتتنشق ويبطلع عفريت يخطف العيال وينزل تانى تحت
الأرض . دا الدنيا هايجه ، والحكومه قابله الدنيا هناك ، قال يقولو لقو
اشارات هناك وهما بيفتحو .

- يالهو بالى نروح فىن ونيجى منين .

- أنا عن نفسى يا حسنه بعمل إيه ، كل يوم بودى البت ألفت
المدرسه وانا رايحه السوق ، وارجع اجيها بنفسى ، مابقتش آامن
عليها المخفى رامى . كان بيسيها ويروح يركب عجل ، وهيا ترجع
لوحدها .

- إحنا احسن حاجه يا صباح نقعد العيال من المدارس ونزريج
دماغنا ، بلا تعليم بلا وجع قلب .

- ومين سمعك يا حسنه انا عن نفسى ، قلت لبنت الشرموطه

أوفه ، لو مانجيتيش السنه دى فى سنه رابعه ، هاقعدك ، خصوصا
المخفى رامى طالع وراها ، والمصاريف تقلت علينا ، وكمان المخفى
وديع هيخش . السنه دى هو كمان . الواحد مش عارف يلاقىها منين
ولا منين ، من المدارس ، ولا من الحرب ، ولا من الغلا .
- آه يا اختى الواحد غلب وغلب غلبه . مش عارف يلاقىها منين
ولا منين ؟

من يوم ما المهجرين جم والحاجه زادت الطاق طاقين .

والدنيا غليت علينا .

- آه يا ام رامي ، ما هو حدايه من الجبل تيجي تطرد أهل الوطن .
 - جبل إيه ، ووطن إيه ، يا زنه !! دول أهلنا واخواننا .
 - يووه يا زنه ، سدك كدا واقفالى ع الواحده .
 - اسكتي ، اسكتي ، وانتى مش عارفه حاجه .
 - طب إيه رأيك من يوم ماجت الوليه ام جلامبو ، والدنيا بقت نار، والعيشه مش طايقينها .
 - دى مين دى اللى بتنده عليا .
 - عاوزه حاجه يا زنه نيحي، تحبى اقوم لك .
 - شفتى آهى جات ع السيره ، مبسوطه يا حسنه عاجبك كدا .
 - جرى إيه يا مره ، تحبى نقوم لك ولا إيه .
 - لا يا اختى فضلة خير ، دى زنه ، هيا كدا لسانها متبرى منها ،
- وبتحب تهزر . تهزر ولا صابحه تقول يا شر اشتر .
- ما احنا آهوه كافين خيرنا شرنا، قاعدين ، سينا دارنا ، وسينا وطننا، تركنا الجمل بما حمل ، وطلعنا يا مولاي كما خلقتنى .
- اسم الله يا اختى ، جيتى وسط أهلك وناسك ، والله يا شيخه

لا انتى ساكنه، وكفياكى بكا ، يا حول الله يارب، يجازيكى يا زنه ع الصبح ، قلبتى المواجه .

- جوزى كان راجل بمبوطى قد الدنيا ، وكنا ساكنين فى حى لربعين ، وابويا كان بيشتغل فى الكتال . انضربنا ، واتهدلنا ، قمنا شيلنا العيال هيللا بيللا ، وهاجرنا . أنا جيت المطريه ، وامى سافرت بلدها عنداخواتها، واختى راحت الصعيد عند أهل جوزها . يعنى اتفرقنا وكل واحد راح فى يمه . ابويا وجوزى قالو مانسيش الأرض، لازم حد يفضل . فضلت الرجاله ، وجات الحريم .

- حريم مين يا امه ، آمال الرجاله اللى مالين سوق السمك ، واللى بيتاجرو فى كل حاجه ، واللى دايرين يهللو، ييقو مين ؟
- تانى يا زنه تانى . إحنا هليه ؟ طب والله دى ما هيا معديه لك بالساهل ، واما ييجى جوزك ، راح نقول له على كل حاجه، يا ناشفه ، يا خياصه .

- يووه يا زنه اكنمى واختنشى آمال، انتى شبطه يا اختى ، نار ماتنطفش .

- آه يا ولاد لو شفتو اللى شفتاه ، ولا عشتو اللى عشتاه ، لما نار جهنم تبقى فوق روسنا، وطيارات العدو مالية السما زى المطره، وترخ على روسنا كنا بل ، تبقى حاسس إن القيامة قامت . اللى بيوتهم اتهدت ، واللى تجارتهم راحت ، والى عيالهم ماتو ، كل ده ، ومش

طابقنا وسطيكم ، وانتو هنا نايمين وسط عيالكم ، ولاخسرتوش
حاجه . واحنا اللي خسرنا الجلد والسقط .

- وعشان كذا جايين تشطرو علينا ، وكل يوم والثاني عيالكم
يضربو العيال ، وبعدين الحراميه والنور كترو اليومين دول . عالم
صايحه لا شغله ولا مشغله ، طول النهار متلطحين ف الشوارع زى
الديان .

- عيب يا زنه اكده .

- اكده ! هو انت صعيديه ؟

- أبويا من سوهاج ، جه السويس ورا أكل عيشه . انتى يا زنه لو
كتى شفتينا قبل الحرب ماكتيش قلتى اكده .

- إيه ، كتى السفيره عزيزه ؟

واكثر . كان الرزق بيطف من الحيطان ، ومفرق الدنيا . وينلعب
بالفلوس لعب . وفى يوم وليله ، كله راح . الفلوس ، والبيت ،
والأرض ، والعيال .

- يووه يا زنه ، مافيش فايده ، حتى لو قطعو من جتك بالخته ،
انتى هو انتى ، واللى فيه داء عمره ما يسلاه . الوليه فى حالها ،
كافيه خيرها شرها ، مالك ومالها . وبعدين دول ضيوفنا ولازم
نشيلهم على راسنا من فوق .

- والله يا حسنه انت حماره ، وناقص يطلع لك ديل ، وما انتى

فاهمه حاجه . صح يا ام رامى ولا لا ، حتى اسألى لوزه مرات
عبيد، دا حتى بدر المجنونه شافت ، وسمعت ، وانتى كدا هتتك كدا
وعلى نيائك ، جاتك خيبه مره .

- ماتزعلش يا ست أم جلامبو ، زنه دى طيبه وقلبها ابيض .
وانا من سوهاج من إدفو، وياما سافرت السويس مع المرحوم ابويا ،
كان لينا قرايب هناك . وزنه دى ، من لقصر ، بس هيا كدا ، لسانها
متبرى منها .

- أيوه ، كلکم طلعتو قرايب ومافیش غریب فی البلد الا احنا .
- أيوه ، يا حسنه اتلم تتون على تانتن ، طلعو لتنين انتن وانتن .
- حوش يا علوه عنا مراتك .
- فيه إيه يا مره . مراتى دى مش هاتلنم ، إلا لما اسمها، زى
الفيران .

- يا اخويا انت راخر ، وانا مالى . ماهيا البلد هيا اللى فيها
كلام، والكل بيتكلم ، اللى يقول عليهم حراميه ، واللى يقول نشفو
علينا الميه فى الزير ، والحاجه غليت، وبقت بالغلا والكوا . امبارح
رحت أجيب كيلو قوطه ، كنت باجيبه بتعريفه، وسواعى الثلاثه
بقرش . النهارده رحى أجيب ، البياح مارضيش يخلينى احط إيدى ،
وقاللى الكيلو بقرشين . ولما قلت : والغلابه يجيبو منين ؟ قاللى :
بلاش تاكلو قوطه ، كلو مش .

- بتقولى إيه يا زنه .
- هو ده والله يا ام رامى اللى حصل ، وجيت افهم فيكم مـ الصبح ، مش عايزين تفهمو .
- يعنى الدنيا ولعت . واللى زينا يجيبو منين . يا ساتر استر يارب . ألطف بعبيدك يا لطيف . يعنى بكره الرغيف يبقى بقرش . والرتل الجاز يبقى بقرشين .
- أيوه يا حسنه . انا سمعت ع القهوة امبارح ان الجاز هايبقى بالكوبون على التموين .
- بالطيف بالطيف ، لك فى كل البلاوى تصرف ، وإيه يا علوه ، سمعت إيه كمان ؟
- سمعت حاجات كتير . بيقولو كل حاجه هتبقى على البطاقه . الزيت ، والسكر ، والرز ، واللحمه ، حتى القماش هايبقى بالبطاقه .
- يا لهوى . على كدا الواحد يلم الحتين العيال ، ويطلع بيهم ع البلد ، آهو يرمحو فى الارض ، وياكلو .
- يا حسنه يعنى الغلا هنا ويس . الغلا هتلاقيه فى كل حته .
- اهو يا علوه حتى نبعد عن الضرب حبه ، وكل شويه طفو النور ، والغاره تضرب ، حتى المدارس ياريتهم يفتلوا .
- المدارس مش مهم . الخوف لا اسرائيل تضربنا زى ما ضربت ، الكنال .

- انا سمعت امبارح من العيال ان يقولو لهم فى المدارس . خلى اهلاليكم يدهنو الإزاز ازرق ، وكل بيت بينى قدامه حيطه . وانهم لو لقيو حاجه فى الشارع أو على الارض ، ماحدش يوطى وياخذها . شوكلاته ، بسكويت ، قلم ، لعبه ، أى حاجه . يقولو دى متفجرات ، الطيارات بترميها .

- حقه يا حسنه . أجرين الواد رامى ابنى ، بيقوللى ، دول لقيو واحد اسرائيلى عند القسم نازل بالبراشوت ، ومسكوه .

- اسكتى ، طب إيه رأيك ان البت نبويه بتقوللى ، انهم مسكو اتنين فى سوق سميكة ، عاملين نفسهم شحاتين ، ويبخطقو العيال ، ويدبحوهم عند العرب . قال إيه فى المسله كنز ، ومش هابطلع ، الا بدم اربعين عيل . ولازم يكونو ولاد .

- آه ممكن . الطرب هناك ، يدفنوهم ولا من شاف ولا من درى .
- طب إيه رأيكم ، انا سمعت ، من واحد صاحبي فى القرن بيقول ان عندهم فى البلد واحد اسمه محمد الميت . ده مات وبعد ما اندفن ، وقعد فى الطربه اسبوع يفتحو الطربه لقوه صاحى وعمال يلعب .

- يا اختى ، يا اختى . علامات القيامه يا ولاد . القيامه قريب .
- طب إيه رأيكم بقى ، والكلام دا فى سركم ، ان امبارح ، ابو رامى قاللى حاجه غريبه ، وانا افكرته سكران وبيخرف . قال بيقول

- إيه، ان العدرا طلعت له وهو ماشى جنب سور الكنيسة، فى الزاتون.
- العدرا طلعت ، أدى اللى كان ناقص . مش باقول لكم ان القيامة هتقوم . طالما العدرا ظهرت ، يبقى المسيح هينزل ويقتل المسيح الدجال . يبقى الدجال ظهر يا ولاد ، واحنا مش عارفين . مش يمكن هو واحد من اللى عاملين شحاتين ويبيخطفو العيال .
- لا يا حسنه . المسيح ده لسه بدرى عليه شويه ، لكن دى علامته، احنا سمعنا فى الكنيسة كدا .
- يا لطيف اللطف . يا خفى الألفاظ نجنا مما نخاف . يا لطيف الطفل بنا دا حنا عبيدك كلنا .
- إيه يا حسنه . كدا تتجنتى .
- اتجنن يا علوه ؟ هو فيه اكر من كدا جنان .
- اسكتو يا ولاد اسكتو . مادريتوش .
- إيه يا ابو رامى ، وإيه اللى جايبك بدرى كدا ، وجاى قاطع النفس، حد بيجرى وراك .
- حد إيه . الدنيا مقلوبه بره، والناس ماله الشوارع يقولو العدرا ظهرت فى مسطرد . وفيه ناس شافت راجل اعور بعين واحدة شايل على ظهره قرية ميه، وماشى فى سوق سمبكه يسقى الناس .
- يا لهوى . هو المسيح الدجال . زمان الشيخ قال لنا فى الجامع ، انه هابظهر ويبقى شايل على ظهره قرية ميه . واللى يشرب منه ،

ينسى امه، وابو، والدنيا كلها ويمشى وراه . لغاية لما يبقى مفش غير
عشره هما اللي هيرفضو يشربو . وهما اللي هتفضل فى قلوبهم كلمه
لا إله الا الله . وزى الدنيا مانشأت على كفر هاتروح على كفر .
والناس هتاكل بعضها، والحروب تملا البلد . والميه تخلص من ع
الأرض ، يقوم المسيح ينزل ويقتل المسيح الدجال . وتقوم القيامة .
حسان اليماني قال كذا . قال : قال زى مانشتت على كفر ، هاتذهب
على كفر .

- يالهو بالى يا ام جلامبو . واحنا هانعيش لما نشوف كل ده .
- لأن .. إحنا فين . لا احنا ، ولا عيالنا ، ولا عيال عيالنا . ده
هايحصل فى آخر الزمان .

* * *

.....

ماما جابتلى أشارب حرير

نيمتى على السرير

والسرير طوح طوح

مايخلىش حد يروح

إلا جمال ومراته

والناس تحلف بحياته

حياته عمر حنه

أكبش منها واتحنى

- من يوم ما مدرسة بحر البقر انضريت ، وقعدو العيال من
المدرسه ، والعيال فرحانه ، ومابقاش وراها لا شغله ، ولا مشغله
غير اللعب ، وتصديق الدماغ .

- وياريت على كدا ويس يا حسنه . إلا فى الآخر يلعبو ، يلعبو ،
ويروحو غادرين على بعض ، وهاتك يا ضرب .

- صدقتى يا ام رامى ، عمرهم ما كانوا كدا ، إلا دايمين كانوا
اخوات وحاييب ، واللى فى ايده حاجه بيدى الثانى .

- هما عيال ام جلامبو ، اللى علموهم القساوة ، عيال غدارين ،

وخطافين ، دايمن يخطفو اللعب من إيد العيال . والغرابه ييقو ضاربين
العيل من دول ويروحو يشتكو ، ويعيطو لامهم .
- ما هو ضربتي وبكى ، وسيتنى واشتكى .
- حقّه يا زنه ، عامله زى الغرابه هيا وعيالها ، وتطلع من طلعتها
لفطستها ، ماحدش عارف بتروح فين ، ولا بتسوى إيه .
- بصو يا ولاد معايا كدا . مش دى لوزّه الى قاعده جنب الحيطه
هناك ، عند أوضتها عماله تعيط وقاطعه خنس .
- آه صحيح يا حسنه ، دى باينها بتبكي .
- أيوه يا زنه ، وحاطه إيدها على خدها .
- بصى يا ام رامى معايا كدا ، اتدهى عليها .
- يا لوزّه ، يابت ، كفى الله الشر ، قاعده بين لعتاب كدا ليه ؟
- اسكتى يا ام رامى وسينى فى حالى اله لا يسيتك .
- قبرى يا حسنه قبرى ، البت صدغها ببيخر دم . يا لهو بالى يا
ولاد ، شوفى بُن يا زنه عند ام فيفى ، ولا حد من الجيران ، اجرى
يا بت شهيلى ، البت خدها بيشلب دم .
- بت يا لوزّه . مين اللى عمل فيكى كدا يا فقره .
- الله يخيه راجل من دون الرجاله ، المخفى جوزى ، اتمكن منى
امبارح ، وراح قاطم خدى .
- يخيك مرّه . وتسييه يابت لما ياكل خدك بالشكل ده ، يا عره
النسوان .

- اعمل ايه يا ولاد . ما هو غصب عني . امي وابني نايمين معانا
ع السرير ، وابن الكلب عايز ، اجيبه شمال ، اجيبه يمين ، مافيش
فايده . خفت يصحو ، سكت .
- يخييك ، تسكتي لما ياكلك بالشكل ده .
- اعمل ايه عايز يتشطف . وامى وابني راكبين على نفسنا ،
ومافيش حد عنده دم . تعرفو انا ساعات بانزل تحت السرير ،
واستخبي ، المخفى عفى واتا غلبانه ، وهو برضو مش عارف ياخذ
راحته . لاو وياه باين عليه قاعد .
- قاعد يا اختى .
- قعد على قلبه حجر ، من يوم ما عرف انى باشتغل وهو مطيز
لها ، ونايم فى الحظ .
- البن آهه . لفيت لحد ما لقيته .
- هاتى يا زنه هاتى . وياريت تجيبى مرايه من عندك .
- المرايه آهه فى صدرى .
- بصى يا حزينه بصى . شوفى القهران .
- بس لحسن امى تسمع .
- تسمع ! ماهانشوفك .
- امى نظرها على قدها ، ولما تعرف ، يبقى يحلها رينا .
- طب واينك ؟

جرجس العسكرى ، اشترى أرض فى المرح وهينيهها

- اسمع يا سراج ، احنا مابقاش لنا قعاد هنا ، لازم نغزل ، العيال كبرت ، والأوضه ضيقه ، ورب هنا ، رب حته تانيه . اسمع انا من الصبح هاساعدك .
- تساعدنى ازاي يا صباح ، ما انتى بتخيطى معايا الجزم . وانا بادق مسمار ولا مسمارين ، وأهى ماشيه .
- الجزم فى المحلات مالیه الدنيا ، انا هتاجر ، الرزق يجب الخفيه . هاشترى كام فوطه ، على كام ملايه ، وهابيعهم بالقسط .
- منين يا صباح داحنا يا دويك ، انتى فاكرو ، انتى مش عارف انتى بتعملى إيه ، بتروحي السوق آخر النهار ، وابو قرشين تمجيبه بقرش ، بتشتري الخضار شروه .
- على العموم وحياة رامى وألفت ما انا ساكنه ، الا لازم اسأل وانتطقس ، واروح للوليه مرات جرجس العسكرى اللى بيعى لك بيادات العساكر .
- وأسألها . أصل انا باحلم ببيت ملك . امبارح وانا بانده على أم احمد الدايه ، شفت بيتها ، حاجه إيه ترد الروح ، واحنا ماشيين نتكلم عن الدنيا والغلا اللى نازل يرخ ، قامت قالت لى : اسمعى يا

بت يا مرات الجزماني ، انتى شاطره ومدبره ، وجوزك على قده فيه
أرض فى المرح ، رخيصه ، اشترى حته كدا وروحي فيها ، انشاله تبني
عشه بالصفىح وتقعدى . أهه اسمه ملك . وحياتك انا عامله البيت
ده من تدبير ايدى ، هو عمك ابو احمد إيه؟ حته عسكرى فى
القسم .

- صحيح يا صباح .

- آه والله ، الدنيا كلها على كدا . والبت نبويه محوشه معايا
قرشين . آخدهم ابيع واشترى ، ولا تفرج ارجعهم ، ولا من شاف ،
ولا من درى . ويمكن اسأل ام فيفى على جمعيه صغيره ، بريال فى
الاسبوع كدا ولا حاجه .

- اعملى اللى تعرفيه ، أنا خارج .

- يرزقك برزق غيبى ، لا يتحد ، ولا يترد ، ولا يكون له فى
الدنيا قد . يا سراج يا ابن دميانه .

سالخیر یا ولاد .

- مین خالتی ام عکاشه ؟ هل هلالك شهر مبارك .
- ازیک یا حسنه یا بتی .
- ازیک اتی .
- ایہ یا ولیہ غطستی مرہ واحده ، کدا لیہ ؟ کتی فین؟ انفضلی ادخلی .
- آہ یا بتی . لفیتها عزب وبلاد ، ماخلتش مطرح إلا لما لفیت فیہ . ماخلیتس باب إلا لما دقتہ .
- حکایة ابنک برضہ .
- هو حد واجع قلبی غیرہ .
- یا حبیبی یا اختی .
- زرت اولیاء الله الصالحین . فتحت المندل ، شفت الأثر . ولا حس ولا خبر . ولدی ضاع یا ناس ، ابنی ضاع یا خلق ، ابنی راح ولا رجعتش .
- إلهی بصیر قلبک . إرخی علیها الصبر من عندک یارب .
- ماجابهمش قلب واستریح . وولادک یا خالتی . یدورو معاکى ؟
- ولادی ! کل واحد ملهى على أكل عیشه . هما منا ، لكن

أحنا مش منهم . ابنك طول ما انتى بتأكله ومحتاجلك . لكن أول ما يتلم له على مرّه ، قولى ياللا السلامه . آه ربت الحايه للغايه .
- ربك مسيره يعدلها ، هو اللي لا يغفل ولا ينام . قادر يرجع ابنك هو وغيره .

- مالك يا حسنه يا بنتى ، عمرى ما شفتك حزينه كدا .
- أقول إيه يا خالتى ، واعيد إيه . الراجل اتدروش ، وبقي يغيب بليام والليالى وأسأل ، يقوللى كنت مع الإخوان فى حضرة عند زميلنا . مرّه فلان ، ومرّه علان . مره فى البركه ، ومرّه فى بلقس ، ومره ف الشرقيه ف مولد ابو مسلم وأهو داير يعط ، وسايب الجمل بما حمل ، واللى زاد وغطى ، مايروحش الشغل ، وكل ما أسأل عليه حد ، يقوللى ماجاش ، هادور انا ، ادور عليه مرّه فى المرج ، ومرّه فى القليج .

- من إمتى يا بنتى؟ دا طول عمره راجل دوغرى وفى حاله ، إخوان إيه؟ وحضرة إيه ؟ شايغنا فايقين ورايقين .

- البت تبويه الفحلله ، رخره من امبارح مارجعتش ، وسمعت طراطيش كلام وانا باجيب العيش من القرن الصبح ، انها متلميه على واد فحل زيه ، ودابيرين ينكشو فى الزبايل سو .

- ودا واد مين ده ؟

- أنا أعرف ، بيقولو ، واد اسود كدا ، من العيال المهجرين ، اللي

طلعولنا فى البخت ، كنا ناقصينهم روخرين .

مش عارفه ارواح فين ؟ ولا آجى منين؟ دبرينى يا خالتى .

- التدبير لله يابنتى ، تبات نار تصيح رماد . تعالى نلف عليها ،

نسأل العيال .

- سألت . حتى الواد ابن ام لالو العبيط . رحت لاهم الدكانه

وسألتها . بس امه قالت حاجه غريبه ، قالت بتبيع سمك فى السوق مع

العيال السوايسيه .

- طب ما تروحي تسألنى عليها .

- يه ، رحت ، وخوضت فى زفارة السمك ، ما خليتش مطرح .

جيتها من عزبة العقاد ، للميدان ، لشارع المطراوى ، للامون ،

لمساكن شجرة مريم ، لسوق سميكة . ولفيت من ورا الكنيه

وعديت ، رحت أرض البلسم والخارجة ، ومحطة القطر ، ولفيت

ورجعت عين شمس ع المسله على شارع الترولى ، ورجعت تانى ع

الميدان . رحت القفاصين والزاتون . ماخلتش ، لحد وابور الميه ،

ورجعت واندت على الطرب القديمه ، بشارع الصحه ، بدابير الناحيه

وجيت من عند سيدى ابراهيم لفت المطريه لف . أنا قلقانه ، الراجل

والبت ، هجو مره واحده .

- أمال فين العيال ، انا شايفه البيت فاضى ؟

- ام رامى وعيالها راحوا يَمّه ، لوزه وحسن راحوا يَمّه ، وسعيد

وام فيفي وعمالها راحو يمه . الشارع كله بيلف ، الناس كلها بتدور ،
حتى وحيد خد ديله في سنانه وراح طالع ع القسم يبلغ . وقال
هايطلع على شكرى والدمرداش .

- روقى ، روقى . والغايب مسيره يرجع . ما انا ايه ، سنين
وايام . فين من ايام النكسه وانا بالف .

- اله يصير قلبك . يرجعه لك سالم غانم هو وكل اللي زيه .

- اسمعى يا حسنه ، خشى اتوضى ، واستغفرى ربك كدا ، وتعالى
اما نصلى لنا ركعتين لله فى سيدك المطراوى . واحنا ان شاء الله
هنرجع نلاقهم ، ولا اقولك ، قولى شالله يا اهل الله ، واندرى ندر
للسيده . ولا قولى شالله يا عدرا ، يا ام المسيح ترجعى الغايب ،
واندرى لها ندر ، قولى لها ، ياللى المطريه حمتك وقوتك ، انتى
واينك . وابقى روحى عند الشجره وملسى عليها ، يمكن ربنا يفك
عنك . تعرفى يابت يا حسنه ف المولد بتاع العدرا اللي فات ، انا
رحت وحطيت فى الصندوق اللي فيه النصيب ، ولفيت حوالها .
وانا باقول لها وبابوس اعتابها : أنا سايقه عليكى حبيبك ، خرجى
اليهود ولاد الكلب ، اللي خدوا ضناكى ، واللى طفشوكى من بلدك ،
وجيتى حدانا يا عدرا ، رجعى الغايب ، رديهولى . وحياة المسيح
حبيبك اللي اتكلم فى المهدي ، وحياة من رفع السبع سموات وحما
ولذلك ورفعه عنده ، إوعى تنسنى يا عدرا .

- إيه يا خالتي . ما بقاش الا النصارى اللي نطلب منهم .
 - اسكتى يا بت ماتخييش . طب إيه رأيك ، أنا رجعت من
 عندها حاسه كإن هم كان على قلبى وانزاح ، وإن ربنا مش هايخيب
 رجايأ . وندرن عليا ، والندريوفى الدين ، إن جاني خبر عن ابني ،
 سوى حى أو ميت ، لأعمل ليله لأهل الله ، وودى للعدرا اللي فيه
 النصيب ، طب والنبي لودى لها خروف ، وادبجه ع العتبه ، وافرقه
 عندها ع الغلابه . اسكتى يا بت اسكتى . خصيمك النبي ما تعيبي
 فيها ، اندري لها حاجه وشوفى . كله عشان الضنا يهون ، قومي يا
 بت قومي ، نلحق المغرب فى سيدك المطراوى ، المغرب غريب .
 وادعى وقولى : يارب نزل عليهم نجمه تحرقهم ، ولا فيضان يفرقهم ،
 اليهود ولاد الكلب . ادعى يا بت .

اللى جوزها غايب ، ناكل الطبخ نى ونقول عليه طايب .

- مالك يا حسنه قاعده بين لعتاب ليه ؟ دا مش كويس عليكى
والدنيا مغارب .

- أبدا يا لوزه . العيال لحد دلوقتى مارجعوش ، وقلقانه .

- بروضو ماحدش رجع .

- أبدا . لا الرجاله رجعو . ولا البت جت . ولا اللى خرجو

يدورو حد رجع وبل ريقى .

- معقوله ؟!

- طب الوليه ام جلامبو فىن هيا وعيالها ؟

- قال إيه ، راحو مولد العدرا ، خدو فسيخ وبصل ، وراحو

مسطرد يتفسحو . طب إيه رأيك يا حسنه ما تيجى نروح ، مش

يمكن نلاقهم هناك . تكون بنتك خدت حاجه كدا ولا كدا ،

وراحت تبيعها فى المولد . ما انتى عارفها ، تحب القرش زى عينها .

وتجيبه من تحت طقاطيق الأرض .

- آه والنبي ازاي فاتتنى الحكايه دى . طب استنى خالك ام

عكاشه بتعمل كبنه وجايه ، كنا هنروح المطراوى نصلى وندعى .

- مطراوى إيه ، سيبك من الوليه الحرفانه دى ، قومى ، قومى ،
بلاش كسل .
- ولا يكون حد من العرايشيه لاف عليها .
- عرايشيه .
- أيوه .
- فيه واد كدا ، بيعع امشاط وفلايات بيقف على ناصية أبو شراقى ،
شفتة كذا مره واقف وياها ، يقولو له يا مليم .
- يا نكدى . انتى تقولى عرايشيه ، وام لالو تقولى سوايسيه .
- اسكتى باينك خاييه يامرّه ، ولا تعرفى التره من الفره . كله من
الوليه ام جلامبو جلابه المصايب ، هيا اللى فتحت عينها على القرش ،
وطمعتها ، ودائره تحوم حواليتها ، عايزه تاخذها للواد اخوها ، واد
فحل وابيضانى ودمه سم ، باشوفه فى سوق سميكه كثير ، بيعع
فسيخ وملوحه . دا حتى ام جلامبو اتخانقت مره مع العيال العرايشيه
اللى فى الشارع اللى ورانا ، وقامت مجزره ، بين السوايسيه بتوع
السمك ، والعريشيه بتوع الفسيخ والملوحه ، وبتك كانت وياهم .
- وماقولتيش ليه يا لوزه من ساعتها .
- انا باحسبك عارفه .
- كدا سايبانى على عمايا ، وأكل فى روحى . منك لله يا ابو
سعد ، منك لله يا اخويا سايب الفحوللا بتوعك عليا وهاجج ، الدنيا

اتغيرت ، والوحوش كثرت ، والعيال هتروح منى .
- ولا هاتروح ولا حاجه . انتى بس اللى قاعده ، مابتخرجيش ،
ياللا ، ياللا نروح المولد ام رامى والعيال رايعين .

* * *

بتخافى يا ألفت بتخافى ؟

- طبعاً باخاف ، باخاف قوى ، إبعده بقى يا سعد ، لحسن أهلى كلهم فى المولد وحد يشوفنا ، يقول لخالى ، وانت خالى ده ماتعرفوش . امى بتقول خالك ماهر ، واعر قوى . انا هامشى لحسن شايفه طارق ابن خالى بيص علينا ، آهو قرب آه .
- سقفو ، سقفو ، خلى العدرا تظهر ، سقفو جامد ، مالكم كدا خافين ، آهه هتظهر ، إوعو كدا وانتو عيال خيخه .
- عدرا إيه اللى هاتظهر ، باين الواد ابن خالك ده عبط ، ولا فيه عدرا ولا حاجه .
- إوعى تقول كدا ، ولا حد يسمعك ، لحسن يطروونا بره ، آهو سقف ، واعمل زى ما بيعملو .
- يا شيخه روحى باين عليكى هبله زيهم ، انتى مصدقه ، دى تخاريف .
- اسم الله عليك ، إوعى كدا وانت باين عليك خايب ومش عارف حاجه ، الله مين اللى جايه هناك دى ؟
- إيه . دى البت البيضة التخينه بنت ام فىفى ، إيه اللى جابها هنا ؟

- البت دى أنا ماباجبهاش ، الواد رامى اخويا بيقول إنها معاهم
 فى الفصل ، بت أليطه وطالعه فيها ، على إيه ماعرفش !
 - اسكتى يا هبله اسكتى ، دا الواد حسن اخويا بيقول عليها بت
 لهلوبه ، وشاطره ، والمدرسين بيحبوها ، ويمكن تطلع الأوله السنه
 دى فى سنه رابعه ، دا بيقول إنها أشطر منك .
 - اشطر منى ، روح ، روح ، وانت عبيط زى اخوك ، دى لا
 شاطره ولا حاجه ، دى حتى دمها سم ، انا هامشى مش عايزه اسلم
 عليها .
 - خدى يا بت يا ألفت خدى . والله صدق اللى قال عليكى هبله
 بصحيح .
 أما نروح نشوف الوز المزغط ، اللى زى القشطه ده ، قال دمها
 سم قال، دى غيره وحقد وخيايه .

* * *

الدنيا غريبه ، كبيره .

زنه ابنها يموت ، وتمشى بالليل ، وانا ابويا طول الاسبوع بره
ماينشفهوش ، وعمى زمر طول النهار يدق مسامير فى الجزم ، وانا
قاعد فوق السطح اسمع دقه فيها . وعمى وحيد حمار كل همه السيمه
وهو حمار ، فاكر نفسه فريد شوقى . وخالتى لوزه جوزها غلبان
عواطللى ، ويدر جوزها يموت ويفرق فى الحلوه عند معدية عثمان ،
وامى ، امى دى غلبانه ، فاكرانى صغير مش عارف حاجه . ناسيه
انى اكبر من نبويه الفحلله .

- يا معار ، دا انت قد رامى عندك تمن سنين .

- رامى مين ابو شخه ، روحى ، روحى ، انتى مش عارفه
حاجه . انا عندى عشر سنين ، يعنى قربت ابقى راجل ، طب احسبى
كام سنه ، من ستين لسنه سابعين ، يبقى كام .

- عشر سنين .

- آهه شفتى انى كبير .

- شفت . قوللى بقى انتى عندك كام ؟

- زيك . عشره . آه ، آخر السنه يبقى عندى عشره .

- ها ، انا اكبر منك . أنا تميت العشره من زمان .

- انت اهل ، حد يطلع لسانه زى الكلب كده ؟
- انتى لهلوبه . يالهلوبه ، يا تخينه .
- انا اسمى سمانه يا عبيط . يا بليد الفصل يا حسن انت والفت
ورامى ، حتى الواد اخوك سعد ، خايب وكل يوم يتضرب علقه من
الاستاذ .
- يا تخينه طظ فيكى .

* * *

فى مسرى تموت الحمير العسره .

اسكتى يابت يا ام رامى اما اضحكك . احنا طلعتنا الميدان زى
الجراد ، كل اللى فى بيتكم ، على عيال الشارع ، على الواد ابنى
والبت بتى، ووقفنا . شويتين وعريبه كر كبيره جات ، وفضل
العريجي ينادى : العدرا ، العدرا . يالى راج تزور . وفضل يركب ،
يركب ، لحد ما ملا العريبه ع الآخر . وامشى يا حمار ، مش راضى
يمشى، يا حمار امشى ، قال راسه والف سيف ما هو طالع ،
والحمار يتمرغ ع الأرض ، ويتلعبط زى القرموط السمك . والراجل
يضرب فيه بالزخمه اللى معاه . ويعدين نزلنا . قام الحمار فارد نفسه
وفضل بيرطع ، والعيال تجرى ، واحنا نحرى ، والعريجي يجرى .
والاكل وقع مننا والميه اتدلقت ، وخالتك ام عكاشه وقعت، وفضلت
حسنه ولوژه يشدوا فيها، هما فوق العريبه وهى تحت . وانا اجرى ،
وراهم . وأول ما طلعتنا ، راج الحمار بارك ع الأرض تانى . شويه
وقرب مسطرد كدا ، عند الكوبرى ، قالوا إيه دا فيه رجاله من
الشفخانه ، بياخدو الحمير التعبانه . والعريجي يصرخ فى الحمار ،
ويلهلب فيه عشان يجرى زى الرهوان . وقعد يقولو ادعو يا جماعه
نعدى بسلام . فضلت خالكك حسنه وام عكاشه يدعو والعيال يردو

عليهم ، بقو زى اللى بيشحتو فى السيده . هما يقولو : يا كريم
يارب سهل لنا العاصى . والعيال يقولو : يارب ، يا عدرا نعدى
بسلام . آمين يارب . فرجو علينا الناس الله يخييهم ، وانا ولوزه
دافسين بوزنا فى عينا وهات يا ضحك .
- والله ليكى وحشه يا ام فىفى ، يا مرحب .
- اسكتى يا بت يا صباح ، قلبنا شعوط من الملوحة اللى البت ام
جلامبو بتبيعها ، شوفى لنا حاجه نبرد قلبنا .
- على حظكم أخويا لسه دايح النهارده وفأئين . ادخلوا اما أغرف
لكم . ولى العيال وهاتيهم ، وقولو : شالله يا عدرا .

فحلہ ، وہبلہ ، وقال بتلم إزاز قال !

- عایزہ بتقی زبالہ ، ہیا قالت لی کدا .
- تعرف یا لہ یا حسن الزبالہ دی کتڑ ، مرہ تلافی معلقہ ، مرہ شوکہ ، مرہ حلق ، بس شوف انا لقتیت ایہ . دہ اول نحویشہ حلق دہب .
- دی فردہ ، وبعدين تلاقیه دہب قشرہ .
- دا دہب ابن دہب ، انا وریته للصایغ الی عند المطراوی وکان عایز یشتريہ وانا مارضیتش ، ومرہ لقتیت جنیہ .
- لقتیتی جنیہ ، بنت القحجہ مفکرانی عیبط ، وہی سارقاہ من لوزہ ، آمال دکھا کانت نار قایدہ فیہا لیہ ؟ وجوزھا دبھا علقہ بسیہ .
- نسوان وسخہ عایزہ الحرق .
- مین ، مین الی طالع ؟
- انا ، انا یا واد یا حسن .
- مین عمی وحید . ایہ الی جابک ہنا .
- یا واد ہو دا مکان ، انت ایہ الی جابک فی البرد دہ ؟ دا احنا فی طوبہ یا ولہ .
- طوبہ ایہ واللہ ما انا حاسس ببرد ولا حاجہ . تعرف یا عمی

وحيد أنا مش بردان ، انا عايز افهم ، فيه نار فى صدرى ، تقدر تقوللى . ليه انت كذا ؟ واحنا ، وامى ، ونويه ، وأم رامى ، ولوزه ، وبدر ، حتى ام جلامبو . زمان امى وزنه يتخانقوه ، وبعدين يرجعو ياكلو مع بعض ، عم علوه يولع فى الأوضه ويمشى ، وابنه يموت . بدر قاعده على الباب تلم قصاقيص وتخططها ، وتوديتها لقرينها يعملهم سجاجيد ويبيعهم ، وسايه ابنها طول النهار العيال حاطينه فى قفص ويجروه فى الشارع ، عاملينه الفسيخه الميته . وبعدين . ليه يا عمى وحيد ، مش انت بتروح السيما وعارف كل حاجه .

- مش يمكن تعرف انت عنى . انت فى مدرسه وبتعلم ومعك مدرسين ، إوعى يا حسن تسبب المدرسه . إوعى تعمل كده وتخيب . النهارده انا باضرب نفسى ألف جزمه ، اتى سيبت المدرسه . كنت فى ثالثه اعدادى ، وسقطت ، كان المدرس صعب ، وابويا أصعب ، وانا طائش ، اهرب واروح السيم ، سيما النهضه ، والزاتون وسهير ، وناديه ، ولما كبرت لفيت العتبه وشارع عماد الدين . شفت أفلام ، وعشقت ناس ، حبيت ابقى فريد شوقى ، واقعد ابص فى المرايه واقول هو احسن منى فى إيه . نفسى اكسر ، واضرب ، واحب ، واشرب ، واولع سجاير ، يبقى معايا فلوس ، وابوس بنات حلوين ، السيما دى عالم ، عالم يدخلك جواه ، ويطلعك مولع ، زى السيجاره . تعرف أول مره شربت سيجاره ، بعث كتاب الانجليزى

لواحد صاحبي كتابه ضاع، ورحت السيمة، وكبرت على العيال، وسموني الوحش. وابويا سماني الخايب. روح يا ساقط تعالى يا ساقط، لما طهقت، وقاللي: يا بغل يا ابن الكلب، عرفتلى طريق السيمة، آهي دفتي آهي لو فلحت، ابقى شخ على قبري زي ابوك، دوخ واتلطم عند ده وعند ده يا بغل. اتعلم يا حسن، وابعد عن الشر، ماتقاش زيك زي الحمار. بص، بص يا حسن شايف الجرح اللي في صدغي ده، أبويا السبب، كان نفسه ابقى متعلم، زي البهوات، لابس بدله، وبيتي نضيف. يقوللي اتجوز واحد حلوه، مش زي امك ريحتها سبله من ريحة الحمار، وايديها مقرمطه من كتر الغسيل. وطلعت بغل وما سمعتش كلامه، كان الشيطان بيدو ف وداني وصدته.

- تعرف يا عمي وحيد، انا ساعات باحسن اني عايز اسيب المدرسه، لكن كل يوم باعرف حاجات تير، وباسمع حاجات كثير، الأستاذ في الفصل بيحكى لنا عن حرب ٦٧ والاستنزاف والضرب، والسد العالي، وقناة السويس، ساعات باحسن انها حاجات صعبه، لكن باحب اسمعها. البت البيضة التخينه بنت ام فيفي، باشوفها تقف تحكى مع الأستاذ عن خطب عبد الناصر، والأستاذ بيبقى مبسوط منها، ويقول لها شاطره يالهلوله. بنت الكلب دي بتعرف الحاجات الكثير منين؟ وعشان كذا انا باغير منها.

- نفسك تبقى زيتها !

- نفسى افهم ، الأستاذ بيشد حيلنا ويدفعنا ، الأستاذ يقول لولا عبد الناصر ، كان زمان اللى زيكم فى الشوارع ، وعلى الارصفه ، أنا باحب عبد الناصر وعمايزكم تحبوه . وجاب لنا فيلم عن الجهاز الدورى (القلب يعنى) انحشرت وسط العيال ، والأستاذ عمل نفسه مش واخذ باله لاني مادفتش فلوس . وقعدت اتفرج وفى الآخر جابو صورة جمال عبد الناصر ، العيال هيصور ، والمدرسين قعدو يسقفو ، والأبلوات تزغرد ، وعبد الحليم بيغنى ، كنا هاتبنى وأدى احنا بنينا السد العالى ، واحنا نغنى معاه ، وجمال يضحك ويشاور بإيديه للعمال ، أنا مديت إيدى كنت قاعد فى الصف الأول ، كنت عايز اسلم عليه ، ألمسه ، شفته وهو بيمد إيده ويسلم ، أنا باحب عبد الناصر .

- هيه سمعتكم ، سمعت كل حاجه .

- مين ؟ انت يا مخفى النقا يا سعد .

- امي بتقول لك انزل من ع السطح لا تبرد يا بغل .

اسمع يا خويا انا هاحكى لك عن كل حاجه .

- أنا عايزه اعيش ، عايزه فلوس ، تعرف انا محوشه فلوس كثير مع خالتك صباح من الشغل ، رحت اقول لها عليهم ، قالت لى : يا عينى يا نبويه ، ما تصبرى عليا ياختى كدا قد كام يوم ، وأنا اعمل لك جمعيه واديهم لك .
- كام يا نبويه كام ؟
- قول ييجى عشرين جنيه أو اكثر ، مش عارفه بالظبط .
- وهى وديتهم فين ؟
- بتقول اشترت بيهم جيتين بضاعه ، فوط على ملايات على طرح ، ودفعت تقديمه حته أرض فى المرح ، وهانتقسط كل شهر اتنين جنيه . وطول النهار مسرحه عيالها يلمو طوب ، خشب ، صفيح ، اللى يلاقوه ، تقول عشان نبى البيت .
- بنت الرفضى . تبنى البيت على حسك .
- والننى ورحمة عصفوره يا خويا ما تقول . لامك تزعل ، وتقول البت استخسرت تدينى الفلوس .
- وامك عايزه الفلوس ليه ؟
- لوزه غاوتها وقالت لها فيه أرض ناحية العرب ، عند المسله

رخيصه، تعالى نشوف لنا حته هناك نشترها .

- وامك معاها فلوس منين ؟

- اقول لك ولا تزعلش .

- امك بتبيع عيش، عند الفرن . بتقعد بالعيش البايك والسحله

اللى طالع من الفرن، بتبيع الرغفين بتعريفه، وساعات التلاته بقرش .

- ازاي من غير ما اعرف ؟

- بتطلع الصبح بدرى . الفجر واحنا نايمين ، تروح لحد الساعه

سابعه وبعد كذا تحيب العيش والطعميه وتصحينا، أمال احنا بنصرف

منين، ومصاريف الكتب والمدارس . والواد سعد عارف وساعات

بيروح معاها .

- سعيد عارف، وانتى عارفه . وانا طيشه .

- وطى حرك ، لحسن تسمعك .

- ما تسمع .

- إيه هو عيب ولا حرام ، التجاره شطاره .

- وانتى عرفتى الكلام ده منين ؟

- ام جلامبو .

دا يمن تقول كدا . تقول الواحدده الشاطره ، تعرف تحيب القرش

منين ، وتحافظ على نفسها، مش طول النهار قاعده طيزها تسف تراب

من الارض .

- يا حسن .. يا حسن .
- مين ؟ عمى وحيد ؟
- تعالى عايزك شويه .
- تعالى انت أنا اللى عايزك . اعملى كوبايتين شاي ، فزى ، قومى .
- اسمع يا حسن ، انا ماشى ، هاسيب لك الأوضه شهر ولا اتنين ، اقعد فيها وذاكر ، ولما ارجع يحلها ربنا .
- رايح فين ؟
- الفنانين عاملين حفلات للجيش ، وانا رايح هناك .
- تعمل إيه ؟
- ما انا خلاص اشتغلت فى السيمى ، دا خلاص بقى زى المرض .
- فريد شوقى برضه ؟!
- دا عشق ، زى ما انت بتعشق عبد الناصر . حلوه صورته دى وسط عياله . خالد وعبد الحكيم وعبد الحميد ، ودى صورته لوحده . ربنا يخليك يا ريس .
- هاتسبينا يا عمى . هاتسب نبويه .
- نبويه دى فحلله .
- بس أوفه قالت ...
- أوفه دى صغيره وسهله ، لكن نبويه دى طوفان ، نار تحرق من

- بعيد ، واللى يقرب منها يولع .
- قوللى يا عمى انت تعرف إيه عنها .
- أعرف حاجات كثير . كانت تحكى لى عن كل حاجه ، الزباله ، والفلوس ، والعيال اللى ضربتهم وسرقه العيش من القرن ، والواد لالو ، ومليم وسردينه .
- سردينه مين ؟
- فحل حاول مره يتهجم عليها فى السوق . مسكته عجته .
- قلت لها : وقدرتى عليه يا نبويه .
- قالت انت ناسى يا عم وحيد انى اتولدت فى الزباله . اختك قاسيه قوى ، قلبها حجر .
- ما حاولتش مره ...
- آحاول إيه ، ممكن اكون بوسنها ، ضمتها ، لكن ماوصلتش زى ما أوفه بتقول . انت فاكر إيه . لسه بدري عليك يا حسن .
- إيه .
- أمال انت فاهم إيه ؟
- انت بتبوس الصور وتضحك عليا . انت لا تعرف فريد شوقى ، لا حد ولا بتروح السیما من اصله ، انت حيلتك مليم احمر .
- طابخ .
- انت بتضربنى .

- واموتك كمان ، امشى اطلع بره ومش هديك الأوضه، هسكها
ع الفاضى . عييط ومش عارف حاجه . وانا اللى افكرتك راجل .
صدقته حسنه لما قالت عليك فحل .

* * *

السطح لين ، لين ، خفيف ، والأرض ناعمه .

والسما زى الحرير ، والقمر فوق باصص ، طبق مدور كبير ،
والقفص الجريد فى الركن مكانه زى امبارج ، وأول ، وكل يوم ،
وهى نايمه ، وباصه لفوق ، وسرحانه . وبالراحه بالراحه قوى ،
رحت ماشى ، بشويش على أقل من مهلى . وناطط مره
واحد

إنتى بتعملى إيه ، بخ .

- يابن الكلب يا بيع . إخص عليك يا سعد خضيتى . إيه اللى

طلعتك هنا ؟

- مش احنا متفقين نلعب عروسه وعريس .

- إنزلى يا مخفيه النقا يا الفت ، مش قلت لك بطلى تطلعى ع

السطح . وانت ياد انت ، إبعد عنها أحسن لك ، بدل ما اطلع لك

رامى يموتك .

* * *

انا اتجوزت ، كانت شاديه وفايزه وصباح . طالعين جداد .

والراديو كان قليل ، كل كام بيت تلاقي راديو ، بنتى الاولى ، اتولدت يوم ما عبد الحليم كان بيغنى (قوللى حاجه) . كانت ايه مفرقه قوى ، تمشى فى الشوارع وعلى القهاوى ، تلاقي الرادواى على الآخر .

- انا كمان يا ام فينى اتجوزت سنتها تقريبا ، كانت صباح بتغنى (ع البساطه) . ياه الدنيا جريت قوى ، فين (الغاوى ينقط بطاقيته)، ولا (ما تزوقينى يا ماما) . انا بنتى بتحبها موت .

- يا سلام يا ام رامى الدنيا راحت فين . الضحك غلى ، والحياه غليت ، وما رخص إلا البنى آدم .

- ومين سمعك يا ام فيفى ، هتدينى الجمعيه الكام . انا هادخل بنفريين ، عايزه الاول والآخر .

- وماله يا اختى ، خدى اللى عايزاه .

تصبحى على خير .

- وانتى من أهله يا ام رامى ، سلمى لى على العيال ، امسكى خدى دول ، حيتين جنبه من البلد خديهم ، يا اختى خدى .

- ياخذ عدوينك ، ويكفيكى شر اللى ما تطيقى شره ، يا ام فيفى .

- اسمى تهانى ، فولى يا تهانى يابت مسعده عشان الدعوه تجوز .

أنا اتغيرت ، واترمطت ، لقيت وشفت

الخوف ، والجوع ، والحب ، ووقعت ، وقمت .
 اتكفيت على وشى ياما . ولا حد سأل ، الكل ضحك حتى فريد
 شوقى ضحك عليا . ف يوم عرفت أنه له فيلم جديد فى سبما مترو ،
 رحى وهتفت ، وهلت عاش الوحش ، عاش الملك . عاش ملك
 الترسو . بصيت لقيت شوية طلبه جاين من آخر قصر النيل يجرو
 بالشوط ، والعساكر يجرو وراهم ، لكنهم كانوا عمالين يهتفو ،
 بالروح بالدم نفديك يا جمال ، عاشت مصر حرة مستقلة ، ويسقط
 لستعمار ، هتجارب ، هتجارب ، اسرائيل الأرانب . والعربيات عماله
 تلم وتعى . فريد بيه راح داخل جوه عربيته . بصيت عليه من الإزاز ،
 وقلت له : خدنى معاك ، دا انا اعجبك قوى . قاللى : بعدين ،
 بعدين .

راحو شايلىنى هيللا بيللا جوه العربيه ماعرفتش انا فين ؟ إلا لما جه
 واحد جنبى وقاللى : انت فى كلية إيه . ساعتها استغربت وعرفت
 بعد كذا انا فين ؟
 - يا عيى عليك ياخويا ، بيتك ومطرحك وكله يهون ، خد
 اشرب ، شوية اللمون دول .

- تسلّم، تسلّم إيدك يا أم حسن . قول يا حسنه ، انت نسيت ولا
إيه ؟ إحنا اخوات . وانا باعتبرك زى اخويا بالقطب .
- وانا كمان . ربنا يعلم اللي فى القلوب .

* * *

أجر وعافيه يا خالتي ام عكاشه .

- والله يا حسنه يا بنتى هاودع . ياللا حسن الختام .
- شويه برد يا وليه يعملو فيكى كدا ؟ تعالى يا ام رامى ادخلى .
- خدى يا خالتي شربة الملح آهه بالهنا والشفا .
- يا اختى اللى يديها حلة محشى ولا نابت تقعد بيها فى الميدان ،
تقوم تيرطع على طول .
- يووه يا حسنه الوليه مش حملك .
- طب اسكتى . خالتي ام عكاشه الصعايده فى ميدان المطريه
بيسالوا عليكى ، واحشهم العدس السخن .
- والله ما حايشتى عنهم إلا الشديد القوى ، جنبى هيتفرتك منى
ماعرفش ليه ؟
- ما تقومى نوديكى للدكتور .
- الشافى هو الله . دلوقتى آخذ شربة الملح ، وبطنى تمشى ،
واقوم زى الحصان .
- خدى يا ام رامى ، نقى لى شوية الفول دول وبليهم .
- على فكره يا خالتي ، لو عايزه عدس ولا فول ، ولا زيت ،
الوليه ام جلامبو عندها جوه اكوام ، اكوام . أنا شوفتها واقفه ف

طابور الجمعيه ، هى وام لالو البقاله وعمالين يحولو . والراجل ابو
 وش احمر ، قلع الحزام ونزل فى الناس ضرب . ويتوع اللامون
 هجمو، وبقت خناقه لوب السما . واللى تصوت، الفلوس اتسرق
 منها، واللى زيتها انكب منها. انا شفت كذا رحى راجعه . راح الواد
 السويسى اللى بيقولوله يا سردينه، قريب الوليه ام جلامبو ، هو
 والواد ملهم العرايشى، دخلو الجمعيه وقللوا من جوه .

- واتي ايه اللى وداكى يا ام رامى .

- قلت اجيب إزازه زيت، العيال نفسهم فى المحشى، شافوه فى
 إيد الواد ابن ام فيفى .

- آه منها الوليه ام جلامبو ، تلم الحاجات من الجمعيه، وتبيعه
 الطاق طاقين ، انا شفت ام فيفى بتاخذ منها .

- آه يا حسنه ، منهم لله بقى ، غلو علينا الميه وسدو عنا الهوى .
 كل ده ومش مقضيها، بتلف قراطيس شاي وسكر وتبيعه بقرش
 وقرشين. اللى غايظنى الراجل ابو وش احمر اللى واقف فى الجمعيه،
 انا شايفه العربيه وهى بتنزل الشاي والسكر ، وانا فى البلكونه عند ام
 داود فى المساكن. وعلى ما نزلت ورحى، يقول اللى معاه بطاقه
 يقف، واللى معاهوش يمشى. واتحابل على الراجل انه يدبني إزازه
 زيت ما رضى ابدا . رغم انه عارفنى ويامه جه صلح عندنا جزم،
 وكنت ساعات ما ارضاش آخذ منه فلوس ، اقول آهو غلبان .

- هي الدنيا كذا أنتشت على حرب وهتروح على حرب . قومي
من بين لعتاب ، قاعدة لعتاب وحشه ، الملايكة ماتجبهاش ، قومي يا
اختي قومي .

* * *

حسان اليماني قال : الدنيا نشئت على كفر وها تروح على كفر .

وها تكثر فيها الحروب ، والناس هتاكل بعضها .

- جيتي الكلام ده متين يا خالتي ام عكاشه ؟

- زمان أيام ما كان البال رايق ، كنت احب اروح الجوامع اسمع الأحاديث ، كان فيه يوم الجمعة في الحسين ، والثلاث في ابو السعود ، والخميس في السيده . وغيرها وغيرها . كانت حماتي تاخذني من إيدي ، ونفضل نلف ، تاخذها جوله من أول السيده ، لنفيسة العلم ، للسيدة عيشه ، للجيشي ، للحسين ، ونلف طول النهار على رجلينا . وفي الآخر نرجع على سيدك المطراوى . نصلى العشا وننام . ما هو بيقولك سيدى المطراوى ده من نسل النبى ، وسيدى زين العابدين ، ابن الحسين ، والسيدة زينب اخته ، ونفيسة العلم يقولك كانت متبحره في العلم وتقعده مع العلماء ونجالسهم . ياه كان الزمن غير الزمن ، والبال غير البال . كان ممكن الواحد يلف مصر كلها على كعبه ، كانت الصحه هبله ، والعافيه بتقر صاحبها . وعمك ابو عكاشه كان يتكل على الله يروح الشغل واحنا نلف . اليومين دول مش عارفه حماتي عماله تحوم عليا ليه ؟ وعماله اشوف ناس ماشفتهمش من زمن ، حتى حمايا اللي مات قبل ما التجوز ولا عمرى شفته . لقيته جاي . وناس راحو ، وناس قاعدين .

- قلبى مقبوض يابت يا حسنه ، وعيني الشمال بترف ، الله ما

اجعله خير .

- كله على مراده يا ام رامى ، ربنا يستر .
- حاسه بزعل كبير جوه قلبى ، وطول النهار منكده ، وزى ما اكون عايزه اعيط . تصدقى بالله يا حسنه ، انا انا حاسه ، نفس الإحساس ده بالظبط يوم ابويا ما مات ، وامبارح شفته فى المنام زعلان ، ولايس جلابيه سوده ، ومعفره زى اللى يكون جأى من سفر ، آنده عليه مايردش . زى ما يكون حزين وواخد على خاطره .
- الاموات قلبهم بيحس باللى هايحصل .
- ابويا كان يقوللى الروح الطاهره بتخبر أهلها أول بأول . تصدقى يابت يا ام رامى لو قلت لك ان انا ما معايش ولا تعريفه ، تقولى كدابه ، ومش عارفين نتعشى إيه ؟
- يا حبيبة اختك يا اختى . اسمعى ، انا عندى شوية ملونخيه ناشفه ، وحته دهن ضانى من بتاع العدرا . والله آخر حته ، مش مهم ، خديهم يا اختى وعلى شوية ميه وكترى لهم الفص التوم وطشيه عليهم ، وآهو العيال ياكلو ، ويكره ربنا يفرجها . ولا أقولك اقوم انا اعمالهم واحط لهم حباية قوطه ، آهم يطعموهم شويه وخدى شويه وانا شويه والعيال يتعشو . ولا اقولك أنا هالم العيال كلهم واعيشهم .
- يطعمك ما يحرمك . يا ام رامى يا بنت آلا ، اللى هى امك اسمها إيه ! يا بنت حوا وآدم .

انا حريجي وصايح ، لا ليا شغله ولا مشغله

- ولا أهل يسألو عليا . أنا مقطوع وقعدت لكم آه .
- إيه الظيطة اللي بره دى يا حسن ؟
- إلخفى يامه ، الواد العبيط لالو جاى ومعاها عيال كثير ، وعمال يزقل بالطوب .
- إيه يا اولاد ، إيه الهوجه دى كلها ، مش خلاص المدارس قربت ، روجو شوفو حالكم .
- خالتى حسنه ، خالتى حسنه ، مالكيش انتى دعوه . انا حايز الوليه ام ، ام جلامبو الحراميه سرت ، سرت الزيت والسكر بتاعتنا .
- معلش يالالو ، خد يا خويا الجرملق اللى انت جايه وراك ، وانا هاكلهمها .
- تكلمى مين يا امه . إوعى من سكتى ، روجى ، روجى إن كان هو لالو العبيط فانا ام جلامبو ، فاكرانى هاخاف من الطوب والكلام الخايب ده . وسعى وسعى . خد قرش آهه وروح لامك يا شاطر . زفوه يا عيال وقول : العبيط آهه . العبيط آهه .

وكانت ليله ، انقلبت الدنيا .

جه العالى فى الواطى ، الى راح ، واللى دمه ساح ، واللى مش
مصدق اللى حصل . احنا قلنا القيامه قامت . بصينا يا حبيبتى لقينا
جراد نازل علينا ، وعلى خوانه ، وراحو داخلين دب . دب ،
طاخ . . طاخ . بالطوب والمعصى والأرايز ما يقناش عارفين الداهيه
دى جايه متين ؟ أتارى الواد لالو ، فضلوا عيال ام جلامبو يزفوه لحد
الدكان، هناك فى شارع البحار ، وشويتين ، وعنيك ما تشوف إلا
النور . تقولى الحرب قامت . انا قلت دى غاره ، واسرائيل نزلت دب
زى ما بنسمع ، أو يمكن تكون رمت علينا قنابل زى مصنع ابو زغبل .
المهم يا ستى ، ولا ستك إلا انا . فضل الموال ده ييجى ساعه ،
الضرب شغال ، والتكسير على ودنه ، والصوات داير ، ومايقناش
عارفين مين بيضرب مين . أم لالو وعيالها وقرايبها ، والواد سردينه لم
الصبع بتوعه ، بتوع السمك وجم ، وام لالو ، لمت شارع البحار
وشارع عيسى وشارع العبايطه ، وكثير من البقالين بالشوم والنبايت ،
وكانت مجزره ، فضلت لأدان المغرب شغاله ولا حد استجرى يروح
القسم .

- يا حزن قلبى ، والله يا حسنه بقينا منقطه ، وملطشه للى يسوى

واللى مايسواشى .

- أمال إيه يالوزه، ما هو كلابها سابت على ديابها . من يوم ام جلامبو ما جات وجه خيرها، وكل ده عشان القلوس، والزيت والسكر ، اللى نازلين فيه نهب من الجمعيه ، وتندار تبيعه بالغلا والكوا .

- ألطف بينا يارب . الطف بعبيدك . حبه ، حبه ، يخش بيتنا نور، والحراميه، وقطاعين الطرق .

- ولا يهملك يا لوزه . انا سمعت انها هاتعزل خدت شقه فى عماره ام ليله اللى فى عين شمس، ويكره تغور .

- اسمعى يا حسنه ما تيجى نعمل زى الوليه ام رامى ونشترى أرض بالقسط يعنى هى اشطر متنا فى إيه ؟

- أم رامى عرفت تحيب القرش منين . وماتفرقش عن ام لالو . تشتري القوط والملايات من الجمله رخيص، وتبعها بالغلا والكوا للناس . دى حتى حاجتها حراقه . خدت منها مريلتين للعيال، عايزه تاخذ بريزه قسط على كل واحده .

- اسمعى يا حسنه البت نبويه سرها مع ام رامى ، دحليبيها وسيبيها لحد ما تعرفى تاخديهم منها . وام فيفى بتعمل جمعيه ادخلى معاها، المهم لى لك قرشين ، قد عشرين جنيه، وانا هابيع السرير ، على حله وطشطيه نحاس ومعايا قرشين، وتعالى نرميهم لراجل فى

المسله بيقولو طيب قوى، وننتق معاه على حته قولى مية متر
ونقسمها. وأهو كله بيروح زى مصاريف، إيه يعنى اتنين جنيه فى
الشهر؟

- يا اختى، اسكتى، اسكتى، انتى فكرك حكاية العيش الرجوع
بتكسب، أبدا وحياتك، دا حتى فيه وليه بتيجى من العرب كل يوم
الصبح بتعى من الفرن عربيه كارو بيقولو بتاخدها وتبيعهام هناك .
- يخيك مره، وسبتها تاخذ منك العيش .
- أهو ربك اللى بيرزق، تلاقيها صاحبة عيال .

يخبيك وليّ، تعالى يا نبويه، شوفى خيبة أمك .

- خيبة إيه يا لوزة، انتى هاتعددى .
- اسكتى يا حسنه يا بايظه، يا ام عيش . دا انا لو منك آكل مصارينها آكل . مش شايفه الوليه أم جلامبو وعيالها عاملين ازاي .
- اسمعى يا لوزة كدا اسمعى .
- إيه الصوت اللى مالى الدنيا ده . يا ساتر يارب . قومى شوفى إيه ، قومى، طلى من الباب كدا .
- باينها حريقه جامده قوى يا حسنه. شايفه الناس طالعه يمة القسم ، وعماله تجرى بالشوط .
- اسالى يابت حد كدا ولا كدا . رجليا منمله ، مش قادره أقوم، عامله زى ما اكون اتشليت . اسالى ام فيفى ، سامعاها بتصوت .
- إيه يا ام فيفى . إيه يا ولاد سيبتو ركبى .
- صوتو يا ولاد صوتو . صوتى يا بت انتى وهيا . الرئيس مات .
- اسكتى يا بت اسكتى . تفى من بقتك ، الشر بره وبعيد . يا لهوتى ، الشر بره وبعيد .
- الشر بره وبعيد .

* * *

اسم الله عليك يا جسرنا العالى .

اسم الله عليك يا ابو اسم غالى . الدنيا اسودت وضلعت بعدك .
يا ترى سهم مين اللى صابك وكان طايش . آه يا حبيب اختك يا
خويا .

يا عامود بيتى والعامود هدوه ، يا هل ترى فى بيت مين نصبوه ؟
يا عامود بيتى والعامود رخام ، يا هل ترى فى بيت مين اتقام ؟
آه يا غالى يا ابو ضحكك حلوه يا خويا ، يا ابو هله وطله ، يا ابو
كلام رايق ، يا طول بعرض يا غالى .

- كفاكى يا حسنه يا ندابة ، عنيكى بقو كاسات دم .

- اسكتى يا بت اسكتى . دا الحزانة تحزن عليه العمر كله .

دا كان ابونا واخونا .

- ومين لينا من بعده يا لوزه ؟ دا الدنيا كلها حزينه ، والناس
وشها اسود .

- حقه يا ام رامى ، الوليه ام عكاشه من ساعة ما سمعت الخبر
الشوم ، وهى نازلة لطم وبكا تقوليش ابنها مات . فضلت تجمع
وتلوى ، وشانقه رقبته بالشاش وعلى قولة يا ولدى .. يا ولدى
اسمعو .. آهه صوتها .

نادى المنادى وطوح النبوت
روح بلادك يا غريب لا تموت
نادى المنادى وطوح الحربه
روح بلادك يا غريب أولى .

- لا حول ولا قوة الا بالله . الوليه فاكراه ابنها . بصى . .
شوفى يا حسنه ازاي خارجيه ، وشانقه نفسها . الوليه هاتفطس .
حلقى عليها يا حسنه ، حلقى يا ام فيفى . الوليه خارجيه . . .

جانى الخير من بعيد وانجر
اسم الله عليك ألف بعد الشر
جانى الخير من بعيد مجرور
اسم عليك ما حد يقول

- دا حتى العيال الصغيره ، ماسكه أعلام سوده ودائره تلف فى
الشوارع ، والواد المخفى النقا ابني سعد ، لأول مره يمسك فى خناق
اخواته ويزعق معاهم ، قال إيه عشان راحو المدرسه . قال لهم : ازاي
الدنيا خارجيه وانتو ولا هانكم . تفتكروا المدرسه فاتحه عشان
خاطركم . مصر كلها ف حداد يا بقر .

وسايباه يعمل فى أعلام سوده ويفرقها على العيال كل ما يعدو .
وحتى عيالكم لمحتهم بيأخدو منه ويفرقو على العيال .

- حقه يا ام فيفى ساعة النكسة قلنا دا أكبر حزن ممكن نحزنه ،

أتارى في الحزن اللى اكبر منه .

- هيا دى حال الدنيا يا لوزه . هيا دامت لمن . ما دايماً إلا وجه
الله .

- اسمعو . . اسمعو الشباب معدى يقول إيه :

- اسكتوا . . اسكتوا يا بنات اوغو تقولو الرئيس مات .

- اسكتوا . . اسكتوا يا بنات اوغو تقولو الرئيس مات .

- يالهوى . ياخرابى .

- صوتى يابت صوتى . إدى جامد يابت يالوزه .

- يووه روقو كده ياولاد . آمال بكره هانعمل إيه ، ويعده ويعده ،

دى الأيام طويله .

لا فيه رجال قبله ولا بعده . هو راجل والرجال تشهد له .

هو راجل والرجال تشهد ليه . ولا فيه رجال قبله ولا بعده .

عددى يا معدده وقولى . قولى يا حسنه كان أبوكى هو اللى مات .

يا لهوتى .

- يا خرابى . إدى يا بت يام فيفى إدى . صوتو يا ولاد صوتو .

ما حد عارف دی مظاهره ، ولا هوجه .

الناس هاجت من بيوتها ، ودايره تلف وتعدد حتى العيال ، ما حد عارف دا بكا ولا نواح . اسمعى كده يا حسنه اسمعى .
- سامعه يا ابو سعد سامعه . حزن كبير يا خويا . حزن كبير واتلفحنا بيه .

- يا ترى الايام اللى جايه مخيه لنا إيه ؟
- اسمع العيال بيقولو إيه : (ساب لك إيه يا صبيه حبيبك لما مات.....) هاجت الناس هاجت . وكل البيت خرج صغير مع كبير والناس نسيت الحرب والنكسه . وما افكرت الا جيبها اللى مات . غنوا يا ولاد ، قولو (سابلك إيه يا صبيه حبيبك لما مات.....)

تمت

٥ يونيه ١٩٩٨

صدر للكاتب

- * حكايات الليل (مجموعة قصصية مشتركة) القاهرة : ١٩٨٤ طبعة محدودة (نفد) .
- * تلك القاهرة تغربنى بسيفانها العارية (ديوان قصص) القاهرة : ١٩٩٠ طبعة محدودة (نفد) .
- * أشياء صغيرة واليفة (قصص) القاهرة ١٩٩٦ - أصوات أدبية .
- * بنات في بنات (قصص) القاهرة ٢٠٠١ كتابات جديدة .

تحت الطبع

- * سيدة المكان (قصص) .
- * نقوش (قصص) .
- * حتى تتلى بالموسيقى (قصص) .
- * زهور عمرها أربعة آلاف عام (رواية) .
- * الحمار الطيب عسل (قصص أطفال) .
- * خبيات صغيرة (نصوص) .

إصدارات رؤى

كتاب الشعر	محمد عبد الستار الدش
رائحة للوطن	حنان جوده
الصورة مطابقة لابتكاراتي	أحمد الجنائني
عشرون رمحا من أرق	د. يسرى العزب
وش وظهر	
كتاب القصة والرواية	إيهاب الورداني
الأرث	محمد شريف
حكاوي، بنت المملوك	ميرفت العزوني
حبات الفراولة	صفاء عبد المنعم
من حلاوة الروح	
كتاب المسرح	محمد عبد الحافظ ناصف
المخنثون	حمدى متولى
الهامش والفنجان	محمد عبد الحافظ
النهر	فوزى صالح
هنا دار السلام	
كتاب الطفل	جمال عساكر
رحمة في عوكب الأرض	محمد عبد الحافظ
أحلام النهار	
كتاب الترجمة والنقد	ترجمة شوقي حافظ
قصص عالمية	تقديم يوسف الشاروني
تحت الطبع	بن هخت - ترجمه حمدى متولى
التواطؤ	مراجعة وتقديم أ.د. محمد حافظ دياب
	ترجمه ميرفت العزوني
	تقديم أحمد الجنائني

الكتاب القادم

محمد كمال
تقديم. مكرم حنين

وهج الشرق
دراسات في النقد التشكيلى

